

بيرم التونسي

المجموعة
الكاملة
لشاعر
النسب



ديوان بېرم التونسي

بأجزائه الثلاثة

الناشر

مكتبة مصر
٣ شارع كامل صدقي - البجالة

دار مصر للطباعة

سعيد جوده السحار وشركاه

تذکرہ امیرین اسلام

جلد اول

مکتبہ
الاسلامیہ
کراچی

مکتبہ اسلامیہ
کراچی

على الأرغول :

حياتي

الأوله آه . والثانية آه .. والثالثة آه

الأوله : مصر ؛ قالوا « تونسى » ونفونى

والثانية : تونس ؛ وفيها الأهل جحدونى

والثالثة : باريس ؛ وفى باريس جهلونى

الأوله : مصر قالوا تونسى ونفونى — جزاة الخير

والثانية : تونس وفيها الأهل جحدونى — وحتى الغير

والثالثة : باريس وفى باريس جهلونى — ونا مولير

الأوله : مصر قالوا تونسى ونفونى — جزاة الخير — وإحسانى

والثانية : تونس وفيها الأهل جحدونى — وحتى الغير — ما صافانى

والثالثة : باريس وفى باريس جهلونى — ونا مولير — فى زمانى

الأوله : شربتنى من فراقها كاس — بمرارة

والثانية : آه فرجتنى عالجمال ينداس — يا خسارة

والثالثة : ياناس ياريتنى كان لى فيها ناس — وإداره

الأوله آه . والثانية آه .. والثالثة آه

الأوله : أشتكها لى أجرى النيل
والثانية : دمعى عليها غرق الباسـتـيـل
والثالثة : لطشت فيها ممثـل وذليـل
الأوله آه . والثانيه آه . والثالثه آه

الشرق

من قبل ما اكتب أنا عارف
والأجر بالتأكيد ذاهب
والشتم حايجيني مسوجـر
مهما انكويت بالنار والنزيت

يا مصرى ونت الى هـامـنـى
هزيل ويحسبك الجاهـل
من دى الكيسوف الى تصبر
ونمت والعـالم فايـق
وشوف الشعوب واتغص ودوب

واللى آمنى وبكـانى
علاكل نازل طول عمـرك
وقـلت لى لما نهيتك
لحد ما الجزار حلا
والله الخروف سايب معلوف

إنت يا شامى
بارد حامى
مصرى حرامى
جرحك دامى
ما يفوته جعان

والمغربى المسلم راخر
لما انتقدتــــــــــــه فزع قال لى
ونا الى قصدى أشوف قيده
لقيته فرحان به راضى
خليك فقير دق البندير
أبو زر فاشوك
يلعن .. بوك
يصبح مفكوك
طيب مبروك
وكل التعبان

روح العراق راخر قول له
لإمتى تفضل يا أخينا
ما تعرف الجاز يستعمل
الطم بقى وقول ويأيه
واوعى المداس يفلت تحتاس
كيف الأحوال
بحرام وعقال
غير للمشعال
الجاز أموال
وتقول لى أمان

يا شرق فيك جو منــــــــور
وفــــــــيك حراره يا خساره
فيك سبعميت مليون زله
لا بالمسيح عرفوا مقامهم
هى الشموس بتخلى الروس
والفكر ضلام
وبرود أجسام
لكن أغنام
ولا بالإسلام
كداهو بدنجان

الفن

الفن يا أهل الطبيعة روح تخاطب روح
بلغاهــــــــــــــــا
والفن ياهل المحبة عين تكلم عين
بنهاــــــــــــــــه

والفن ياهل القلوب ، صوت من سكوت الموت

أحياءا

يا طالب الفن ، افتح لك كتب في الفن

تقراها

يا مطول الشعر ، ومشلشل بدلدولتين

ومبلم

شوف النجوم في السما متوجهه على فين

واتعلم

وشوف بكا العين ، وضحك الفم ، في الاتنين

واتكلم

ورد الخدود فن — فيه الفن يتغير

طول القدود فن — فيه العين تتحير

وكل شيء في الحياة بالفن متسير

يا طالب الفن

يوم الدبايح

يوم الدبايح كان آخر مواعيدك

وقفت لك فرحان أنصب رايات عيدك

وافرش لك الريحان واسمع زغاريدك

زعق غراب البين فصلت أكفاني

خيبة أمل ومرام واعر ومتعسر

ياريته كان في منام يصبح ويتفسر
أو حكم بالإعدام عالئناس يتسطر
ما كان تشوف العين حالى الى بكـانى

عالمين يا مصر مشيت إيباك يسلىنى
عليه عبد جوليت تركى على صينى
يا ما لقيت ورأيت جمال ينسينى
واتفكر الهرمين تجرى الدموع تانى

الورد

يا ورد أستظرك قبل الريع بريع
واوهب لك العمر
واجعل لأهل الملامه فى هواى شفيح
أوراقك الحمر
دى رقتك علمتى أبقى عبد مطيع
للبيض وللسمـر

واوهب لك العمر يالى عمرك انت قصير
ويـقصر الهم
أوراقك الحمر تشرب دم قلبى عصير
يا غلا من الـدم
للبيض وللسمـر تهدى وانت حر أسير
تنـاس وتنضم

ويقصر الهم زوالك ونت لسه جاي
في عالم الغيب
يا غلا من الدم لونك في عروق الحى
حتى مع الشيب
تنباس وتنضم قدام الرقيب في الضى
ما فيكش من عيب

العيون

من العيون يا سلام سلم
تحت البراقع تتكلم
شوف واتعلم
والدنيا نهار

عيون تقول لك قصدك إيه
ما لكش شغل تعس عليه
بتخلق ليه
ياراجل يا حمار

وعيون تقول لك أنا عارفك
من يوم ما شفتك م الشباك
والنبى ما انساك
يا جدع يا صغار

وعيون تقول لك روح يا رزيل
ياباى كبه في المخاليل
يابو دم ثقيل
ياما هم كثار

وعيون تقول لك أنا حبيت
وعيون تقول انشالله ماجيت
ياللا بنا البيت
أنا رايحه الزار

وعيون تقول لك بالمحسوس أنا عايزه فلوس
وانشالله حتى تحوس وتدوس أنا عاملاه كار

وعيون تقول لك إمشي يا واد أنا أم ولاد
وعيون تقول لك عندي ميعاد ويا السمسار

وعيون بسر الحب تبسوح كدا بالفتوح
وتعرف القلب المجروح ما عليهش ستار
وعيون تسبل فوق الخد دى جد ف جد
وعمرها ما تكلم حد عيون أحرار

وعيون تحقق فيها بشوق تهرب على فوق
بتقول لك ابعده عني بذوق نظراتك نار

وعيون ما تعرف زعلانه أو فرحانه
صباح مسا أهى ساهتانه صاحبة أفكار

وعيون لها ضحكة ف وشك بس تغشك
وتبص من تحت اليشمك تلقى المنقار

وعيون كدا يقيم ساهتين صفر وباهتين
بالشكل دا عيون الخاينين تضرب بصفار

وعيون تبص وتتسفلق واقفه شلقلق
وعيون تبربق وتبحلق عايزين مسمار

يا ست

أهلا وسهلا من قلبى كل ما اشوفك
أقولها وأطلب من ربي لمس كفوفك

جسمك فى فستان السواريه عريان نصه
لو كنت افصل بست عليه إيد من قصه

ولمشيتك فى سان استيفانو بالمتجر جر
قالت جميع أهل الكازينو الله أكبر

والخطبوه لما تخطيها واحده اتينيه
أقول يا ربنا تكفينا شر عنينا

وشعرك اللى الفن لواه يا صلح يانى
ما اعرفش لو كان لسطى كواه ولا كوانى

ونظرتك من تحت لفوق كدا للراجل
تخلى لولب متبر الشوق طالع نازل

أُما الى زود فى جمالكَ ونصب قامتك
وشوق الناس لوصالك ثقل عظمك

ولما إيدك دى تحبك على منديلك
أحس قلبى بى تشبك ويصلى لك

وضحكك لما برقت منها السنه
دى ليلة القدر انفتحت فيها الجنه

والشفه لما تعضيها شفتك انتى
دى نايبه وبتفتكرها يام جوائتى

ولما تنظرى لهدوك عينك تدبل
وتطول رقبك وحدوك ورد يشعل

يا مجلس الأنس اجمعنا بينات حوا
دول نصنا وعضم ضلوعنا وبه تقوى

يا مجلس الأنس تضلهم لما نجومك
تغيب ونسهى ما نتكلم غير فى همومك

أشوف شنب مرعى ويحى أخضر واسود
وشيخ مكلع وبلحيه منظر يكمد

ويقول لنا اليه البايخ
إنه النهارده صبح داخ
يلى بضربه
وشرب شربه

النسوان

فى كل عام للورد أوان
بقدرتك نابتين ألوان
إلا النسوان
أبيض واحمر

وانت اللى تعلم ونا أجهل
من دى الخدود اللى لا تدبل
فيه إيه أجمل
ولا تتغير

ودى العيون الى اشهد لك
دى خلت الطاغى انقاد لك
بها واسجد لك
والمكبر

والشفيتين اللى فالفهم
للابتسام ولا رازقهم
كنت خالفهم
دانت تحير

العبد يعشق بالقوه
كان جهنم ؟ إيه هوه
وعشق لجوه
مخاش معشر

بذمتى انت اللى جاذبنى
وياالى ذوقك يعجبنى
يا معذبنى
لما تصور

لك صنعه في العين والحاجب بها تتعاجب
وتقول وجود الله واجب مين به يكفر

ولك قوالب في الأجسام غلب الرسام
ويقلدك بحجر ورخام يلقيك أشطر

يا ست يام زناق محبوك وقميص مفكوك
حطى على القلب المشبوك إيدك يعمر

ويام نص ملايه حريـر والنص يطير
على الكتاف انا عـلى صغـير غطى المرمـر

ويالى ساقك يسوى رقاب حارت للباب
في لون حقيقته إن كان شراب ولا مقشـر

ويالى خصرك له حركات تقفل شركات
ويضج منها داود بركات لما يحـرر

فوقه الحزام متشعبط فيه النبى شديه
لتحت همسه يا روى خليه يقى محـرر

ويالى خايفه الفرق يميل قامطه المنديل
طيب وصدرك بالهلاهيل ليه متـحـر

وياللي لابسالى جواناتى
فى إيه خفيتى وبينتى
أربعه سنتى
للى ما يظهر

وياللي ابالدراعات تمشى
متشمرالى وما اقدرشى
ولا تسألشى
عالمتشمر

ويام شمسيه يا عايقه
يا مرشقه الوردده اللايقه
على فين سايقه
عالمتشجر

هواكى بالياسمين هافف
يصافح العقده اللافف
وحلق رافف
على دى المنحر

يا مسلماتين الله يا حريم
غيركم أروح ويلاه فى جحيم
أنا مالى غريم
يوم المعشر

الدنيا والنسوان وخلاص
لا طلبه ينفع ولا بلاص
والراجل لاص
لو يتكسر

عليه قفا عايز الخيه
وجتته المشعرانيه
وخلقه رديه
حاجه تقشعر

ولا الشنب والدقن يا هوه
باين وعاييز لعن أبوه
مهما حلقوه
برضك أخضر

العامل المصرى

ليه أمشى حافى ، ونا منبت مراكيكم
ليه فرشى عريان ، ونا منجد مراتبكم
ليه بيتى خربان ، ونا نجار دواليكم
هى كده قسمتى ؟
الله يحاسبكم !

ساكنين علالى العتب ، ونالى بانها
فارشين مفارش قصب ، ناسج حواشيها
قانيين سواقى ذهب ، ونا الى ادور فيها
يارب ماهوش حسد
لكن بعاتبكم

من الصباح للمسا ؟ والمطرقة فىدى
صابر على دى الأسا ! حتى نهار عىدى
ابن السبيل انكسى ، واسحب هرايىدى
تتعروا من مشيتى
واخجل أخطبكم

ليه تهدمونى ونالى عزكم بانى
أنا الى فوق جسمكم قطنى وكتانى

عيلتى فى يوم دفتى مالقيتش أكفانى
حتى الأسيه . ونا راحل وسايكم

مراقص الزنج

فى باريس

تحت فى الظلام ضانصنج يجمع البدور والزنج
مخبوطين بحقنة بنج أحلى من حقن مورفين

بنج من جمال أشكال بنج من نغم شغال
من جعب قصار وطوال مندغم نغم شياطين

ترجف القلوب وتطب والقودود تميل للحب
هب شدوا حيلكم هب يالى فى الميــدان نازلين

طبله العبيد السود دايره والنفير ممدود
خلت ام أجمل عود تنفتل شمال ويمين

تسمع الودع يشن يقلب الملايكه يحن
لا كل عرق يحن فى المدموازيل جوزفين

بالتلات ساعات ولا مل	خصرها انفتل وانخل
واللى يعرفوه رخرين	دوس لى على قل ودل

بالعجل تقول له ألوه	إن نده عليها جادوه
وردى يعجب المجانين	ييقى نخل نغل ياهوه

كل شىء بشىء ينلذ	يرخص اللى كان يتعز
وحده ويش حال المساكين	والله دا الجماد يتبز

كلهم فى ثانيه وهات	تنفتل سبع مرات
كله حلوم الحلوين	همز غمز بالفلكات

أختها الشمال وتميل	ترفع اليمين وتشيل
يختى والعيون ناعسين	عالجدع بشكل جميل

وكتوريس من السربون	واللى حطوا لون على لون
عن عصب أم غافلين	والجدع من الكاميون

بعدما استلم جوزفين	زنحى واستلم جرمين
ساحوا والعييد حامين	راحوا فى الغويط لتنين

فى المهج بفحم عييد	يشعل الغرام ويقىد
بعده بطلوا الكوانين	بدع من أوربا جديد

واللعين إديه بتلف خصر يترعش ويرف
جسمه يتعد ويخف ضوغرى والجميع شايفين

من هنا انتقل لهنالك متحد مع الأفلاك
والوراك تشوط فى وراك والعضل يغوص فى عجين

رقصة الصومال ووداى عاجبه بنت برلين آى
منها لما تعمّل ياي صلب يتفرد ويلين

لابسه روب حرير مكشوف من حروف تشد حروف
لى ماتصلش يشوف يعنى كلهم فايزين

يجعل الكلام دا خفيف على عقله لسه ضعيف
واللى قلبه لسه عفيف يفهم الشرف والدين

العجايز

يا رب سلطان جمالك يتعبد للذات
خالص لوجهك لا للنيران ولا الجنات
لكن عبيدك وخلقتك يعبدوك لغايات
صبحوا ونا عبد منهم كلهم ترسات

التاجر اما افتقر صلى وصام الفرض
والعمده لما اترفت جالك وقع في العرض
والقطن لما اتحرق صاحبه سجد عالارض
وكلهم عالعباده يطلبوا حسنات

ولما قلت اعملوا بالشرع والسنه
أضمن لكم يا عبادى الخلد فى الجنة
جنات بها المتقين بالخور تنهى
قام المريض والمكسح بالسبع ركعات

ونا الى ناوى إذا حققت أحلامى
أحج لك كل عام ماشى على أقدامى
واظبط ميعاد الصلا وامسك على صيامى
وانفق جميع ما املكه فى البر والصدقات

تقصف لى عمر المره لو حصلت خمسين
وعالخصوص لو تكون وحشه من الناشفين
تروق لنا الدنيا ويروق لك كان الدين
والخلق تستغنى عن ماشطات وعن دايات

تبلى العجايز بحمى حاميه تمحيهم
وإذا اقتضت قدرتك إنك تخليهم
الأمر لك بس تطرشهم وتعميهم
انت الى عالم بهم يا خالق الحيات

سبح الخالق

سبح الخالق الى زينها بالجمال دنيا سايبه نسوانها
شوف لي من فضلك الى قاعدالي شابكه بالورده صدرها العالي
وام شعر اصفر انصبغ موده
جل يهوسنا والعيون سوده

* * *

واللي لابسها ربع برنيطه
ثم عاوجاها ثم شبكاها
ثم ربطاها عقده وشنيطه

* * *

طب وشوف رخره خصرها الداهيه
سر متخبى والكفل موهيه
شوف جاكنتها عاليه مشنوطه
قول معي الدنيا رخره مسخوطه

* * *

واللي فستانها وصلتين رقه للفظين شقه والعيط شقه
واللي سرتها باينه منغوزه لو تيجي تقيسها تغرز الموزه

* * *

والتفت حبه يابراهيم يابني
للي عاطيالننا ضهرها المبني
تنقطع قصعه ترمي رجها

قال وعاملانا ساهيه وف حالها

* * *

واللى عاللحم لابسه تنوره ماشيه فطرينها خلق بالطوره

* * *

قول لى مش عيب دا نفتح الباب دا
والعيال قاعده

جران بولفار

شوف الخفه — أم الشعور اللفه فوق اللفه
غير أم شعر طويل
والمقصوعه — ورجلها فوق أختها مرفوعة
تستظر الطومويل
والحرانه — من المعاصم للكتاف عريانه
زى اللى غاسله غسيل
والملفوفه — باين عصبا والنهود مكشوفه
ما خلت إلا قليل
والمختاره — بالشنطه والشمسية والنضاره
رايحه على التمثيل
والغندوره — تحسبها لولا مشيها صنيوره
ولا ام خضر نخيل
طالع نازل — لولا ما هو ماسكه دراع الراجل
من لمسه واحده يميل

يا مصر

يا مصر تتحدث الأملاك بجمالك
في وحى جبريل
من قبل فرعون وموسى الشمس ضاحكالك
في صفحة النيل
حسنك لوحدك لا نسوانك ولا رجالك
من جيل ورا جيل

في وحى جبريل قصايد واسمها سينا
منقوشه بالنور
في صفحة النور مزايا للحياه زينه
قدامها جمهور
من جيل ورا جيل ومن خوفو ورا مينا
وكل طرطور

منقوشة بالنور قراها سيد الإسلام
بأمره مولاه
قدامها جمهور على ذكر الجلاله ينام
والأمم لله
وكل طرطور بقبه أو بنى أهرام
والكل سايعة

ويخترع ملح في عين اللي يتفـرج

على البيرامييد

أو يحسد المنكوبين عالنور ويخرج

على المواليد

عزرائیل

مرکیز اورو باوی

معروج وسبعای

أزرق فرنساوی

فی مجره نمساوی

في النوم رأيت عزرائيل

ضوفره انجلیزی طویل

وناب يشيل ألف فيل

والفم يلع قبيلا

فاشیست طلیانی

من صلب جرمانی

من بمب بریطانی

من دقه یونانی

عليه قميص من سواد

وجنبه منجم حصاد

وف خرجہ زواد وزاد

وَمَعَاهُ خَنَاجِرٌ بُولَادٌ

والوقفہ مکسیکی

من طرز آمریکی

فیہ فحم بلجیکی

یشعل میکانیکی

واقف في نص الطريق

ماسك تليسكوب دقيق

ينظر في منجم عميق

يستثنى إمتى الحريق

قام رد بلغاری

قریت علیہ السلام

طلببت منه الكلام	كلمنى بافارى
شاورت باليـــــــد قام	شاورلى هنجارى
صحيت أنا من المنام	أقرض فى أظفارى

توت عنخ أمون

من عهد ماكتفوك فى القبر يا فرعون
داست بلادك ملل من كل شكل ولون
وخلصوا منا تار موسى وتار هارون
وبعد جور الزمان ، والى جرى فينا
ظهرت لما بقى لك فى المنامه قرون

مش عيب عليك تستخبي نص مليون حول
وكل من جاك بلادك يسأل أبو الهول
لا ييوح بسرك لا بمشاوره ولا بالقول
وجا الزمان اللى يلاقوا المناجم فيه
غير عليك لورد يفتش على بترول

فى مصر كنت الملك لك جيش ولك حاميه
فى دوله غير دولتك ما تعمل موميا
وأمه غير أمـتـك ما تزرع الباميا
ولما خشوا عليك المقبرة يلاقوك
نايم مفتح ولكن فى بلد عاميه

على الرابة :

الشهادة

يقول الفتى المصرى بتاع المدارس	العايق الكتى ، بتاع التيم
يا من يبادلنى ، وياخذ شهادتى	بجليه ، ولا بلطو قديم
واخذ شهادتين ، ابتدائى و ثانوى	ومش عارف أكسب ولا ملهم
تسع سنين اترى فى المحط والشقا	يا ريت أهلى كانوا ربوا بهم
والله البهم يولد وينباع ويندبح	ولا يلزمه غير حزمة البرسيم
باع لى أبويه النص بيت اللى حيلته	وأمى رخره باعت المباريم
سوق الوظائف فى طاهره يا سيده	شبع دوحه واكتفيت تلطم
حافظ بروجرام الصياغه الموضب	توضيب مهندس مستخبى لئيم
يطلع التلميذ بين البنت والولد	لا هو صاحب صنعه ولا هو غشيم
ابعت لنا الفابريك إلهى من السما	هى اللى تغنى فقرنا يا كريم

الحريم

فايقة وزكية

— أنا حافتح شباك يا زكيه	دى طراوه وساعة عصريه
شوفى يحتى الناس رايحه وجايه	والعرييات المليانـه

— حلاوة بيتكم يختى يا فايقه
عالشارع وله شكل وهياؤه
ياما بابقى ف بيتنا متضايقه
كدا وحدي وقعه طهقانه

— الشيخ دابوجه طرابيشي
و حزام متدل دل مناويشي
جاخطبني وبابا مارضيشي
قال مارضيش يسكن ويانا

— شوفي شوفي الراجل يميل
عالشبه الي معاه العيل
وهو بيكلمها المتيل
وهي ردت رخره التلفانه

— وكان بتجاوب بملاطفه
وهي داخله معاه جوا العطفه
يخفي النسوان جاتهم قصفه
نسوان اليوم الندمانه

— ولقندي الي ف إيده عصايه
يعاكس الشبه ام ملايه
جاك نيله دي زي الحربايه
شوف لك واحده تكون مليانه

— ولقندي الي بيدله رمادي
دا يوماني يفوت م النحيادي
مستقل وف حاله وهادي
كدا زي المعزه السهتانه

— وادي جوز بنت ام حسين افندي
أهو دا الي هناك الي معدي
وف صدره المنديل الوردي
يا خسارته ف أسما الصدمانه

— يقولوا الناس دا مغلبها
ومجوعها ومعدنها
وابصر مين كان قال سابها
ومرافق واحد خيانه

— یخی جاتھا مصیبہ ف خلقتها دا جدع یستاهل رقبہا
ہی الی بغل بسلامتها تنظر لفلانہ وعلانہ

— خشی احسن بابا اھو جایشوفنا من راس الشارع یکشفنا
یطلع یشتمننا ویکشفنا وأبات أنا ونتی زعلانہ

الحب

کان الی کان والمستور بان مش یکفی جنان
ما فاضل إلا الحب کان والزمبلیطات

یا قلب بعد ما کنت سعید تعشق وترید
الحب نار لو کنت حدید تصبح ما تبات

دالی جری وصار للعشاق مکتوب فی اوراق
ما بین دلال ووصال وفراق العاشق مات

اجمد شویہ وخلیک صاغ بلا قلب دماغ
دی شغلہ تانیہ وعایزہ فراغ وصفہ الاوقات

یالی تقول الحب نعیم بس انت بہیم
ما یعلمک غیر التلطیم بین الجمالات
حسدت عاشق علی معشوق لو کنت تدوق

تعلّم بأن الحب خازوق مش بلع امهات

ماحد منه بلغ أمله وركب جملة
ياما عمل وبلغ عمله بدع الستات

آه لما تاخذ مره ميعاد وتقف منكاد
تقول ماجاتش البنت ياواد ليلتك حسومات

تقف من اتنين تحت الكن لخمسه ترن
لا ست ولا ستوتيه تحن على الشحات

ولا اما تمحك عالباب وييجى البواب
ويسألك إيه الأسباب لك ست ساعات

يا يقول عليك سافل ملعون يا يقول مجنون
يقي ان ما كان دا يكون دا يكون ضرب مقشات

الحب له تخاييل وأمور وتاريخ مسطور
ودعس كبس من المأمور عالرييات

الحب خلا ناسات سهرت وناسات كفرت
وياما ناس فيه انتحرت فى الدهيات

ومش مصييه اما الإنسان شرفه ينهان
لما يكلم دى الـيسوان بالعرضحالات
نسوان بلدنا بقت بالكوم أرخص م الدوم
والحب راخر صبح اليوم بالكونتراتات

واللى أنا متمعشق فيه وبروحى افديه
ماشفت له فى الدنيا شبيهه ولا فى السموات

من بعد ما أحلف بالله أحلف بهواه
وعشقى له طاهر ترضاه كل الديانات

والقلب دا يا نور العين ما يساعش اتنين
غيرك مـفـيش يام الهرمين معشوق بالذات

بين القبور

ياريس الفن ياسارح بأرغولك طالب من الله
إن شفت بين القبور أطرش ينادى لك أجرك على الله
زمر على بلوتك واجمع هلاهيلك وتوب إلى الله

طالب من الله وليه طالبه العبيد منك يا ليل ويا عين
أجرك على الله لا أجرك على فنك الفن دا زين

زمر على بلوتك الله يزيج عنك يوم الحساب دين

يا ليل ويا عين سهرتي بين تجار النوم
الفن دا زين وغيه بس يرضي القوم
يوم الحساب دين يوفيه الجحود في يوم

أعداء وأحباب عليهم تنزل الشياطين
وتقول ما تتعاب جهنم تحشر الظالمين
فيه الشفيع غاب وأهله في العذاب خالدين
بحكم جبار في سجن من نار
لا ليل ولا نهار

فراق

يا سكندريه
يا نور عنيه
ياللي زايه البحر الأبيض
عالشباب وعليكي يعوض

كتمت ناري
وفضلت اداري
من نهار البين في ضلوعى
عن عيون الخلق دموعى

رأيت موانى
ما شفت تانى
عن يمين ملكك وشمالك
فيه أثر من بعض جمالك

واللي طويته
فراق يا ريته
كان علم يخفق في هواكى
كان فراق الموت وعزاكى

عطشان يا صبايا

عطشان يا مصرين
متعكر ملىان طين
ولا مية نهر السين
نار القلب الحزين
سبحانه رب معين
ظلموني واشكى لمن
كاساتك ملىانين
عشرين عام عاهجين
زغروتـه يام ياسين
وأزور سيدنا الحسين
وإيد الباشا التخين
ولشعبان طيبين
عن كار الجرانين
والكوديه ام اسماعين
واخدم فى الدواوين
وابقى اليه التخين
وبتمشى عالعجين
للغلبان الفطين
من مرسيليا للصين
يعشق بنت التسعين

عطشان يا صبايا
عطشان والنيل فى بلادكم
ولا نهر الرون يروينى
ودموع العين ما بتروى
شده وتزول يا معوض
دى ثلاث حكومات ياخوانا
يا بنت بارس اسقينى
فاضل عالعته الخضرا
زغروتـه يام سدحم
راجع أتوضى واصلى
وأبوس إيد الشيخ بلبع
وأقول سلامات لخليفه
وأتوب على سيدى لاطوغلى
واتجوز بنت الماشطه
إياك يتعدل بختى
والبس لى سموكن مقصب
ياماناس فى نعيم وف نعمه
غيرشى جعلوا التخشيه
يخرج منها ويستوح
دا جازاة الخايب اللى

أهدابها مرعرعين	شاييف من تحت البرقع
وسنانها مهرتمين	ماحسبش حنكها مطبق
والراس دى راس التين	والفم المحموديه
أهل الدنيا والدين	وتحب كان وترافق
ولا يباع الفلين	ولا تطرد يباع رنج
يتعدوا بالملايين	وولادها اسم الله عليهم
بيباعين شرايين	رجالاه وصنايعيه
والتانى بتاع مصارين	واحد تاجر طعميه
واللى بيع سردين	واللى بيع جوافه
قاعد فى وابور طحين	وواحد كمسارى افرنجى
وفنلات معتبرين	واتنين سارحين بكلونيا
له فابريكه كوانين	والحاج محمد برعى
مشهور فى الكعكيين	وأخوه له معمل طرشى
قاعدين متصنعين	والكل يزيد ويبارك
غير قفل الدكاكين	ما ينوب الواحد منهم
إياك نستعين	يا رازق جيش الأزهر

يا مرييه لامرئين	يا باري زيام بلاد بره
شاعر فى الشعر متين	بعثت لك أم الدنيا
وصعايده وفلاحين	يعمل أشعار لبرابره
وخوجات ومفتشين	وتلامذه وأزهريه
فى أزيل المساكين	إياك ما يموتش عندك

(بيرم التونسى)

على الربابة :

فرنسا

قضيت حياتي غريب في أرض فرنسا
ياويحه من يدخل فرنسا غريب
لقت كلام القوم شهد مكرر
لكن عيونهم تشتعل لهالـيب
مليون أوتيل مفتوح يتاواوا جتنا
وخدامـينا ؛ كل واحد ديب
يرجع كلامنا والصلاة على النبي
لرستوران والرقص والتخشب
عشر غيلان واقفين عليهم سموكن
حول الغيلان قاعدين بنات مكاليب
ياما انجليزى انشال بدفتر شيكاته
وياما هندي رجعوه سنديب
دفع الفتى ... خان ملاين رباني
لبنت قرعه ما عليها ربـيب
واللى جرى لفهمى من امرات فهمى
خلت رصاصها فى ضلوعه يغيب
أتعس عباد الله هناك الأجانب
أقـولها والمولى على حسيب

الى دخل بفلوس ، يا ضيعة فلوسه
واللى دخل يكسب جزاه توضيب
يدخل يشوف مالين قزان المسابك
فولاذ مسيح فوق دماغه قريب
عليه رئيس واقف ، وراه الجرادل
شايلىنها من كل الأمم مناكيب
ميل قزانه بالدولاب عاجرادل
كأنه فى الجردل يصب حلب
خمس تلاف درجه ينط شرارها
ويطبخ يخرق أجد المراكيب
ولو تشوف يا خال مصانع غازاتهم
تخفق عدو من غير حروق وحبيب
من كل بير يطبخ « كلور » ألمانيا
أغوط من البركان وأقوى هيب
واقفين عليه أشباح عليهم كاييم
متحضرين للغرف والتقليب
ومن بعيد جاعلين عجوز وعجوزه
فاتحين لوكانه زيهم تخاشيب
مين راح لهم غدوه بنص اليوميه
بشوربه سايطه والفروطه زبيب
ومن أكل يسقوه عصير البتاتى
ومن سكر يرموه فى جرف قضيب

كام مغربى مسلم نطق بالشهادة
وياما جرمن صلبوا تصليب

الامتيازات

المولى ناظر لعبيده	فوق شطوط السين
جانب الجمال بدره بايده	ولا بالاتنين
العسكرى الزنجى يريده	بالقليل بنين
الكل دوله فى توحيده	جات بلادنا السنين
المبتليه بكوئارىلى	عرة الخواجات

المبتليه بيلقانى	نجس البلقان
وكل بلوه سيسيليانى	خاف من البركان
ساكنين لى فى الدور الثانى	وحنافى الكنفان
اشرب ودوق ذلك يالى	تكرم القفوات

اللطخ فيهم بهالتيه	يكسب الملايين
والندل فيهم بسفالتيه	باع لنا الكوكابين
واللى فرش لامه وخالتيه	فرش فى الدكاكين
الله لا يحمى ولا يخلى	يغمة امتيازات

يابو الشهاده المختومه	دكتوراه فى حقوق
مادمت بتقول يا حكومه	شغلى المزنوق

لا عزي أمك فطوممه دى اللي والسده خازوق
وانزل عليك انت بشومه وابعدتكَ للسوق
تشيل مواهى المتولى صاحب الكرامات

داخل لنا بتقل وضجه زى ما تقول هون
وفى المحافل تهجى كلمة السربون
ومن الحكومة تترجى شغله فى الكركون
أو يعملوك يابن الحجه عمدة البجامون
تظبط جنايه وتعمل لى شاميون ناشانات

مونبلييه

زريه متطرفه ، فيها المعيز سايبين
ترعى حشيش المحبه والرعايه غايبين
سبع مراكب بتشحن ، عد بالطزازين
دكتور مهندس محامى والجميع خايبين

دكتور وراجع بلاده ينجد العيان
وهو فيه العيا أربع خمس ألوان
تشليل وتشويش وقول هربس وقول سيلان
يعدى السليم قبل ما يشفى المريض يا شاهين

وفي البلد واد مهندس بس في البوكر
ضاع نص عمره يا ريت كان ضاع في طوكر
له كل أسبوع جواب من والدته مسوكر
تسأل على الهندسه الى اتكلفت ملاين

وواد ييـدرس تجاره ، إنما نصاب
يقبض ما يدفع ولا يحسب لحد حساب
إن جاء مطالب بدينه يلطعه ع الباب
ويقول له خليك مؤدب دحنا مصريين

سألت شيخ الأساتذة في البلد دي سؤال
عن الشهادات الى بنشوفها مع الجهال
قام « شد » عقب السيجاره والتفت لي وقال
« حار الطبيب والأديب فيكم يا شرقيين »

بيطار مواشينا ينفع عندكم دكتور
والبنا ينفع مهندس يني ستين دور
ون شالله يقي الى داخل في بلادكم طور
برضك تجوز له العباده في بني القفاطين

فالحمد لله بقى عاجلتر والبونجور
وعالمونوكل الى زان العور ولاد العور

والفلس والهلل ، والطونجور ، والكونكور
لا علم ناهم ولا أخلاق بقت ولا دين

بردون يا شعراوى

يا بنت باني الهرم	لمى هلاميـلك
والبرقع الى انخرم	ويا خلاخيلك
يكفى لومان فى الحرم	فى قيد خلاخيلك
ماشفت زيك سجين	ساكت ومتـاوى

غلبت اقول للرجال	خلوا المره حره
تحش رخـره المجال	تفهم وتـدرى
العاقله بنت الحلال	مايضرهـاش بره
لكن بتنصح فى مين	روس جامده سنطاوى

رايه ولاد العرب	فى الأرض منكـوسه
طول عمرها والسبب	إحسان ونفـوسه
والله الى قال ما كذب	نسواننا موكـوسه
حتى الى متعلمين	بردون يا شعراوى

جهل النساء بالعلوم	خلانا أنتيكـه
نفهم فى فن الهدوم	رقعه وتشتيكـه
وفى البلد عالموم	ما تلقى فابريكـه

غير فابريكات الطحين فليحي بدرأوى

إن كانت ام الولد في الزار بتبخـر
تجيب حمار للبلد في القطن يتسخر
قبل الحمير يتجلد لو مل واثأخر
وسيد الشغالين هو الأوروبـأوى

من قلة المصنوعات المسعدين قلت
وإيه شوية ذوات بالامتياز زلت
واهل العمل والثبات أعمـأاهم انحلت
أما اللى فاضل متين ده جبل عشمـأوى

يا بنت بانى القصور راجل يناديكى
بينه وبينك سنور مدى أياديكى
وفكى عنه السيور الله يقويكى
وكوفنى إيده اليمين فى اللى عليه ناوى

الفلاح

الأوله آه والتانيه آه والتالته آه

الأوله : عيرونى ، إن . نا فلاح
والتانية : أزرع وأقلع لى نام وارتاح
والتالته : آه اللى احبه شط منى وراح

الأوله : عيرونى إن نا فلاح — بدفيه
والثانية : أزرع وأقلع للى نام وارتاح — فى دهبه
والثالثه : آه اللى احبه شط منى وراح — فى صبحيه

الأوله : عيرونى إن نا فلاح بدفيه — وعيشى حاف
والثانية : أزرع وأقلع للى نام وارتاح فى دهبه — بميت مقداف
والثالثه : آه اللى احبه شط منى وراح فى صبحيه — ما قال لى عواف

الأوله : مش بإيدى دا قضا محطوم

والثانية : ومسيرها ناس تغرق وناس حاتعوم

والثالثه : ميت هم يرحل ألف هم يدوم

الأونه آه

والثانيه آه

والثالثه آه

على محمد شحاته

« ذهب هذا الشخص إلى محافظة العاصمة يبلغها عن وجود مؤامرة لقلب الدولة وكادت وشايتها تنجح وتوضع رقاب عشرات الشبان فى حبال المشانق . ولكن اتضح أنه كاذب » .

فى البلد دى الغل ضارب فى الغرايز والطباع
قول فى نيلها ومنه شارب الأكابر والرعا
هو والله اللى خارب بيت أبوك يا ابو السباع

بالسلاح خلاك تحارب والسبب طورة زتون

البلاد فلاحها قاسى منتقم خاين عويل
بالبلط راسك وراسى لو تقول شيلهم يشيل
قوم وعد ان كنت ناسى كل يوم خمسين قتيـل
لا ، وجانا اليوم سياسى قصده إصلاح السجون

السموم من إيد حريمك تندفس لك فى الطعام
والعيار من إيد غريمك ينبعت لك فى الظلام
والحرامى ان شاف هدومك تعجبه صلى وصام
فى البلد دى مين يلومك لما تسكن فى حصون

شوف على محمد شحاته الفتى العصرى الفصيح
عالمحافظه بالتباته شغل النصب المليح
بالطلاق يحلف تلاته إنه يعرف شىء صحيح
الجدع غاوى الشماته واللى يبقى يكون يكون

بص شاف الدنيا عامره ماتداريش وش الغراب
حب يشعل فوقها جمره يشوى فوق منها الكباب
قام وبلغ عن مؤامره تجعل العامر خراب
إن خسر يخسر مقامـره ون كسب يصبح قارون

ناس يقولوا حكمه صايبه كل شرقى له راسين

راس عديمة الفائدة خايبه ماتساو يش الصرم مستين
والكبيرة تجيب له نايبه تستحل الأخضرين
يا على دى حكمه غايه عن كاموخك والعيون

كانت اليوم المشانق تشتغل لو صدقوك
وانت فى النسوان تعانق بالفلوس لو أتخفوك
تنفشخ وتقوم تخانق فى العباد لو وبخوك
يعنى قال لك زهر زانق يجعلك فوق القانون

الاختلاسات

يا واد يافندى الديوان معفن من كتر ما بتحشى فيه وتدفن
حايظبطوك عن قريب مكفن بسرقتك والخنوط عليه

اتوسطت عمتك حنيفه وخلتك ام ابراهيم ظريفه
لحد ما البينه عطاك وظيفه يادوب عشان تقبض المهيته

جيت إنت يا دولة الموظف بدل ما تهتم أو تنصف
بدت لنا تختلس وتخطف من مال جناب أملك المالىه

الهف وشيل فى الفلوس يا شاطر وشغل اللحس فى الدفاتر
دا كل راجل شجاع ، مخاطر والجبن للطفل والولىه

اسرق يا مجدع وخد عنيـنا يا مضحك الإنجليز عليـنا
مادام دا عاجب أملك أمينـه اعمل خلاصك يا نور عنيـه

في مصر أربع تلاف محامي أشوف عددهم أقول يا حامي
أتارى فيه مليونين حرامي وكل واحد عليه قضيه

ياواد يافندي العقاب قريب في ذمتي انك عملت طيب
لا بد من يوم يجيك يشيب سعيد يزحك من التكيه

إن كنت تسرق دى حسبه واهيه اسرق وخليك تروح في داهيه
تصبح بيوت الحكومة زاهيه من خلقه المجرم الرديه

إن كان يحب الوزير يوفر يقوم يراجع في كل دفتر
يلاقى نص العـدد وأكثر يستاهل الرفـت والأذيه

لو نربط الخبص والرشاوى نرتاح من الصرف والبلاوى
ولما قال يرفعوا الدعـاوى يبقى اللى يحكم تجيه رزيه

داجيش يا عالم بألف فرقـه بتنصرف له الفلوس بحرقـه
للـه في للـه كان وسرقـه اللـه يخيب دى فنطزيـه

ناظر الوقف

يا ناظر الوقف ! من رب العباد ماتخاف
ولا المحاكم بتملك منك الإنصاف
ون كنت اجازف وأقول ان البعيد خطاف
أطلع أنا المعتدى وانت من الأشراف

الوقف لك مملكه والعدل عنها غاب
لا برلمان يخضعك فيها ولا نواب
عشر سنين ونت تبلع لم حسبت حساب
والمستحقين وراك ما يلتقوا عيش حاف

أول سنه رحلت لك قلت اما اوفى الدين
تاني سنه قلت لي جارى صلاح العين
ثالث سنه رحلت انا حجيت وزرت الزين
رابع سنه رحلت لك كنت انت فى الأرياف
خامس سنه خمست عالمكمه خشيت
لحد قاضى الشريعه عالى بساط وبكيت
طول لتاسع سنه جبل القضيه ياريت
سلمت أمرى لربى ، خافى الألطاف

يا ناظر الوقف خلّيت العباره خل

ونت اللي صبحت وقف المسلمين ينحل

بكره الأيادى الجديده بالفلوس تنبل

ويسر سبوهـا على أروام وبنسيونـان

البرد

ديسمبر يناير شهـور الجواز يا بخت اللي قبض ودخل وفاز

يشوف الليالى السعيدة اللذاذ ليالى الغطا والهنا والسرور

تفـنـطـز وتنفـد من الزمهرير وقهوة متايا ام بربخ كبير

ولا يصدمك فى طريقك غفير عشان التحرى يجيب لك طاـبور

تحضر لزوم الوقود والكوريك وتاخذ مراتك وتقفـل عليك

وقلع ودلع ومتع عنـيك وقولة مراسح مكاسح تغور

إذا المولى وفـق وكان المزاج مذكر مؤنث وفيه امتزاج

لتشهد وتختـم بأن الـزواج فيه الحظ أكثر فى كل الأمور

وحاسب لتسمع كلام الشيطان وياخذك معاهم حسن وسليمان

لتدخل فى بيتكم مره من الجيران بواد بغل بالغ وناقصه الظهور

يوز الوليه الشيطان اللعين تروح لاعبه (بصره) مع السهرانين

ولا بد دول يقعدوا مقعمرين وإحنا ف زمان المودات والسفور

تنام الكبيره وييقوا الصغار
ضرورى الى يكسب يا سيدنا الحمار
طاوعنى اما يدخل عليك الظلام
تأفين ، تسيح ، تهجص ، تنام
في إكشف وشيل والولد في القمار
وميت ألف راجل يساعهم ماجور
تحبش بضاعتك وتدخل قوام
مفيش في القهاوى خلاف الشرور

مفيش في القهاوى خلاف الدقون
وخلقة مخالى الى عنده الزبون
وسحنات جاموسى لازمها القرون
خروف يومى يقبض عليه العشور

الخدام

حادثة حقيقية

من كان يتيم ضاعت أهله في البلد دى اهو ضاع
واتمد من ضعفه وجهله بالليالى وجناع
لو كان أسير كان على مهله للذوات ينباع
لكن أهالى بلاد حره شغلوه خدام

وقع في إيد جلف جعيدى عندهم أطيان
جحلوف وينقال له يا سيدى ما اسعد الخرفان

إن حط في جيبه الميـدى ما يجيـوش شيطان
أخذ الولد من غير أجره لو سألت بكـمام

تلقى الجعيدى في جميعه في عماد الدين
ليلاقي سكر وتسليه سحت ع الوارثين
يوم خش بيته الصبحيه كان مدرمـغ طين
غير المعاجين والخمره كان شام له جرام

دعبس في خرجه وهرايده ما التقاش مأكـول
عطا الولد نكله في إيـده قال له هات بدى فول
قضى الولد شغلة سيده دالى كان مصطـول
وجـاى داىخ من بره ينقلب وينـام

شمشم وقال لأسير بيته هات قزازه الـزيت
راح الولد جابها يا ريته كان كسرهما يا ريت
صار اللى لو كنت رأيته كان ياشوم ما رأيـت
شوف إيه بتعمل في الأسرى أمـة الإسلام !

أم الجعيدى الزهلانـه يعنى ست الـدار
فايته القزازه عريانـه خشها صرصار
وحولـه عشرين دبانه غير وسخ وعفـار
كاسى القـزازه بالمره من ثلاث أعـوام

مسك القزازة في يمينه والوليد في شمال
وراح كاسرهما على جبينه قال جزا الإهمال
زعلان وطالع قال دينه حضرة المفضل
فاكر دماغ الواد جره أو فاكرهما برا

نسايي

ناسبت واحد مقاول اسمه نصر ياسين
وله قراب وببت في عطفة الكوانين
وله تداخل مع العالم شمال ويمين
وحاجة عقبال أملتك . إنت والسامعين

بعد الفرح ما انتهى ألقى العروسه عداك
واللقمه بالغصب ما تنزل ولا يخفأك
قعدت اشم اهوا للصبح في الشباك
وابص اشوف لك نسايي في الندا جاين

عديت حذاشر مره بالعرض ماشين صف
محمرين الخدود ومخضين الكف
أما البراقع كريشه والملايات لف
وكل واحده ، معاها ، عيلين حافين

(بيرم التونسي)

وكانت الساعه ٦ وقت دى بالضبط
ودوروا الهبد فى باب العريس والخبط
فتحت لهم بنتهم نزلوا عليها عبط
وبوس وقالوا انتو لسه ادلعدى نايمين

دخلت حماقى مع مراقى ؛ وجم عندى
قالت صباحك لبن يا مصطفى افدى
قومي يا بنت البسى فستانك البمبى
واتزوقى وورى روحك للمهنين

قالت لها بنتها : دول غرب ، يا خراي !
دي مين دي يا اختي اللي لابسة البدلة عناي
ومين دي رخرة أم بالطو كبه سنجالي
والتانيه ديه الى قاعده بالمقور مين

قالت لها الأوله ، أم ابراهيم صبرى
والتانيه تبقى حماة خالد على البدرى
وجات معاهم مرات عبد المجيد قدرى
والباقى خالتك وعماتك ، وناس تانيين

راحت معاهم العروسه والمجال عقوده
عالضحك والانبساط واللى يعيدوه يزيدوه

ووقفوا الى المنبه والدومان كسروه
لغاية الضهر ناس راحم ؛ وناس قاعدين

الى قعد ، م الجماعه ، كلهم كراكيب
الى قرية العروسه ، والى جوزها قريب
جاين يشوفوا العدل والفرش والترتيب
ويشوفوا وقعتها حلوه ولا زى الطين

قالت خالتها عطاكى كشف وشك إيه
قالت لها حظ لي خاتم ذهب وجنيه
قالت يا خيبة الأمل ، خاتم ذهب ، أحيه
أقل من جوز أساور بنـدقي تسعين

قالت لها أمها : آدى الى انا حاسباه
من قبل كتب الكتاب قدام ياسين قايله
نهايته قسمتها بس القصد كله هناه
وقولة الصيفه تدبر ومش عايزين

دى بنتى ونتى الى عارفه ، واحده العيلة
لا من قهرها ولا من خضها ليله
حاحرب عليها ؛ دى تبقى والنبي ميله
خليه بجملته شوارها الى أخذ ملاين

وبنتى يا ستى ام سالم أصلها طلبه
من الخميس للخميس ، بفتح لها العله
ومن الشتا للشتا ، أعقد لها الحلبه
واحط فى زارها بالخمسين وبالسنتين

فى الوقت ده كنت انا عدمان فى عينى النوم
من السهر والقرف والغلب طول اليوم
غفلت لحظه وصحافى هياج القوم
ساعة ما كانوا الجميع من غير سلام نازلين

بيت رضوان

سكنت بيت جوا حاره اسمه بيت رضوان
فيه كل ما تشتهيه ، الفشه والمصران
من الصباح للغروب ، أهجم على الدبان
ومن الغروب للصباح ، أجرى ورا الفيران

فى أول الشهر صاحب الملك وصافى
على الملاقى وحفظنى وقـرانى
قال اوعى حاسب تعيد الحظ من تانى
لأن يوم طب فيه واحد وكان سكران

رضيت ، ومن يرضى حتى بالعذاب يرتاح
وفضلت وحدى ، ماليش صاحب غير المفتاح
بعيد عن الشر ، جاني أول استفتاح
تهممة غرام ، وادعتها أوحش الجيران

جاره عجوزه ؛ ولكن عايقه غنـدوره
حاطه السنان الذهب ، والقمطه عالقوره
أولادها جدعان تمانيه والبنات طوره
وجوزها مستهوى مقطوع النفس دهبان

الست بتحب سرا ، واد مجاور شيخ
يومى على الله ، تدخل له ، بصحن طيخ
راخر يجيب الهديه ، م الأجازة فسيخ
لا القرع يظهر ، ولا قشر الفسيخه يان

أما العذول اللى شابف دى الغرام جاره
عرجه ، وفوق ضهرها ، كمبور ؛ ومكاره
خلت فضيحة الوليه شايعه فى الحاره
وناويه تصبح تبلغ جوزها فى الدكان

سمعت رفيقه المجاور دى الخبر فى الليل
وجوزها داخل ليلة جمعه ؛ وعنده ميل

شهقت ومالت ، ودبت صدرها بالحيل
قال جوزها مالك ما هي الدنيا بخير وطمان

قالت جابو لنا جدع عازب وحطوه فوق
جدع يابو فرغلي ، بارد ما عندوش ذوق
تبعنى نوبه من القلعه لباب اللوق
نهار ما حببت أزور البنت فى حلوان ،

الليله خلانى قاعده بالقميص المور
وهو عالبسطه فى الضلمه ونا فى النور
دعس عليه ؛ لا يا سائر ولا دستور
مالحقتش اتغطى والبارد ضحك لى كان

إهى مهى ! ينضرب قادر ما يوعى ييات
إهى وينشك فى قلبه ولم يتغات
وينضرب زى ما خلانى قاعده وفات
وشافنى من فوق لتحت الصايغ الندمان

سمع صاحبنا الحكايع ، تنه طالع
على السلام وعينه فصها والع
خبط فتحت ، القى ده راجل كبير قالع
وماشى حافى ، وفى إيده عصا خرزان

أول ما شاف وشى قال يلعن أبوك خنزير
وأبو اللى جابك هنا ، عبد الله أفندى بكير
وأبو اللى ييجى يحامى لك ؛ كبير وصغير
بارد قليل الحيا ، دمك صحيح هربان

عشرين سنه ، مابن آدم شاف حريمى يوم
وبيتى جامع ما فيه غير الصلا والصوم
حتى البنات والعيال عايمين على دى العوم
وازاى ما تدخل فى بيتى ، والحريم عريان ؟

اطلع لى لسه كده بره ، ونا أوريك
واجيب لك ابنى الكبير عبد اللطيف يعميك
وابنى كامل أفندى ، فى البوليس يأذك
تفيت وقلت استعوذ بالله من الشيطان

على إيه يا عم البوليس والخوته والهرجه
أحلف يمين انى فى الدخله وفى الخرجه
ما شفت فى البيت دا عمرى غير مره عرجه
وواد مجاور بجبهه أصلها ققطان

ردت وقالت لى منك يا جدع لله
إنزل يابو مصطفى دا شغل انا عارفاه

انشالله من جاب فى سىرتى ينضرب فى حشاه
وتخوض فى دمه اليهود والمسلم السكران

نزل وقال حابقى اشوف شغلى أنا بعدين
واجعص جعيص يتسم لك ولا يضرب عين
عن إذنى حطى صوابعك فى عنيه لتنين
بقول على علو حسى ، قدام الجيران

ركاب سوارس

ركاب سوارس بعيد عنكم شلق هلافيت
والعبد لله معاهم وبين حنت حنيت
أول ما نركب يدور القفش والتنكيت
ون طالت السكة نحكى لبعضنا حواديت

قصدت يوم الحسين أشرب هناك خروب
جات قعدتى بين جدع عايق وبين كركوب
وشبته فى الوش قاعده وابنها المقلوب
بيعوى زى اللى راكبه ستميت عفريت

طلعت لنا شبته بص لها الى جنبى وساح
طلع كان بعد منها شيخ بلد فلاح

بحمله خرجين وموهيه حطهم وارتاح
قال العجوز الى جنبى سوق بقى يا بخت

القفله سارت تلملم ، كل صنف وصنف
فى خطوه والتانيه يتشعبط علينا جلنصف
وواحد فى حضنها قرطاس يرك الأنف
قرطاس ملان بالكلخ والعكنه والحتيت

يا خلق لسه الولد نازل بكاء وعياط
والوش غرقان لشوشته فى عماص ومخاط
الحلوه قالت لأمه : يختى إبنك شاف !
قالت عايزنى اشترى له ادلعدى كتاكيت

قال الافندى هاهم ، إبنك دا طالع ديك
والحلوة قالت هى هى ، والديك مالهش شريك
الأم قالت دا بختى فى العيال ، دا عاديك
دايما ماسك لى الصوت . قال دازمن تصويت

الجلوه ساوت هدومها ، يعنى انا نازله
لفندى بالمثل ساوى البلطو والبدله
وقف سوارس ، ونطت ستناء قبله
والواد ورا ، والجماعه دوروا التلفتيت

كان في الجماعه جدع أحق ، نطق في الحال
وقال تمام يا غجر ! معلوم ! تمام ! امال !
إتقل يا واد ، مش كده ! بزياده يختى دلال
آه يا غجر يا شلق ، يادون يا عكاريت !

قال له العجوز يابنى خلى الخلق للخالق
قال : انت مالك يا بارد ! قال : حاتتخانى !
مهو انت اهو في اللى جنبك متغرز زانق
كان حد قال لك إحم ، أو حد قال لك كيت ؟

أهل الغرام حودوا ، والعطفه دارتهم
وأهل السوارس في حسرتهم وغارتهم
ناس بالسلام في الزقاق لاهيين في حادثهم
وناس على الحادثة ذاتها ؛ دوروا الشلايت

قام رد شيخ البلد يا جماعه ياهوه
بدل ما تتخانجوا ، كنتم عنها تحوشوه
عبال ما تهرب كده ولا كده ؛ أيوه !
لو كان دا في الفلاحين ، كان كلها بالنبايت

قالت له أم الولد : أهل البلد عايبين
يا سيدى تنبع في حسك ؛ واللى يسمع مين

رايح تزور الحسين ؟ قال والله اهو رايحين
منها زيارة ، ومنها مشترى ، ومبيت

شيخ البلد في الخناق ، راخر لحم واصطاد
في هيصة العرکه ، أعطت له الوليه ميعاد
نزلوا الجميع الحسين ونزلت انا منكاد
نازل لوحدي ، ولا صيده ، ولا تزفيت

تاجر دقيق

تاجر دقيق أنعم المولى عليه وعطاه
ودخله في الطريق الأحدي وهده
وخش في الدنيا واتجوز في عز صباه
وبعد شوف البكارى ، حج بيت الله

التاجر اسمه حسن من يوم ما أهله جابوه
لافي مصييه ولا في مدرسه ودوه
لكن فقط عالعاشوره والطبيخ ربوه
طلع تقول بكر شامى جل من أنشاه

وكان خليفة الطريق عامل صاحبنا وكيل
موكله عالرايات الخضر والقناديل

راح الخليفة من الدنيا وقال يارحيل
وسلمه كل شيء من بعد ما وصاه

فاتت مراة الخليفة نوبه عالمكتب
شافت دا قاعد بشيسته يحسب المكسب
ونوبه مطرح راجلها ماشى فى الموكب
بين الشموع والرايات زى القمر فى سماه

حبت نظيره ، وقاست فى الغرام شده
وتسهر الليل لا مسند ولا مخده
ماصدقت لما فاتت مدة العوده
إلا اما باتت على أم العيال واخذاه

حسن بحسب الشريعنه قسم الكيله
صبح ييات عن دى ليله ودى ليله
يخلص من الشيله يمشى يلتقى شيله
والعز ما يحرملك من نعمته قواه

جات يوم لسيدنا مره . لكن مره خفه
من تحت برقعها بان السن والشفه
نادره تطاهر محمد ابنها بزفه
قدامها تمشى الدلائل والخليفه وراه

قالت له يا دلعدي عابزك تمشي له
موكب من الناحيتين تولع مشاعيله
وعابزك انت اللي تمشي جنبه وتشيله
دا ابني البتيم اللي انا من ربنا شاحناه

قال للمره : انتي أختي : والولد إبني
وحياتك انتي ان ما كانت زفه تعجيني
أعملها من عندي نقطه ، شيء ما يخربني
ما بقاش حسن ، غير ما اجيب لك كل شيء عابزاه

قالت ما يلزمنا غير رؤياك وسلامتك
واكون أنا رخره محسوبتك وخدامتك
ولك حلاوتك كوفيه تستاهل قامتك
وفوقها منديل حرير ، يدي أنا شاغللاه

زف المظاهر وجاب نقطه فوشيك وشموع
وامتنى لما المظاهر فات عليه أسبوع
انجوز ام المظاهر رخره ، والموضوع
كمل بحمل التلاته ، والتلاته معاه

كانت مراته القديمه خلفت ولدين
وجات مراة الخليفه خلفت بنين

وام المطاهر كان واحد بقوا لها اتنين
والتسعه زى العلق متعلقين فى قفاه

والعزده لما كان حال الدقيق ماشى
والناس تفتش على اللقمه ما تلقاشى
اتغير الوقت والدنيا ما منهاشى
اتبدل البدر ، واتضعع زحل فى علاه

وابو على كان ضاربها ستميت جزمه
ولما شاف الكريزه ، والبلد أزمه
صفى التجاره ؛ وحضر بنكنوت رزمه
وحصل اللى فى وش البركه تستناه

عايقه وفاتحا لها منزل فيه سبع شبات
فيهم مره حازها صاحبه ، إسمها نعمات
أخذ حسن يوم معاه حلفت عليه ليات
من غير فلوس افتكر إن المره حابه

والصبح شالت معاه الشنطه والخاتم
والعايقه لما بدت كان سى حسن خاتم :
شال الفلوس عندها فى الليل وراح خاتم
صبحت فلوس سيدنا ميرى ؛ والمره طارده

قعد في خان الخليل لما اتفلس حاله
ما عنده غير التلات نسوان ؛ رسماله
يا بخت من كانت النسوان ساعباله
مطرح ما يخرج فلان يدحل يلاقى عشاء

وقول يا بختك بنسوانك يا حاج حسن
الناس ليالها سوده ؛ ونت ما تحزن
تلات حلل قوم وضبع في الطيخ واتخن
غيرك له حله مفيش غيرها طيخها عماه

أم فايق

ستى ام فايق ربنا يخايها
هانم وقيمـه اسم النبى حوالها
آدى الكتاف والصدر مبنى وفوقه
قمر منـور والمصاغ فى إديها

جوز ام فايق خدها تالت بختـه
فى العمر تطلع ست مرات تحتـه
لكن على دى السن شافت راحتـه
راخر بدمـة ربنا مهنـها

اتحال صاحبنا عالمعاش واتكعـمش
لما بلغ ستين سنه واتكـرمش
والست لسه فى الفراش تتقـرمش
يسد جوعه كل محروم بها

فى الفجر ابو فايق من النوم يصحى
يخرج يصلى فى يمينه السبحه
بالجليه والعبايه الفاتحه
وفى الضحى يرجع ولم يلاقها

يقول لجاره سالم الفكهـانى
إن جات مناسبه : حرمتى عاجبانى
كان أنا اما شفتها موافقـانى
تخرج ، تغيب ، تقعد مخافشى عليها

قالت له يوم يادلعدى يابو فايق
من قعدتك فى البيت كدا تتضايق
أديك بقيت دلوقت فاضى ورايق
قوم بيع معاشك والخرابه ابنها

قال يام فايق دى الخرابه كبيره
تعوز دواهى متلتله وخميره

أما المعاش ينباع بحسبه صغيره
يا دوب إذا قمنا الجدار يكفينا

قالت أيع كل المصاغ وأكمل
وارهن نحاسي واستلف واتحمل
واجيب مقاول ياللا واعمل تعمل
تصبح عماره اسكن واسكن فيها

قال انتى طول عمرك مره داغونيه
ما حد يعرف لك ضمير ولا نيه
هلبت مانتى محوشه النقديه
وبتدعى لى الفقير وتخيبها

روحي اعملى قصدك ونا وياكى
مطرح ما تمشى بالأمانة وراكى
حيث ان مسأله البناء عاجباكى
من بكره ياللا بالعجل هديها

الشمس تطلع وام فايق تشرح
والناس بتخسر وام فايق تربح
إن أوحشت مطرح تانس مطرح
ترجع بخمسه جنييه ولم يرضيها

(بزم التونسي)

سحبت مرات عبد الحميد وبهيه
وبنت خالتي ام اسماعيل نبويه
ومرات أمين الجزمجي فوزيه
كانت تقاسمهم — غير اللى يجيها

سكنت فى حارتهم عروسه جديده
من بيت اكابر فى جمالها وحيده
جوزها وكيل دايره صفاته حميده
نادر مثاله فى الرجال يقننها

يوماتى تدخل للعروسه طوايف
بتفرجوا على فرشها الهايلايف
بدع خلقها ربنا وتحاييف
إيد المنجد طرزت حواشيها

عاش العروسه والعريس فى هناهم
يهف من روض السعاده هواهم
تارى ام فايق دى اللعينه وراهم
ناويه تجر البنت ، وتمشيها

أول زيـاره استوثقت لك منها
تانى زيـاره وشوشت فى ودانها

تالت زياره ععبتت مصرانها
حلفت نهارها البنت لا تغديها

خش الافندى ، كان نهارها القارحه
بكمام مغطيه الإدين وبطرحه
دخلت على الراجل بلهجه وفرحه
قام انشرح صدره ورحب بيها

كان الكلام بين المره والهانم
إن خش جوزها عن بضايـع غانم
ون راح ، يدور شيء ربنـا به عالم
قال الأروبه قصدهـا تسليها

قالت لها لو شفتى يختى شعورهم
الصفـر وفصوص الفروز دى عيونهم
والدم دالى ينشرب فى خدودهم
وجوه جميله ، والتراب يتاويها

دخلت نوبه ؛ كان ظابطهم فايت
قال لى : سعيدة قلت له : جود نايت
قال انتى حلوه ! قلت له : أول رايت
طلع لى خمسه جنيـه ورق وراميا

الست تسمع دى الكلام تتكيف

والوصفه تعجبها ، وجوزها سفيف

دخل ساروخ الحب فيها ما هيف

نار الفؤاد يا ناس دا مين يطفها

قالت لجوزها نفسى افصل بدله

من نوع بدل بنت ام فايق نظله

مفصله لها بدلتين عالدخله

خياطه تباس والنبي أياها

قال الوكيل حيث البدل عاجينك

خلى ام فايق ترشدك وتعينك

عشان عارفها حرمه جد تصونك

تمشى مع بنت البيوت تحميا

يوم الميعاد راحم ونا بالخطوه

تابع أشوف فين راح تاخذها اللبوه

من مصطبه لشارع لعطفه لقبوه

نقدوا على دائره « أخينا » كارها

عاملها من ضيقه خيامه معسكر

خمس تلاف « جون » يسكنوها وأكثر

وف بقعة خاليه عالولايا تستر
غير النسا البواب ما يعديها

فانت سنين الحرب . واللى انقادت
اتطلقت — أما الخرابه — اتعادت
طلعت شفيقه الحج بعد ما تابت
وعدها ريع العماره كافيا

في التربه حطت ثمانيه

لو شفتي يا نظله هانم خالتك ام رؤوف
والموت بيحرف عيالها بالجاروف ويحزوف
في التربه حطت ثمانيه جنب بعض صفوف
وادي اللي فاضل على اديها ولـد مقصوف

جابت في أول ولاده البكرى في شعبان
في النص باين ، وقام كمل يا دوب رمضان
تعالى قال دغدغى له الكعك دى الغلبان
ما بات بعيد عنك إلا في الكفن ملفوف

والثاني كان كل لحظه تعطينه البره
ولما يصرخ تهزه ستميت هزه

راح من إيديها على التربه ، وله حزه
عالبطن والركبتين ، من دى القمط الصوف

والتالت الى حى لما بلغ سنتين
فايتاه موسخ وقال خايفه عليه م العين
يقوم على إديه ويتدعور صلاة الزين
شاف لك وابور الطيخ والع وراح محدوف

وعاش لها الرابع اتناشر سنه بالزور
باعت عليه الأساور فى علب وبخور
طلع عداكى ، بليد ، ألدغ عيط مطيور
يوقع القرش ويقول عالحمامه خروف

استنظره الموت وفى العيد الكبير جاله
فى اللحم لما حشر من كل ما طاله
أكل فى بيتهم وبیت عمه وبیت خاله
ويعيد غداه ، كل ما يدخل لأهله ضيوف

والخامس الى طلع لك من أخوه أعبط
فسد وخاب ياتشوفيه فى البحر يتلعبط
ياعالترموای بيتقن زح ويتشعبط
وصل الخبر للممره : إن ابنها منسوف

أما رؤوف اللى كانت كل يوم توصيه
إذا أبوه يسأله عن أى شىء — يخفيه
كبر ، وكان ان طلب حاجه ، ولم تعطيه
يدغها العلقه ؛ والسيم القديم معرروف

ولما كان الولد فى نشأته كذاب
والكذب دا يخلى صاحبه فى الكبر نصاب
رؤوف فى كل الصنایع والوظایف خاب
طفش على الكمبو ، مات ، ويا اللى ماتوا ألوف

قلت لها يادلعدى العيل إذا كتر
من اللبن يتعجم ، ويش حال إذا اتظفر
قالت يا شيخ كل شىء مكتوب ومقدر
قلت لها طب والحجاب؟ قالت دا شىء موصوف

قلت لها لما الولد يكبر ويتدحـدح
خليه بعيد عن فراشك فى المنام أصلح
ليقلدك إن فضل جنبك فى قولتك ...
اتسهلت بختى واتمايلت وقالت شوف

يا نظله هانم ، فى نسواننا أنا كلبيت
حتى الشتيمه بعيد عن ستى ما خلبيت

قصدي صلاح النساء والعائله والبيت
لأن نسوان بلدنا رجالها قحوف

تاجر خضار

أهل المعارف يقولوا الناس بالمقامات
لا بالملابس ولا بالأكل والركوب—
كام من غنى بالأدب لابس هدم شحات
ومن غجر في البلد دي واسمهم بهوان

رأيت ركوبه بتمختر بواحد ييه
راكب ، وراشق في ظهر العرجي رجليه
سألت من تخن صدغى أهل حارته عليه
قالوا : دا تاجر خضار عنده سبع عتبات

جميع خضار البلد من قرع وبدنجان
والباميا والكرنبيت واللفت والشنوان
تورد على مكتبه بالجمله م الغيطان
وهو نفسه اللي يعطى لبتوع الخضارات

تشوفه قاعد بشيسته ويا فنجاله
مركون على خزنه مقفوله على ماله

يؤمر وينهى وتحت الأمر عماله :
كاتب معاه الشهاده ، واربعه فتوات

اليه دا كان م الجعايده المجرمين سابق
وله علامه ، على إيده اليمين دافق
ولما فات الهجص والصرمح رافق
في سوق خضار مصر بياعة بلح أمهات

واليه جميع الخلايق تعرفه في مصر
لوما الملامه لكان خلا المره في قصر
لكن في روض الفرج يومى ياخذها العصر
يطلب له شيشه ، ويطلب للمره شربات

تقعد بشقه وتعطى وشها للبحر
ماتشوفش من جسمها غير البزاز والنحر
في كل يوم عالحلادى ، لما فات الشهر
زاد الغرام والمجانسه استحكمت حلقات

قالت بتاعة البلح لليه ما تحكى لى
حبك داحب الهوى ، ولا فناجـيلى
وقت الغرام فى المسا تبعت تنادىلى
والصبح ما تقول لى لا اشحالك ولا سلامات

قال كل شيء تطلبه يا مسعده موجود
والمال دا كله ما يبعد عن عنيكى السود
مين فى وصالك بجلده والسقط ما يجود
لكن أنا قصدى أسمع بس قوله هات

قالت له مات عندنا فى السوق جدع سماك
عايزين يبيعوا محله فى الدلاله عداك
ان كنت قصدك تاخذنى عالدوام وياك
الصبح خد لى محل الراجل الى مات

وتخط لى فيه ولو حملين خضار ، اتنين
أتسلى فيهم واطلع منهم القـرشين
وادفع مقدم ما اخلى لك عليه دين
ون زاد حسابك أحول لك به كميالات

ماجا الصباح ، إلا كانت مسعده التشه
على المحل الجديد بتـنش بمنشه
قدامها دكان لواد عايق بتاع كرشه
بينه وبينها علايق من ثلاث سنـوات

كملت حظوظ الصبيه والواد الصبوه
فى ساعة الظهر عنده ، يعملوا الغدوه

وفي العشا عندها تتحضر العشوه
ويقفلوا الباب عليهم لما ينووا ييات

فات صاحب العزه ليله يضرب الطالع
شاف المحل اتقفل والنور وراه والبع
بص اتقى الحرمه قالعته والولد قالع
هبد على الباب بالقوه خمس هبدات

فتحت قوام قال لها : هاتي الحساب هاتي
أنا االى حزنك وبديتك على مراقي
وأخرتها خنتي ورافقتي الكراشاتي
آدى جزاة كل من يستأمن اللبسات

وخش في الحال لخصمه بالقلم وعطاه
راخر نهض له بعزمه ، باليونيه رماه
فقت بصوتها المره جاها الشاويش ومعاها
شيخ الغفر ، والغفر ؛ جروا الجميع بشمات

اليه عشان رتبه العاليه أكل كام كف
والواد في بوكس الفتوات اتحدف لك حدف
ومسعدده تبات وتصبح تنبعت عالكشف
آدى تجار الخضار ، ان أصبحوا بهوات

جوز فهيمه

لما انعدم جوز فهيمه السيد الجزار
جابت لها الخاطبه بالقيمه جدع نجار
وشيخ بلد من معينه وله دوار
وعسكري مراسله ، وتنقى بقى وتختار

قالت لها أمها يكفى بك ونواح
وياما دخلى وقاسيتى من الى راح
إن كان قسم لك رجال ، ياللا خدى الفلاح
الفلاحين قيمه وفلوسهم يابنت كزار

الخاطبه دى الى سعت ، فى السعى ما خابت
والشغله ما عوقت ساعتين ولا غابت
قامت تشحتف وراحت بالعجل جابت
شيخ البلد م اللوكاندة دى الى جنب البار

دخل قلع بلغته ويقول يا عوافى :
وشلح العرى يخطر عالسباط حافى
حس القدم بالسباط ناعم كدا ودافى
قادت فى جسمه وطلت من خدوده النار

قالت حماة القفا يسعد يا عمده مساك
والمولى يجعل فهمه من عضاك ونساک
يا هل ترا ، راح تاخذها غالبد وياک
ولا ليالى الوصال ، تبقى هنا فى الدار

جال اما اجول لك وصلى عالبنى جبله
آخذها إذ إن هيه بالبلد جابله
واجيبها مصر اما تبجى منى انا جبله
آخذها شبه ؛ وترجع لك جاموسه عشار

ردت فهمه وقالت من ورا الدرفه
قولى له يامه : دى رخره قصدها الخلفه
فى الشهر ليلتين إذا بات عندنا يكفه
ووقت ما يهفى أرحل له عالـدوار

شيخ البلد قال : ونا جابل بدى المشروط
والمهر جبل الكلام عشرين جنيه محطوط
عزهم حج فسحه أو تمن زعبوط
ولا نجول جطتنا ؛ خس السنه جنطار

راحت فهمه على العزبه معاها العفش
منفوشه فى الجلبه والملايه نفش

قعدت سبوعين وعادت تاني ليه مااعرفش
ما يعرف المسأله غير عالم الأسرار

رجع يقول للمره : ازاي تغشينا
وتجولى إن العروسه : بيضا وسمينه
ولما خشيت عليها ، الجاها سردينه
وناويه جال لسه تجطع لى كان إنذار

راحت معاه المره فى البيت لحماته
يايقطعوا العرق يا تصالحه على مراته
قالت فهيمه القضييه ماشيه وحياته
عند الأبوكاتو ونهارها حايقى نهار

قالت حماته ياعمده ! مش عشمنا فيك
البنت من قبل ماتجيب الشوار ونجيك
اتلبشت والعا ضحضحها لم يوريك
خست وكانت ما تعرف فى السرير تدار

ولما خست كده ، ناديت لدائها
استغفرت والله يابنى لما شافتها
وبات قطرها اليلادى عند كوديتها
طلع لها لجل سمتها ما ترجع زار

طلع لها جوز تيسوس من غير اشاره سود
وعجل أبيض يكون تحت السما مولود
وست وزات وفرخه عرفها مفرود
وديك عشاري عريض الصدر والمنقار

قال العجول والتيسوس دى عندنا والخير
ون كان على الطير ، دا ياما عندنا من طير
ون كان حاتسمن فانا الأولى بها من الغير
ولا حدانا البلد ، كلك بنات أبكار

اندق لك يا فهمه ، زار ، وزار بصحيح
استعجبت له جميع الخلق دون ومليح
لكن ياخية الأمل راح فى الهوا والريح
الهز والنفخ ما يخلى الصدره إلا فشار

ياواخده شيخ البلد ، شيخ البلد شارى
بيعة علف مدهنه ، والبيعه جزارى
إن كنتى متسبكه عالضيق اتدارى
البردعه تلتقى يوم الجوازه حمار

المؤلف

عبد السلام أحمدين صالح زناقي جاد ...
أفندي حاجج ولكن من بنى « شداد »
ما يفوتش نوبه الصلا بعد الصلا الأوراد
وكل أسبوع في بيته الذكر والإنشاد

له مكتبه فيها تلقى بهجة العشاق
وللجلال السيوطى لهفة المشتاق
ونسخه في الطب والحكمه لسبعين داء
كتاب بخارى كان من ريحة الأجداد

طلعت في راس أحمدين يعمل كتاب تأليف
حيث انه عصرى ؛ وجده شيخ طريق وشريف
وصار يصنف ويجمع في الحكم تصنيف
شئ عن عطا الله ، وشئ عن ظافر الحداد

نهار وليل والكتاب يتعاد ويتراجع
وكل صفحه انكتب في طرفها « تابع »
سبع شهور والمؤلف ناوى في السابع
يطبع وصول اشتراك ويحصل الإيراد

قالت مرآة أحمدین لما وحشها اليه
ما اعرفش ليه بس يتعب كل ليله عنيه
ما شفت مثاله يفتش عالتعب بإديه
بشوف عمايله دى وحياة النبى بنكاد

لو كان دا شىء منه فايده ، كنت اقول باطباه
السعى عالرزق واجب لم أحد يأباه
لكن حيا لله ، كتاب عمرى مانا شارياه
بقرش تعريفه ، ولا قرش صاغ ان زاد

قال يا عبيطه : بلاش دوشه وقلب دماغ
دا كتاب ثمين فى « العلوم » حقه ١١ صاغ
وهو النهارده ، على وش انتها وفراغ
وبعد ما ينطبع ويحب فلوس ، يتعاد

عبد السلام بالدفاتر دار على الإحوان
من له عشم فيه يناوله الدفتر المليون
عشرين جنيه لهم بالقربه والفتجان
والوصل فيه الحساب لكن مافيش ميعاد

قالت له هات لى بقى يادلعدى ملايه
وغويشه واحده ولو مفرد ، بدلايه
(بيرم التونسى)

ون كان ناقص شيء أكمل مللى ويأبىه
كان الكتاب اتجمع فى المطبعه يا ولاد

بيعت له صبيانه صاحب المطبعه سلامون
يقول لهم من سريره ، عندكو الكركون
لا بالمراسله أخذ حقه ولا بتليفون
آخرتها باع الكتاب بيعه ورق فى مزاد

واللى اشترك فى الكتاب وصله الكتاب تانى
الى اشترى فيه بلح ، والى اشترى سوادنى
واللى اشترى فيه عنب ، واللى طحال ضانى
القصد إن الكتاب برضك لأهله عاد

سيد درويش

من غيابك يوم وداعى	كنت بكتب لك عتاب
ونت لى مخلص وداعى	أنتظر منك جواب
شفت إسمك فى المناعى	واللقيا يوم الميعاد

لما حظى كان وجودك	غابت حظى القبور
واتمحي ميعاد صعودك	والتجلى والسرور
ونت يا سيد وعودك	المصور فى الفؤاد

أنا أبكى لجل سنك واندب العمر الطويل
واسهر الليل لجل فنك في المعازي والعويل
واسأل القيثاره عنك ياللي أنطق الجماد

إن خلت منك أماكن فيها أسمع لك حنين
إنت جوا القلب ساكن استمع مني الأنين
لك في قلبي دق لكن دقة النار والزناد

مصر ما تميل والله بعدك للحسيني والحجاز
والعراق من بعد بعدك يتحرق راخر بجاز
إنت في الفردوس لوحدهك والمصابي عالببلاد

أنا إن سالت دموعي كان مرادى أكون فداك
ولا هبت نار ضلوعي أفتكر أوقات هواك
وافتكر ساعة رجوعي لما اشوف نارك رماد

قلدس جرجس

« نشر صاحب هذا الاسم طعنا في مقام النبي الكريم ﷺ » .

من عهد ما القرآن هبط نزل هنا عمرو ، وربط
بيننا وبينكم يا قبط عهدود وداد متسجله

قرآن محمد قال لنا . عيسى المسيح روح ربنا

والست مريم ستنا — تنزل في أكبر منزله

وكان محمد لك نسيب — يا قبطني ، دون أهل الصليب
أما المقوقس له حبيب — محبته متأصله

أبويانا ناسب بسخروس — وإسم خالي جرجيسوس
وجد أمي فلتاؤوس — وأنا اسمي طه أبو العلا

قلدس يا جرجس يا غبي — كل القبط كهل وصبي
يقولوا من سب النبي — ينزل لسانه بالبالا

كل القبط متنوره — متخرجين من لندره
ليه إنت تخرج معصره — قلدس يا جرجس جاك بلا

انت صحيح راجل عويل — يا نطع ولسانك طويل
تشم نسايبك يا رذيل — يقطع لسانك والغلا

لوكاندة الحاج سالم

نزلت في مصر مستخفى ، فقير وأديب
دخلت لوكانده مفتوحه لكل غريب
تعلق الحاج سالم نعمت الله حبيب
رجل معلم مكمل تربية كتاتيب

قال المعلم ياواد ، شوف الزبون دا أمير
اعطى له في نمره خمسة في البريمو سريـر
وخذ له وياك كان القله والبشكير
واعطى له أكبرها ما عندك من المراكيب

دخلت اشوف نمره خمسة كلها تهيـص
سبعة من الفلاحين شاغلينها بالبلالـيص
الصاحي يـسـلت والنـايـم يـفـقـع ...
لو كان منشـن على النـجمـه نشـانـه يـصـيب

الساعة دقت ثلاثه بعد نص اللـيل
والفلاحين بالزعيق شالوا اللوكانده شـيل
الخدامين يرمحوا عالسـطـح زى الخـيـل
طالعـين يلمـوا القـوط في الفـجر بالقـباقيب

أما المصيبة التي خللتني قوام سنحت
صاحب اللوكانده ، مشغل في اللوكانده تحت
ولجل ما تم أفراحنا وحسن البخت
باب اللوكاندة من الباب الحسيني قريب

شارع عمومي عمار ، فيه تلتميت يباع
وفيه قهاوى ملانه للصباح صباع
لهم وحابد ونكته تجلب الأوجاع
غير القرف والصداع من دوشة المجاذيب

واحد يقول يا عنب لما انت فيومى
والتانى يقول يا ناس التين دا برشومى
ودوكها يصرخ ويقول سرك يا بيومى
يا قطب يا غوث دالى يندهك ما يخيب

أما السرير نمره خمسة كان عداك مبلول
وكل قمله تزيد لك عن ظبان الفول
والبق ده كل بقعه زى عين الغول
تسمع لها من بعيد فوق الملايه ديب

طلع علينا النهار واحنا في قلب دماغ
سألت كام البياته قاللى عشرين صاع

ون كنت بايت هنا تانى تحت بلاغ
قلت البياته دى عدت واللقا دا نصيب

الأسطى على منصور

بعت لنا تذكره الأسطى على منصور
ذو ملك هایل وراجل فى البلد مشهور
داعينا فى ختمه فى البيت الجديد وطهور
عقبال ما تقطع وتربط فى هنا وسرور

وصلنا نلقى فانوس والى وباب مفتوح
وتحت باب ألعاب ممدود سقاله ولوح
تفج من تحتها ريحه تشق الـروح
قال لسه عند المهندس شغل فى المجرور

خطوا الجماعة واحد واحد ونا نطيت
ولحد باب السلامك بالقوام خطيت
لو ما مسكت السلامك كنت أنا طبيت
لكن لقيت عالدرابزين الرخام بربرور

وعالسلامك كان صباره فى برميل
وكف مريم ولبلابه وفل جميل

وشخص راجل خروق واقف عريض وطويل
يحمي الجنينه وقله تحت منها ماجور

وفوقه عالباب تشوف في الوش فوق الراس
حجاب وحدوة حصان كانت في رجله مداس
وخمسه وخميسه قال تمنع عيون الناس
والباب مالوش أكره واللوح القزاز مكسور

مشينا متسحين زى الحراميه
والاسطى ساعة دى كان في دورة الميه
سلمنا ساعة دخولنا عالموالديه
سبق ورد التحيه عربجي الحنطور

دخل لنا البيه وقفنا للسلام بالإيد
سلم على الأولانى والسلام بمزيد
يسأل على مصطفى عمه وخاله سعيد
وإحنا واقفين على دورنا اما يجى طابور

قال بس والله أنا زعلان ومتأسف
على البتاع اللى فاته العرص متكشف
قال تركه قد جمعه لجل يتنشف
وبكره ينسد ويخش الرصاص والنور

والليله دى يا جماعه لم كانت غالبال
ده بس هو اللى جانى فى منامى وقال :
يا ابو حسين : يا قليل الأصل ، يابطال
قوم شد حيلك ووفى اللى عليك مندور

قعد حكى لنا بدون داعى ثلاث حكايات
طوال ومن بعد ما قدم لنا اعتذارات
وطلع الساعه واتكرع ثلاث مرات
قال اقلع الجزمه واستفتح يا شيخ عصفور

وبعد ما كل شيخ منهم قرا ربـعين
قال ريس التخت : أمال المطاهر فين ؟
جابه محنى ؛ وله زهره بين الحاجبين
وملبساه أم نيتـه ادلعـدى طرطور

قام قال أبوه دا الولد طالع ولد عكروت
وكل أولادى من تالت سنه بتموت
وقمنا وهبنا المعرض ده لسيدى ياقوت
وياما والله انكتب له تحويطات وبخور

ولما قال حسن ان « المسأله » الليله
عمل لنا عالسا سامر وهليله

سته تسایسه ، وأمه تاخده بالخیله
ما انسد واتلم إلا اما اشتریت له وابور

والختمه دی اتکلفت داهیه ونص الليل
والطبل والزمر والمزیکه والکیل
ولا الكباش الی باعوها بسعر الخیل
تلات حواله بستاشر جنیه بالزور

واحد عملناه عشا والتانی فرقناه
والی فضل نبعتہ بکره لأهل الله ..
وهم باللمبه قدامنا . ورحنا وراه
لقینا . حولی داقق له فی الجنینه خابور

خرجت غالباب ، قالوا لی : إنت خارج لیه
مش تیجی قبله تسلم زینا عالییه
قلت السلام ده أمانه سلموا لی علیه
وإذا سألكم علیه ، قولوا خلیه یغور

الحاج جابر

الحاج جابر علی عیسی الی کان حطاب
فی الحرب ورد لجیش الاحتلال أخشاب

في ظرف شهرين صبح يملك ثلاث أعتاب
وفرن واصطبل جنبه سبحان الوهاب

للحاج جابر دا حرمه ، إسمها مباركه
وبنت من واحدة تانية من سنين داركه
وكل عقده لنا عند الكريم فكه
البنت في جمعه جوها أربعة خطاب

واحد جدع سنكري افرنجي ، وله دكان
والثاني أسطى ، كواننجي ، وله صبيان
والثالث ابن اسماعيل راشد من الأعيان
والرابع الساعي اللي جاب له نوبه واحده جواب

الحاج جابر ملا مخه من ابن البيه
ودار يلف البلد يسأل صحابه عليه
قام قال له عقله حاتتحير يا واد على إيه
الفاتحه في شرع مالك تبقى كتب كتاب

قروها عند العريس ، أحسن من الخيله
وخلوا كتب الكتاب في ليلة الدخله
ويومها يجي الشوار بالزمر والطبله
وياما للحاج جابر في البلد أصحاب

بيت العروسة في غمره والعريس في بولاق
مسافه ون قصرت تطول على العشاق
وأما يوم الفرح كان يوم شكل وخناق
طلع لرب البريه وانظر الأسباب

أم العريس أصلها هانم وتركيبه
وبوه فقير إنما عنده البهاويه
الحاج جابر عمل لك شغله شاذليه
جانب الموبيليات بوريه له فنيارين ودولاب

وشيل الصيني لاولاد حته الأجلاف
والكارو فوقها الخده جنب منها لحاف
ناقص عليها القليل تصبح تمام إسعاف
وأمه جنب النحاس قاعداله بالقبقاب

وصل لبيت العريس موكب عليه العين
يلقوا على راس حارتهم أمة السائلين
جاياهم ام العروسة من بين الصوريين
حالفين على الست ما يخش الشوارم الباب

أم العروسة تقول يا كلب يا عكروت
اكتب كتاب بنتي من غير شوري بعد ماموت

آدینی دلوقت جیتک بس قرب فوت
لا عمل لاقل الکلاب عنک مقام و حساب

قالت مرأة اسماعیل راشد یا ربی أمان
ناس فلاحین ! عفش بطاله کمان دوشمان ؟
خرسیس أدب سیس یرم لعنت أطوز بوقمان
هرشوق فنایوق خها ایکی طوز اوغلی کلاب

قالت نبیه یا حرمه بترطنسی علی مین
بتحسینن ————— بهایم ولا مش فاهمین
کل البنات فی البلد عند اهلهم قاعدین
حسره علیه أنا الی بخت بنتی خاب

هجم لك الحاج جابر بالعصایه وهات
علی نافوخ المره واهبد ثلاث هبدات
قال بعض أهل العریس یا خلق ! یا ققوات !
مفیثی مسلم یخلصهم ینوبه ثواب

طلع لهم واد فتوه ، لكن بن حلال
جایب معاه کام جدع من عصبتہ وعیال
واتلمت العربییه کلهم فی الحال
ودخلوا العفش بالقوه مع الأغراب

جابوا العروسة وراحت أمها الكركون
وشيعوا بعضهم يبحث عن المأذون
الى أخذ في النهار منهم ريال عربون
وجاره يقول عليه راجل فقى نصاب

جابوا لكتب الكتاب الشيخ عمر دعموش
والمسألة له فيها شغل خلق حوش
قالوا العوالم حايجوا من ٨ ماجوش
والساعة دقت ١١ والموالدى غاب

الحاج جابر بعث مبروكه للعالمه
تشوفها فين والمعازيم ملمومين له
دارت تدعبس على مسكنها في الضلمه
لقتها ساكنه في عطفه جنب درب ط ...

قطرها عمدہ ، دخل في مصر ، بايعها
فضل وراها كده بالخطوه تابعها
شافه بوليس سري ماشي يحسبه معها
قبض عليها بوليس الحفظ والآداب

شوف ليلة الحاج جابر كلها أحزان
الغم من كل ناحيه والغلبت ألوان

لأنه حطاب ؛ و كاره يشبه الفران
يكسب ويربح ، ولكن تنخم بهباب

الولادة

خليك معانا هنا يا حضرة الكامل
وانعم برأيك على راجل فقير عامل
ينسد رزقه وتصبح حرمة حامل
وله سنه ونص ياكل لقمة بالدين

قالت لي يوم جاريتك ، دى ضهرى غبانى
ومن نهار الفسيخ الدم لم جانى
حسبت حساب شهرها الرابع على الثانى
وجاها كرسى الولادة قبلها بشهرين

بقت دايتها عدوك كل يوم فى الشوش
فى الصبح فى الضهر فى المغرب علينا تخش
مايوم تفوت الغدا حتى ولو كان مش
ويوم مافيش أكل خالص ترقع الرغيفين

خشت لها يوم وقالت حضروا الكرسى
بس اما اولد مراة عبد المجيد مرسى

غلبانه سبحانه من يعلمها فين ترسي
دستور وعيها نازل منها بالرجلين

يادوب دي راحت وكنا وقتها في الليل
والطلق جا للمره أربع نوبات بالحيل
ولما سالت سلايين الولاده سيل
بعث جبت امها جابت معها اتنين

فيهم خالتها الي قالت ليه يا بنت الناس
تخلي دايتك تفوتك ونتي فيكي الراس
حطت لها تحتها مسند وطشت نحاس
واستنظروا سنا الداية فوق الساعتين

التانيه قالت مادام دايتك كذا حاتغيب
دايتي ام عبد الغني حاضره وبيتها قريب
ولايدها تتحط عاجرح العليل يطيب
ومولداني ف زكيه والولد عوضين

راحت وجات قبل وش الصبح ، وياها
خالتي ام عبد الغني — عاجزه وساحباها
خشت تقول الهنا ، دي الوالده عارفاها
هاتوا اما احسن على العيل أشوفه فين

حطوا لها أيدها على بطن المره بتقييس
قالت يا ناس لسه بدرى كل دا تحاسيس
حاقوم قوامك أولد سلفة ام. أنيس
عبال ما جيلك يكون انطش لك قرنين

يا دوبك الدايه حطت رجليها بره
والواد نزل حدف لا سحبه ولا جره
فعدوا التلاته وهم يقطعوا السره
وكانت الساعة ٩ جولك الدايتين

قالت لى أم المره إنزل وهات لى قوام
رتم وتنفيل وإيد مريم وسنبيل خام
وعكنه ومغات ومحلب عفصلى وخزام
ومخشان هندی أزرق كل شىء رطلين

وقفت اخمن على كشف الحساب مختار
يا هل ترا الخمستين أدفعها للعطار
ولا أسيب دى الهجص وادفعها للجزار
ونا الفلوس اللى عندى كلهم رينالين

قلت لها دا النخشبان بطال على الصحه
والعفضلى والبابونج يورثو الكحه
(يرم التونسي)

والشبه والميعه رخزه يورثو البحه
قالت لى لكن دا شىء موصوف لمنع العين

ردت وقالت عجوزه قاعده جارتها
ما كلف الله نفساً إلا قدرتها
حاجيب لها العكنه والمحب وآخرتها
يدفع كان يخفى للدايه البشاره منين

قلت لها دفع الفلوس من غير عمل دا صعب
قالت يا ابنى صحيح لكن عطتها الكعب
ومهما كان اسمهم برضك دايات مش لعب
ويلزمك ترضى خاطرهم سوا الاتنين

قالت حماتى دا واد خايب ونا عارفاه
ماينسى عمره الحشيش والبيت قوام ينساه
وحياة مقام النبى ما أخلى بتتى معاه
بس اما ترتاح هنا وتكمل السبوعين

البت عندك ولا فى العيد تلبسها
ولا إذا جابت العيد تنفسها
كان وفوق كل دا فى البيت بتحسها
جاك نيله فى امك دى كانت وقعتك بالين

وطلعت بالعجل من رجليها خلخال
اتباع وفيه رطل فضه جاب ٨ ريال
جابت جميع ما ذكر وفراخ شمورت تقال
وتين وسمسم وسمنه شيء ملا غلقين

مراني بتحبني من حسن أخلاق
وعارفه عذري وأشغالي وأرزاق
تاكل على قدمها واشمط أنا الباقي
بعد اربعين يوم بقيت زايد على حصانين

قالت حماتي خلاص يا بنت ربعتي
ياللا على البيت ، وطلق يا جدع بتي
قلت لها من غير مؤاخذه بس قومي انتي
وولده تانيه خديها هي والولدين

دكان مرسى

ندرت على الطاهره ام مرسى الدايه
إن ربنا خلاه وزاده هدايه
لتحط له رسمال ويفتح تاجر
يقي ان كسب مهر العروسه ، كفايه

كان مرسى فى الكتاب يقرأ فى لوحه
وغير برابيره وهمه ونوحه
يحطها جنب الفقى على روحه
طرده الفقى ما كان حفظ ولا آيه

سمع السميع منها ومرسى اترشد
طلع جدع يطوى المدينة ويفرد
جدع صلاة الزين عليه متبغدد
يسد باب حاره ويملا عبايه

فتحت له قال دكان فى بن وسكر
يعجن ويخبز فى التجاره ويخمر
مادام لا يستعطى الحشيش ولا يسكر
يفلح ويبنى لها الخرابه سرايه

قعد سى مرسى والكوفيه تزينه
عليه طاقيه كاسيه نص جبينه
وتلت سبحه كهرمان فى يمينه
والورد عالمكتب وفى الكتابه

وعاليمين لوح فيه وما أنزلنا
وعالشمال لوح فيه وما أرسلنا

واليا فطه فيها مرسى نصر البنينا
ومن جهة ما يحط ظهره مرايه

والأمهات ونت عليهم ترسي
الصباح نيتسه لما يخرج مرسى
ترقيه ثلاث مرات بأية الكرسي
ويفوت سبع خطوات على الدفائه

وتقول يا قادر يا كريم يهديه لي
إنت اللى آخر قطعنى مديه لي
بقدرتك من ريحة ابوه خليه لي
لحد ما ياخذ بإيده عزايه

جوه اليهود من كل صدغ وكالح
مللى فى تصريف البضايع فالخ
اليوم تعاملهم وتصبح شالخ
ما يكسبوا المسلم ولا قشايه

مضوه على بيعه ورق نمساوى
وبيعه تانيه ، شمع كله بلاوى
وكونتراتو زيت وابور كفراوى
والكمبياله اتحررت فى غايه

صاحبنا ياخذ من عميله ما يكتب
ويعطى للشارى البضاعه ما يحسب
يجرد كذا بالعين والعين تكذب
تشوفها طياره ، تقول حدايه

قالت له يوم أمه يا مرسى قالوا لى
جماعه من درب المقشات جولى
انك عارف لك واحد فى المدبولى
دافع لها اتناشر جنيه فى ملايه

إن كنت قصدك فى الجواز يا حبيبي
من بكره أعمل للفرح ترتيبي
والشرط ماادفع مهرها من جيبى
إنت اللى تدفع مهرها يا ضنايه

قال مرسى انا ملبوخ فى شغلى وإنتى
من بعد وعدك بالجواز بصهيتى
أما اللى قال لك عامللايه يا نيتى
كذاب وقصده تقصديها معا

خطبت له بنت سد حمد السرجانى
واتوضبت ليلة الفرح سلطاني

جمعت ما بين المصرى والطلليانى
واتفرقت فيها تحف وهدايا

بعد الفرح خلوا المعيشة ذواتى
أحسن فواكه والجلاته يومياتى
والكوستليه والفراخ دى ليلاتى
وياما ينعم ربنا بعطايها

الكمبيالات استحق ميعادها
من قبل ما يروح م العزومه رمادها
جاله صاحبها يسترجى سدادها
سد الدراهم ، ما هو سد قنايه

أبو المراسى ، قال له مالك خايف
ونت اللى جيتنا فى فرحنا وشايف
مع المدامه بتاعتك الهايلاييف
قاعدين كدا بين الفانوس والرايه

اتكلفت ليلة الفرح دى دواهى
فوق عن ميتين أهيف ، كدا والله
أما البضاعه فاضله عندى كما هى
مش عايزه تتعنع ولو بعصايه

والحسبه فارغه ماتأشيش على مالك
وقت الفرج من عيني أدفعها لك
أرجوك ومن فضلك تطول بالك
ولجلي انا تقبل يا مسيو رجايه

قام قال صاحبنا للجدةع بإماره
الشغل دا مش شغل ناس في تجاره
ده شغل يا أستاذ عيال في الحاره
إدفع قوام ولا فيش لزوم لقضايا

قال مرسى حيث انك كدا بترافع
واللطف وياك والأدب مش نافع
روح امشى والله العظيم مانا دافع
مليم من المبلغ سوى برضايه

المسيو برطع والشتيمه سمعها
عالكونتوار بالكمبياله قطعها
جاله المحصل في الصباح يدفعها
والمرغ في عرف البنوكه جنايه

مرسى الى طالع في التجاره يالوصته
بين التجاره والتجار ، وياحوسته

ساعة ما يدخل محضر البورتستو
في البيت ويحجز حتى عالمقلايه

جو المحضرين غالبيت وأمه الشاييه
عارفه المصيه من زمان والنايه
كانت مرأة مرسى العروسه غاييه
في النحاسين بتصلح الدلايه

قالت لا يا مرسى تنضرب في لسانك
وتنفضح قادر ما بين إخوانك
ضيعت يا منيل قوام دكانك
وياما فاضل لسه غلب ورايا

ذكرى سيد درويش

اتعد يومك واتحسب من مهرجانات الأدب
فيه القصايد والخطب ترن لك مطمئننه

يومك مخلص للأبد والناس عيشتها بالمدد
ربك خالقهم للهدد وانت خالقك للبنا

والناس بتبنى مجدها لكن لها ولنسلها
ونت كنوزك كلها خلفتها لنا كلنا

ينو المفاخر بالحجر ويزولوا هم والأثر
وضربه منك عالوتر على الزمان متسلطنه

كنا همل بين الأمم لوما الهرم والكام صنم
خليتنا نطق بالنغم ونقول لهم مين زيننا

ونقول لهم بيغده في الفن مصر السيده
مايكونش أحسن من كده أنغام وروح متلحنه

آهات كثيره سمعتها ونت عشقت وقولتها
آه ! م الفؤاد طلعتها حسيتها من قلبى أنا

الجاحد الى يجحدك مفرور إذا كان يحسدك
ليس بس لما يقلدك يقول أنا رب الغنا

شوف محفلك لما انفتح بمغنتك أصبح فرح
وكان يدور فيه القدح لو كنت يا سيد هنا

أنا اتلهيت

أنا اتلهيت وخدل زندي مانيش نبى الله غاندى
إن كانت الغلطيات من دى يكون فى عون اللى عملها

إن كان على الملح أكلنا ون كان على السجن دخلنا
والصوم نخلناه ونخلنا خلى اللى فاضل لرجاها

ياما انطحن شاعر قبلى واللوح كتب له اللى كتب لى
إشمعنى شعرك يا غرابلى خلاك تفوت من غرباها

أنا اللى ضليت فى جهادى وغشنى سحر الوادى
حدفت للنيل أولادى من بعد ما « عمرو » دخلها

يام الكرانك والدلتا حاتعملى طرشه لإمتنى
ما اتغيرت كلمة زفتى والدنيا راقى أحواها

قالوا اللى يشرب من نيلك لابد يرجع ويجى لك
ونا اللى عطشان فى سبيلك الدنيا إيه اللى جرى لها ؟

يا بارس خلاص صبحت خاربه اللقمه فيها بمضاربـه
ونا اترميت عند مغاربـه الغلب والكرب قتلها

مغاربہ بالزر فاشو کہ یازر تربط به فلو کہ
باکل معاهم شکشو کہ تشمط وتشوی الی یا کلها

لا سطل خروب یسغفی ولا بن نکتہ یکیفی
ما یقصف العمر ویفنی غیر الخلائق بعلها

یا مصر هجرک یکفانی یا عاملہ قمع وناسیانی
دا یوم ما خارج لك تانی حاتبقی رجعه برسمالها

.....

القرن العشرين

یا قرن عشرين یاریتک کنت قرن الفیل
وفیک محمد بعث بالوحی والتزیل
وفیک عمر یرعب العالم بلا أساطیل
جیت والتقیتنا قلاشوه بالجاروف نباع
لا المشتري فی التمن ما کس ولا البیاع
ومین فی سوق الدلاله یشتری الصیاع
إلا لمسح الجزم ویدحرجوا برامیل

سألت زیور ، و زیور صنعتہ حاکم
یحکم ولاد العرب بالسحر والخاتم

وينقــد الملك لا يحارب ولا يخاصم
اللورد جاك بالأمانة يعمل ايه قول لي
باللى الحروف أكلتك واللغبد متدلى
رمى الماتسان من يمينه والتفت قال لي
بعد المعاهده أقول لك عالسبب يا رذيل

قلت المعاهده البديعه باينه يامونشير
بالخير دول لغمطوننا ، والله بشرة خير
الخير يقعد ، وهى تنكتب بإتير
يقراها ولد الولد ، ويسب بالأيمان
فيها الجنود داخله أكترم البنود بزمان
والطيارات م الدخيله لأمنا درمان
تطبق المادة ١٦ بسبب تقييل

أرجع لسيركين بويد سيد الجميع وأقول
يجعل كلامنا عليك سخسخ خفيف مشغول
إمسك معايا القلم أحسن أنا مصطول
نخ الى شاور عليك بالخير دا مضم
يوم المظاهره الجدد بالدم متعلم
أما الى يهرب نهار الهول ويسلم
عويل ومن يجرى بعده يلقى زيه عويل

الساعد اللى بنى الأهرام

هتواه موجود

يا رب انا اتوكلت عليك ورجعت إليك
ما تنسانيش انا صنع يدك يا رؤوف يا ودود

(اتحاد الأحزاب)

مين كان يقول ان الأحزاب تصبح أحباب
لك وحدك الحمد يا وهاب يا صاحب الجود

جاعل خلايقك ناس بتحش وناس بتقش
ورحمتك من فوق بترش الزرع ، يعود

يعود وبعد ما كان جلاوين يرعاه خروفين
عيدان طويلة وتملا العين الله عالمود

كانت زريه السنيتين دول يرعاه الصول
ويبص لك عمك جون بول يلقيه أسود

شدوا اللبان بزياده كلام
الساعد الى بنى الأهرام
وامشوا لقدام
هواه موجود

يخلق بدال الأتيكه
ويبيع لأمة أمريكا
ميت فابريكه
وبتوع فرى جود

الدنيا كلها حاسدانه
« وادى الملوك » أما نتانه
عاجبانسه
منك يا حسود

يعنى المحبه لأمواتنا
وكلنا بجغرافيتنا
واحنا حياتنا
فى الخارطة قروود

تزخرفونا بترتر كم
وتشغلوننا فى دوار كم
وبأحمر كم
نلقط فى الدود

وحق من أنبتة زينه
ليتنسج منه خاكينا
وفتله متينه
والباقى بارود

وينقلب شعب الوادى
مافهش عاقل ولا هادى
كله جهادى
غير الملحدود

خيوب عليه إن ماجعلها
م اسكندريه لشلها
يمشى داخلها
فى عمار ممدود

والنيل يمين وشمال مجراه يخلق سافواه
وصحرة الجيزة يا ولداه تصبح هوليود

غاندى

السلام لك والسلامه من هنا ليوم القيامه
ياللى أظهرت الكرامه بعد عهد المرسلين

ياللى من لعبك بمغزل تطلع البورصات وتنزل
فوق دماغ لندن وتعزل لائكشير الغزالين

فيلسوف ما يخيبش قولك كل فلسفتك فى نولك
والتلاميذ الى حولك بالمكاكيك شغالين

لنجليز عايشين فى لذه عندهم أسطول وعزه
ونت تضربهم بمعزه سوده بنت اربع سنين

من هنا تيجى المقالب الى مغلوب يقى غالب
واللى مطلوب يقى طالب والهزيريل ياكل السمين

قول بدل بفتيك وبيرى يطبخوا بسيرج بابورى
والبودنج ان كان ضرورى ياخذوا حته م العجين

لانجليز تاخذ ما تدي بالحفان من كل هندي
واتنبع صوتك يا غندي ماالتقيش المنصفين

قول مادام الحق ضايـع والغرض بيع البضايـع
الحرام ساتر وسايـع ولا نمشي عريـانين

يخضعوك ليه للتجاره ونت في أرض الحراره
كل قرش يروح خساره في الزفير والتفـالين

كل واحد عنده معده ماسكه روحه خدها قاعده
إن طمع تخلق له أعدا سقـعـدوا له مرصـصين

عالقـضيب والقطر ماشي يصبح العصيان بلاشي
ون عملها وما اكتفاشي يقيـى ياكل عزرائين

ولا ياكل م المناجـم فحم به عالـدنـيا هاجـم
واللي به داس عاجـماجـم أحيـا ولا ميـتـين

يا زعيم الهند صومك حـب العـالـم في قومك
وانتهت حجة خصومك الـي باتـوا ملبـوخـين

كلهم واقـعين في حيره يعقـدوا جلسـات كبيره
فوق موائد « مستديره » يعنـى لسـه محلـقـين

يفضب الحاكم لنصحك يحبسك ويعود يصالحك
وانت تستعجب وتضحك عاجباً بره القحطانين

يحسبك طالب جرايه ترعبك هزة عصايه
يلتفوك يا غاندى آيه فى الجهاد صايم سجين

كام زعيم فى الدنيا مثلك ترضى يا كل زى أكلك
ولا يلبس زى شكلك كلهم متحفطين

الى بات ناصب مشانق والى خايف م الشرانق
والى اهو بايت يعانق والى قدامه الطحين

دونتمارو

(اسم المقاول الإيطالى الذى التزم بناء كورنيش الإسكندرية ثم صفت
الأمواج فى السنة الأولى فذهبت به وقبض المقاول أجرته كاملة) .

واعد بيانكا واتفق وقت الشفق
وغابت الشمس وخفق قلب الولد

واعد بيانكا عاجل وادى الجبل
يصفر وجيش الليل دخل غطى البلد

والحب والفقر اجتمع على الجذع
الى ماشفش أو سمع غير النكد

شايف ييزوف الممتلى كبريت غلى
يقول لروما استعجلي على الهدد

لهليته طالعاه بدمدمه منتظمه
منها اترعب فوق فى السما قلب الأسد

نفخ على بمباى ردم تحت الحمم
مدن بعمدانها وأمم مالهاش عدد

وشاف طرابلس مقبره مستعمره
فى أرضها كوز الدره ما يتوجد

فيها ابن عمه متلبخ وفى السبخ
يزرع عنب يزرع لبخ يطلع وتد

وايطالبا دافت أرضها من عرضها
تزرع وتقلع برضها عايزه المدد

وقف لفقره مختشى من كل شىء
والفقر توب من شفتشى على الجسد

لاحت بيانكا ونجته من وحدته
وقال عانقها وعانقته ياللا هنا

بنت الجبال لابس الحلق واسع شلق
وجلييه بالقلق متطينه

وجايه خصلة شعرها فوق ضهرها
عياقة الى عمرها عشرين سنه

ضحكة بيانكا تبتهج منها المهج
وعيون بيانكا أم الدعج فيها المنى

سرح ومال مع الخيال فى دى الجمال
يلقى السواحل والجبال متزينه

وشاف جموع متصففه وقت الصفا
وشاف ملايكه مرفوفه هنا وهنا

والبخت داخل بحمله أبيض وله
مقدم ذهب مكمله حسن وسنا

وقال بيانكا اتحضرت واتعطرت
وعالبساط اتمحضرت وعالغنا

والحب له حلم وأمل يعمل عمل
وكل من حب اتصل إلا أنا

فاق من منامه وانتظر ناوى السفر
والحظ يقسم والقدر قال عندنا

بلد شادوف متدنشه ومتوحشه
لكن رجالها بالخشا متمدنه

طليانها عايشه فى نغفنه متمرغه
حتى البسابورت اتلغى بين بعضنا

* * *

نرجع ويستر ربنا للى هنا
« ... » الى عظم قدرنا بين الأمم

حب المقاولين غيته ولدولته
غرام فى تعظيم كلمته إن قال نعم

وفى كل شركه يشترك واهل البرك
يقولوا لابد الشرك ما ينطعم

وفى كل المقاولات ينبت وإذا انتهت
يقول دى دولتنا سهت ابنوا هرم

لابس ريد نجوت م الطوال روتشيلد قال
يملك بدال مليون ريال مليون صنم

قالوا له سلمان متزنق قال يتشنق
قالوا له بيته بيتحرق قال يتهدم

وقوم يا واد عالقرش صاغ رقع صداغ
وافلق ياواد أجهد دماغ واضرب قلم

وبالضرايب طسها في فصها
وبخطبه واحده أرسها أشفى الألم

وفي الخطاب به لبلبي مهوش غبي
غامبيتا صلوا عالنبى تحت العلم

وأما أفكاره بقى متحزقه
وف بعضها متلزقه حكم حكم

هو اللى قال فخر الجدود فرعون يعود
مطرح ماكان تحت اللحود مع السررم

هو اللى قال البشوننه والبهوننه
تقال لأمثالى أنا واهل الهنم

خش المقاول واقترب من ذا الجرب
يقول لهم فين ياعرب راعى الغنم

قال له وكيله « أنتريه » أدخل عليه
دخل لقى قدام عينه راجل أضم

عليه صحيح لما زغر شكل الوزر
وفي السمنتو والحجر سيد من حكم

وبكلمتين كده وكده ويمكن غدا
وبضحكتين بيغده تم العشم

قال له الوزير حط العطا تحت الفطا
واتقل وحاذر فى الخطى قدم قدم

* * *

ياسكندريه تسلمى ليه تتخمى
وتقومى بعدين تلطمى متشلشله

حتة جلنّف ينتشك ويعفشك
وبقصرمل يكرنشك يا منيله

عيب عالفتوات الأسود عيب عالزنود
عيب عالمسله والعامود والسلسله

بحرك ماهوش ساكت عويل بحرك رزىل
«سيمور» فى أسطوله القليل قام له الصلا

الموجه تطلع فى الغبش والريج لبش
وعالحجاره تنطـبـش متلتله

تكسر حديد تطحن زلط مهما اختلط
ويش حال رصيف مبنى بزلط وبفشولـه

اللجنه لما اترتبت واتوضبت
بصت كدا واستعجبت عالبهـله

حيطان مطبق صلبها وجـنبها
حيطان واجعها قلبها متفشولـه

جس المهندس بالعصا دى الخلبضه
نزل عليه رمل وحصا من العـلا

وديكـتـاتـورنـا ما اتخزى ولا اترزى
سيدنا الى كان حقه الجزا بالمقصلـه

قال له المهندس : دى أمور ؟ قال امشى غور
وبات وصبح عالوابور جاتنا البلا

المفاوضات

الأوله آه . والثانيه آه . والثالثه آه

الأوله : عالسودان كرزن خلق تفانين — على كيفهم — ومالناش كيف
والثانيه : بوظها هندرسن سنة ثلاثين — وشرفهم — نسوه فى جنيف
والثالثه : فى الزعفران بالحرمله داخلين — وسيوفهم — مفاوضه بسيف

الأوله : عبست والبرلمان حله — بمقالب
والثانيه : لما اتنست خزان كبير وبنوه — بلوالب
والثالثه : اهي اتكربست والهلل فيها رموه — بمخالب

الأوله : يا خلف للأفريكان تأديب
والثانيه : ياهل البلد أرزاقنا فى دواليب
والثالثه : أسطول يوفق بين حبيب وحبيب

الأوله آه .. والثانيه آه .. والثالثه آه ..

شوفى لنا بنت حلال

جدع معلّم قال لخالكـك ام هلال
شوفى لنا بنت حلال تكون لطيفه وعال

بنات كثير حلويـن عند اهلهم قاعدين
ماين طبيخ وعجين وبختهم بطـال

عايزها لحم فصوص مش عود قصب ممصوص
ومحرقه بعصوص وعامله روحها غزال

عايز قوام يتهز ان دزيتيه يندز
وف كل مفصل حز يفكـرك بهلال

عايز نتايـه صحيح من ربع شمع تسيح
مهوش بشكل قـيح لكن بذوق ودلال

عندك بنات جمالات مقلوظين نتايات
ودمهم شربات يسكر نسا ورجال

تحققى فى الزين البنت ترخى العين
دى مهرها ألفين أحطهم فى الحال

أما اللى عامله سبور وجدها بلفور
وعايزه واد دكتور خساره فيها ريسال

ولا اللى عامله إله وشعرها قصاه
وبأوكسجين صابغاه دى تجلب الإسهال

ون جبتى واحده بكرش من الحمير ماتغيرش
مانيش واخدها بقرش واحط فوقها شوال

الحماس

الحماس ماتبط من أيام عرائى وانتهينا
لنجليز شالوا المدافع والطوائى واتلهينا

الخازوق ماسك متين والفرقه نيتى بالمدافع
والحقوق تطلبها بالروب والجوانتى وابقى رافع

للبلد جايبين حكمدار من جلاسكو واستلمها
متحمص لو كان فى مدريد ولا مسكو كان هدمها

فى الفوتيل قاعد أمير والشغل داير حمري حمري
ون زغر لاعظم وزير بردون يا ماهر بطنه تجرى

مشروعات اتنفذت وسيادنا تنهب في الفوايد
من سكات ون كنت تزعل ياللاهيب في الجرايد

المعسكر يبنى يوم المفاوضه ونت مالك
دى الأوامر ، والمرافعات والمعارضه خلوها لك

وقت ما يهف الغرام قول ياللابينا عالمراتب
ستميت كبتن يجولك ع المدينه م المراكب

نتفق أو نختلف برضه انت تطلع بالبشاشه
والنشان الحلو فى صدرك يلمع ونت باشا

ياللى قصر الزعفران مقبول عليكم كلمونا
سلمتكم مصر روحها بين يديكم طمنونا

ميتم الأمم

أمريكا

فين عين واشنطون تشوف روزفيلت ابو التفانين
القمح قال يتحرق والبطالين جعانين
آدى جزاتكم ياولسن عصبستك شينه
فرنسا وانجلترا بيضبعوا فينا

روسيا

ياللى صبحتم غنم ستالين راعيها
ارعدوا الى بطرسكم الأكبر زرع فيها
شمتان فى قلة مقامكم نصكم جرايع
والنص فى أوروبا دابر يشتغل ويبيع

اليابان

بالرز فانهين ، وميكادكم رشيق ونخيل
حسره على الى عليهم ركبوا براميل
وكان صفار الوجوه اسمه صفار الموت
صبح صفار الوجوه له فى الموازين صوت

إنجلترا

الفرس فىن والفراعنه فىن ذرايرهم
الجبارين ربننا يكسر رقايهم
طالب من الله أعيش وأشوف بعينه
يانجلترا أمـتـك تصبح فلايكه

فرنسا

الحظ كان محتكر والناس تروح له باريز
صبح متلل فى تومبوكتو وفى تبريز
وف نص يوليو اتفتح باب السما غلظه
أما الى فى الغيب لا لباسيل ولا ملطه

باريس

الفجر نايم وأهلك يا باريس صاحبين
معمرين الطريق داخلين على خارجين
ومنورين الظلام راكبين على ماشين
بنات بتجرى وياما للبنات أشغال
وعيال تروح المدارس في الحقيقه رجال
ورجال ولاكن على كل الرجال أبطال
ولسه حامد وعيشه واسماعيل نايمين

راحت على الشمس نومه والبلد في ظلام
وقبل دى الشمس فاق ابن المدينه وقام
الكون ينور بإيده لما شمسه تنام
فايتها للشرق تتطلع على الأطلال
ينشف عليها الغسيل والطبله والغربال
ويقوم على لدعها الناييم سنه بطال
صبحت باريس في غنى عنك يا شمس الدين

العلم والرقص دول في معهد السربون
أعجب عجيبة أشوفها لو ألف الكون
معهد حكومى ! وحقه يشبه الكركون
لكن فرنسا لها دون الأمم أحوال

ليبران في الاحتفال يصافح الشيال
وبنت سوق الخضار ساكنه مع الماريشال
والبوسته صندوقها واقف داخل الدكاكين

جارتى سوزان الجميله الى تبيع الموز
نازل عليها المطر من فم متراليوز
تبسمت للمطر ، أحسبها فازت فوز
بالبعد عن مشيها في حارة الكيال
ودرب شعلان وفيه الوحل للخلخال
لكن سوزان الى واقفه وقفة التمثال
مجلس بلدها جعل رجلين سوزان سخنين

ثفت العيون والشفافيف في باريس بتقول
إحنا ملوك البرايا حكمنا مقبول
البدع والفن كله عشنا منقول
سادات بنا في السيادة تنضرب أمثال
أحرار محرم علينا السجن والأغلال
الفقر والذل ما لهم في بلادنا مجال
ويوم سباق النجايب كلنا سابقين

إن دقت اتنين صباحا ، خش مونبارناس
حيى العذارى السكارى تحت كعب الكاس

وجوه عزها جماها عن وجوه الناس
من كل نجمه عانقها في سماها هلال
تجذب بنورها أم في الهند والشلال
هي أفينوس عبادها من ملوك المال
وتبقى صالة بديعه والى فيها مين

ابن نظله

لعب أمين بن نظله نوبه طب الميس
مع ابراهيم بن صول قسم الخليفة خميس
بين الولد والولد خش اللعين إبليس
بعد الوداد والتصافى ، دوروا التبكيس

ليلتها بات بن نظله في القفص مربوط
بالكف واكل وشاكر بالجزم مخبوط
وقدموه للمعاون إن ده مظبوط
لأنه في ٩ مارس كسر الفوانيس

في الحاره بيه م الصعيد اسمه الخفاجى نصر
باع في الصعيد كل ملكه واستقام في مصر
ساكن في بيت بين بيوت قسم الخليفة قصر
فيه يجتمع كل يوم العبط والملاحيس

حشت له نظله الى في الأجباب معدوده
تبكى وتشكى لأهل السنصر والجوده
كان بالتصادف مرآة الصول موجوده
بتزور مرآة الخفاجى والجميع مهاويس

قالت لها نظله إبنك عض إبنى أمين
وطرشه الدردى وولاد الجيران شاهدين
ونحسوه قال كان ؟ دانت صحیح ظالمين
إيش جاب لجاب دا ابنكم يختى بسلامته عريس

وهوه لعب العيال فيه حد ياخده بجد ؟
ولا اليتيم ينتهم إكمن مالوش حد
لا : دا المفرعن كان يادلعدى ينصد
وكل واحد رئيس فوق منه برضه رئيس

ردت عليها مرات الصول بتقاله
قالت لها المسأله دى شغل رجاله
أما أنا مش بكلم واحده غساله
وقولة ابنك ومش إبنك دا شغل بوليس

نظله اما شافت كده نزلت نواح وعديد
صحى الخفاجى الى كان نايم فى أوده بعيد
(يرم التونسي)

راحت مراة الخفاجى للحكاية تعيد
قال دلو كيته اعملوا الجهوه بلاش تهليس

وقال لخدمه : روح جول الخفاجى ييه
عايجول لكم إنتو حابسين بن نظله ليه
وجول لهم ميته يطلع هوه عامل إيه
وجول له يا صول خميس خليك لطيف وكويس

راح بالرسالة الولد لكن سعادة الصول
قال للولد أما جهال الصعايده دول
روح قول له لو كنت حاسم قول من دى القول
حايقوم جنانى وأنزل فى الجميع تجبىس

فى الجلسة طست أمين المحكمه شهرين
وياما أحكام كده تتعد بالألفين
جروا اليتيم فى الحديد والناس بقت حزين
ناس واقفه تضحك وناس عالمحكمه تأليس

أما الخفاجى فكان فى العام عليه مندور
للصول هديه شوال غله كبير محشور
قطع علاقته وخلاها مع المأمور
أما الهديه فخلاها عشر تلاليس

الاكتاب

يدفع سعادة صالح ييه بالنص جنيه
ويومها يبقى اسفلت عليه يوم الإحسان

فقلنا مبلغ برده كبير والله انت أمير
فقال يا عالم أمر مدير وعادات أعيان

مظبوط مهو الى يجيب طباخ يملاه أوساخ
محاشي عجه فاصوليا فراخ تلقاه حيوان

ما يدفع إلا ان مات زغلول أوجا الدلدول
وغير كده الصندوق مقفول في أمان وطمان

يشوف بلاوى وناس أشكال فقر وأهوال
بدل ما يسفههم عالما يصبح سمران

الى خلق للخلق قلوب خالق لدا طوب
يرق لمرأة المنـدوب ست السنسوان

شافت عيالنا فى نوح ونياص وجرب وعماص
من قبل ما يخش بن العاص ماشافوشى حنان

شافتنا نطعم دی الکتاکیت
حسب عادات بلد النبایت
لحمه و دینامیت
قالت جودمان

وشمرت دراعات الحور
ووبختنا علی البربرور
وجابتنا طابور
وعیا الصبیان

وکننا رجاله و نساوین
بأن عیثة العیلة طین
مخاش حاسین
وعیشتنا کان

فتحت قوام الست السوق
قالت ذواتنا أخذنا خازوق
ضیق مزنوق
مافیهاش زوغان

راح اشتری له البیه بمباغ
عشان ما فیش أهرام و بلاغ
ومنشہ بصاغ
تنشر إعلان

ومن جهه ، مشروع أولاد
« ملعون أبوهم » قالها وعاد
والقلب جماد
وقعد قرفان

فالحفله كانت مش عاجباه
مصیه حامیه عجر جایاه
وبإذن الله
والوصل أمان

الوصل یاخده عریض مختوم
من إید حسین ییہ المخدم
بنفس مکتوم
مأمون شنوان

تنزل مصييه عليه ويهون
ياتكون ليلة تمثيل ياتكون
عالصنف السدون
تأسيس جرنان

اليصاره

عم ابراهيم راجع حزين من شغله
ماشي على العكاز ورابط رجله
شايل رغيفه تحت باطه وفجله
يارب تلطف بالغلابه وييه

عالبيت دخل يلفي المره محتاسه
والأرض نشغى من طبيخها كناسه
خطى الكانبون والبرمتين والطاسه
وقال مسا الخير؟ العشا يا بهيه

قالت بهيه لبنتها ناوليني
حق الكراويه والقزازة وعيني
فرشة أخوكى واغسلى لنا الصينى
ويا لالا يختى حضرى الطليليه

ساعتين وفاتوا فى قرف ولكاعه
عم ابراهيم بصرخ يقول يا جماعه

هي البصاره عايزه تسعين ساعه
قالت خلاص فاضل على التقليل

وقت العشا سمعوا خليل يسيط
جابهوه على السفره بحاله مزروط
وبعد ما فاق من بكاه واتزقطط
جنب العشا حطوه على القصريه

الأكل داير والنفوس قرفانه
من دى الخليل الى ملانا عفانا
راح المسخيم هابش الكروانه
اتدقجت فوقه ونارها قويه

خليل صرخ بالصوت وقامت أمه
سمت عليه والى اندلق بتلمه
فى الصحن تانى ، داقه جوزها وشمسه
قال البصاره اتنجست يا وليه

قالت يا بتتى الأمى ارميها
والحلله امى هاتى الى فاضل فيها
قالت دى فى المطبخ قومى انتى هاتيا
ألا الفيران تطلع كمانى عليه

البنت قامت بعد كل ترجى
واللمبه في إيدها اليمين يا منجى
والثانيه فيها الصحن ، والمتهجي
شايله وراجه تدلقه المرزيه

صرصار من الحمر الكبار اياهم
طلع لها والبنت تخشى أذاهم
الصحن واللمبه راحت حادفاهم
في العين ودبت صوت يجيب دوريه

قاموا الى كانوا في الضلام والخبله
يفوقوا البنت العيظه الهبله
عم ابراهيم داس في البيصاره الفاضله
واخرتها شالوا البنت مسترخيه

بالفجل وحده كملوا عشوتهم
واخرتها ناموا وانتهت خوتهم
والى فضل من همهم وغلتهم
فاضل يادوب ساعه على الفجريه

عم ابراهيم بواب قديم في الصحنه
طول عمره منصاب بالكساح والكحه

شافوه نهارها نص ساعة اتضحى

العصر يومها سلمه الرفقيه

المطرب

هو الى قاعد قدامكم
وشكله ظاهر لعيونكم
له نفس ملوك
أول صعلوك

يادوب دا يصحى من نومه
يجعل فطوره على صومه
والشمس تغيب
كونياك وزبيب

مهوش لفجره ولا كفره
فقير يشوف الكاس ساتره
لكن غلبان
بين الإخوان

عاش ماالتقاش واحد صاحب
حفظ كرامته واتصاحب
ينفع فى الناس
هو والكاس

كان نوبه قاعد فى القهوه
جاله الى قال له على سهوه
مش لاقى القوت
ابنك ييموت

تقولش كان جاب له بشاره
سكت وقال هات لى سيجاره
بن ام قويق
واطلب لك شئ

مسح جبينه واتهد وظلام الليل
هجم عليه بلونه الأسود وسواد الويل

يقول له صاحبه ما تزعلنى كلنا أموات
ويقول له هو ما تعرفنى كلف الجنازات ؟

بين العشا كده والمغرب واحد جزار
داير يفتش على مطرب ولقاء فى البار

دعاه يغنى له وقاوله والسهره تكون
بعد العشا الليله وناوله جنهين عربون

طلع على التخت وفمه باسم فرحان
وكل ما ينوح من همه يقولوا له كان

فى سهرته الناس اتنهاوا على الحن نواه
وحقهم كانوا يغنوا وهو يقول آه

حامد عاشور

حامد عاشور المزين بالقرون والكاس
فى كل ليلة أحد تكثر عليه الناس

يصبح يجيب للوليه رطل لحمه راس
وفوقها وقه بطاطس أو راسين قلقاس

والجمعه ديه لقي لك غلته زياده
فرح وجاب العشا أكثر من العاده
وأخذ له حته وفوقها فنجانين ساده
وروح البيت من المغرب بشوق وحماس

بعد العشا ما انتهى حامد بقى طينه
قال ياللا قومى افرشى الفرشه وغطينا
قالت له قوم قبله نلعب واحده كوتشينه
ونقول نوادر جحا الرومى وابو النواس

حامد يشوف لك ثلاثه باربعة ياكل
الست تغلط وتاخذ بالمره راجل
اتلخبط اللعب لا باقى ولا حاصل
قالت له إوعك كده ، باين عليك فلاس

قامت تدعيس بين الأركان فى الصندوق
الله أعلم بتملكع وعايـزه خروق
قام لك صاحبنا ، قالت مالك كدا محزوق
اصبر يا شيخ لما اطلع لى قميص ولباس

خلاها تفرش وقام في الفرش واتمطع
وستنا لسه بتفصل وبتقطع
في دي الخروق ، اللي مهري واللي متبطع
عبال مانقت سي حامد نام وراح دواس

قالت له مالك كدا ممدود ومتصلب
نومك وأكلك وعيشتك كلها تغلب
في الفرش زي القليل دستور ما تتقلب
كأن شغلك يا عيني بالغلق والفساس

اتمددت رخره جنبه تفتح الموضوع
وحكمت كتفها بالعند فوق الكوع
واتكت ، اتألم الراجل وقام مفزوع
قالت له قوم سك باب الحاره بالترباس

صاحبنا صنم كده ، لا كافي ولا ماني
لأن منزوله كان من صنف عمياني
بربش عنيه حبه واتقنل ونام تاني
يحلم بطشت الصابون والعهده والامواس

قالت أنا يخنى ما اقدرشى على الميله
ونا النهارده بقول لك قوم وشيل شيله
إن غمنا والباب كدا نتقشش الليله

والباب وراه حلة القلقاس وطشت نحاس

ليلة ما تنوى السهر فى الفجر تدخل لى
ويوم ما تيجى العشا فى البيت ترخم لى
ون قلت لك بس قوم تربس تفجر لى
وتفتح الششمه وتفرج علينا الناس

وبعد ما كنت ماشى فى البلد معدول
شربت لى الخمره واتعلمت لى المنزول
ياخش سكران مدهول يالتقيك مصطول
قريضة تدخل تشيل الراجل الهلاس

حامد عاشور فى السرير نايم تقولش شوال
لكن صرخ المره خلاه نهض فى الحال
صنم لغاية دى ما استوفت كلامها وقال
أعوذ بالله كلامك يجرح الإحساس

قام لك مقعر بيورها انه قال فايق
وعدى من فوقها رجله ، قال بيتعايق
عتر فى راس قلبها والقلب مش رايق
قالت دا هم ايه يخنى قال أنا الهراس

بقى انتى يا وليه طول عمرك تلاوعينى

إن قلت لك جا ميعاد النوم تمار غينى
ون نمت تيجى فى عز النوم تصحينى
صدق صحيح اللى قال جنس النساء أنجاس

قولى لى على ارتأى لك فيه يتعيب
صحيح دى أمثال زمان تصدق ولا تخيب
قالوا المره لما تبقى أصلها طيب
من نفسها تعبر الراجل ولو كناس

قالت له إنت اللى متجبر وظالمنى
ولك كلام لما تدلع يآلمنى
وتروح تهيص على كيفك وحاكمنى
ونا اللى إيدى ورجلى ، حقها تناس ..

بزياده

ام خليل

فى حارة القدرة دلالة اسمها ام خليل
خمسين سنه عمرها لكن من المناغيل
وراهها قنطار شغت شايله وهم ثقيل
بالاختصار لما تمشى تفكر بالفيل

والبرقع اللى على الخشم العريض مخطوط
بالصنعه والفن فوق كرسى الخدود ممطوط
ما يظهر إلا عيون متكحله وخطوط
ويخفى داهية حنك واسع وصدغ طويل

الست دى يومى بتفوت م الصنادقيه
وتحب واد خردجى جنب المناخليه
تنظر لها م الدكاكين الصنايعيه
يتجتنوا الكل لما تنقصع وتميل

واحد يقول للى جنبه ، بص يا سيدنا
يرد دو كهات يقول يارب تسعدنا
ونزور مقامهم وتسعدهم وتسعدنا
آدى الحريم التمام آدى اللى منه قليل

إيش قولكم الناس دى ربت للمره وسواس
وخمنت نفسها ست النساء والناس
تفوت عليهم وتسمع دى المديح تحتاس
وتحرق الخصر وتقسط على الزنبيل

إن كح واحد تقول قصده يشاغلنى
ون تف راخر تقول عايز يقابلنى
ون بص راجل تقول مالك حاتا كلنى

أما اللى يضحك دا يبقى فى هواها قتيل

يوم رايحه للخردجى بالقيمه والحشمه
وهيه بين المفارق ماشيه فى الزحمه
أتاها شيال لا ذوق عنده ولا رحمه
غرف له غرفه من الحله وقال يا رحيل

حست بدى البهله بصت وراها قوام
ماتلقى فى السكه غير واحد أفندى تمام
نزلت على خلقتة أربع خمس أقلام
اتلمت الخلق حماره على مصاطيل

قال الافندى بذله : إيه جرى ياست
والله إيدى ماجات يمك ولا حسست
قالت ، ونا ، ماتعميت لسه ، ولاهلوست
يلعن أبوك دون قبيح طور بن كلب رذيل

قال واد هناك عربجى ، فى السجن تقييده
يعنى الافندى القبيح إيه اللى حايفيده
أنا اللى شايفه تمام لما تنى إيده
وقال عمل حجتة بيطلع المنديل

بقى الجدع ، إالى متعلم ، وإبن ذوات

في وسط كبشة غجر ، أولاد بلد قفوات
لولا وقف من سكات كان كلها لما مات
لحد ما راح بعيد عن دى الخناقه ميل

ون كنت تعرف يامسيد خصلة النسوان
وعا لخصوص المره الوحشه ام خلقه دهان
تعمل ولو بالفضيحة في البلد إعلان
عن نفسها ، والغرض تهم في شاب جميل

لجل اللى عايــــــــــــزاه يغير محالا وبخطبها
ويقول خلاص يا ولد دى الناس بترغبها
ون حد غازها تعطــــــــــــى له بشبشها
ومن هنا تلتقى حاجه اسمها التغفيل

راحت على الخردجى قالت أنا جاياك
آخر مجيه ، عشان أعرف خلاصى معاك
إنت بايعنى ، وكارهنى أما انا شارياك
والشئ دا يلزم له وخصوص الجواز تشهيل

روق لى في المسأله بالعقل واتأمل
أحسن أنا غير كده ما قدر بقى التحمل
فضيحتى ما بين جيرانى واللى حايكممل
بهدلتى دلوقت بين الهبل والمخاليل

إيش قولكم ان الكانون دخن عليه يا ولاد
والحرمة قامت وراحت واخده منه ميعاد
من بعد أسبوع يكون كتب الكتاب عالواد
إلهى يلطف بعده ليلة الهلاهيل

باريس خلاص

يا مسلمين لما اسكندر حكم على الدنيا ودبر
شاف المداين واتخير إسكندريه وسماها

يوناني ويحب الفاره ورخره زيه ام مناره
جبار وعاشق جباره طلع هواه وفق هواها

إسكندر اللى بجنوده الشرق والغرب ف إيده
والإنس والجن عبيده باسكندريه يتباهى

وافقت عظمته وجبروته لا يفوتها لحظه ولا تفوته
الإمبراطور فى تابوته نائم هنا تحت ثراها

أما احنا ياسكندرانىه طلعين جميعا شضليه
طبيعته فى الطين والميه متركبه تحت سماها

الاسكندراني إذا صافح يغلط ساعات ويروح ناطح
وارثها عن جده الفاتح فحل الملوك الى حماها

الاسكندراني إذا اتخلى جلف لكن له مبدأ
يفواه لحد ما يتزحلق في نايه عمره ما ينساها

الاسكندراني إذا اتحمس يفقد صوابه ويتطلمس
لحد ما يروح متكربس في نقره إبليس يخشاهبا

لكن يقوم يغسل وشه ويروح يجيب الى غشه
خلقته ويروح ناتشه راسين يعيش مسخه بعاهه

ونا الى جيت من سياله فيها العيال والرجاله
شجعان ولكن بهياله يا نتصر يا أكلناها

الرب ..!

الرب في الشام عبيده علقوه على عود
وياما أرباب هنا شبعث ركوع وسجود
رب السبرتو ، ومن مثله مفيش موجود
ورب للنور يطلع من إديه معدود
ورب سايق ترام ، سلطانة غير محدود
ورب في حينا ، اسمه الشاويش مسعود

والعمده في كفرهم غيره مفيش معبود
واحننا لنا رب واحد قدهم وقُدود
في سابق الغيب خالقهم طعام للودود
ون كنت تفهم حاتوصل من عامود لعامود !

العودة

غلبت أقطع تذاكر	وشبعت يارب غربه
بين الشطوط والبواخر	ومن بلادنا لأوروبا
وقلت عالشام أسافر	إياك ألاقى لي تربه
فيها أجاور معاويه	واصبح حمايه أميه

جاورت قاسيون وجيرته	توحش ولا فهش حاجه
وعزرائيل انتظرتـه	ماجاش وجاني الخواجه
نافخ وسابق إمارته	وقال لي شوف السماجه
البر تحت انتدابنـا	اخرج ماهيـاش وسيه

رجعت للبحر تاني	مغفور وراجع فرنسا
ولسه طعم البوداني	فاكره وانا عمري ماانسي
ون رحت تونس كفاني	عذاب أنا والتوانسه
« غاملان » محضر مدافن	للأمه والأمه حيه

في بور سعيد السفينه رست تفرغ وتلا
والبياعين خوطونا بكار ت بوستال وعمله
لكن بوليس المدينه ماتزو غش من جنبه غله
يابور سعيد والله حشره ولسه ياسكندرينه

هتف بي هاتف وقال لي انزل ومن غير عزومه
انزل دي ساعه تجلي فيها الشياطين في نومه
انزل دا ربك تمل فوقك وفوق الحكومه
خطيت في ستر المهيمن للشط يا حكمدارينه

واقول لكم بالصراحه الى ف زماننا قليله
عشرين سنه في السياحه واشوف مناظر جميله
ماشفت يا قلبي راحه في دي السنين الطويله
إلا اما شفت البراقع والبلده والجليه

غنيت .. !

غنيت لقيت جيش يغني قلت ما اكرها — الأول — آه
جيت للربابه ، ورايه ، قلت حاكسرها — والثاني — آه
ياولاد ، أدى التالته بنسلطن في أوتارها — والثالث — آه

الأوله ليه ؟ والتانيه ليه ؟ والتالته ليه ؟
الأوله ليه يغنى دالى صوته نشاز ؟
والتانيه إيه قصده منى ، دالى مدهون جاز ؟
والتالته ليه بينازلنى ، دالى بيتيه قزاز ؟

الأوله مين ؟ والتانيه مين ؟ والتالته مين ؟
مين ييكى عالقطن ويعدد على اللى جناه — لطناشى ؟
مين ينظم اللحن يدخل كل سمع صده — يا مواشى ؟
مين يعلن الحرب لوداعى المروءه دعاه — يا طواشى ؟

زوجة السجان

توفى فى الحى غانم مصطفى السجان لاله بنات كان مخلفهم ولا صبيان
فايت لهانم مراته ١٦ فدان وكل ده من رشاوى الأكل والدخان

وأما هانم فكانت ملحمه متخن تتحط فى شهر طوبه عالرخام يسخن
وقت القضا لما شافت جوزها بيدخن عطت خبر لامها جاتها فى وش أدان

خلوه بخلص بروحه عالفراش وفاتوه ولموا كل النحاس ويا المصاغ ربطوه
وهب شيله على بيت امها بعثوه فى قولة الله أكبر كل شىء اتعان

واتدورا والتقوا الراجل فطس وخلص لا احتاج لغمضه ولا فاتحه ولا إخلص

وروحه دى الى ما كانت إلا فى بلاص طلعت تبرطع ما بين مالك وبين رضوان

هانم دى قالت لامها حطيه على القبله قالت لها لسه مش دلوقت يا هبله
خليه بنومته وقومى صوتى قبله ونخطه عاتقبله لما تحضر الجيران

صرخت وقالت ياسبعى يالى قانىنى يى يى
يالى بنارك ياخويه رحت كاوينى يى يى !
بعدك ياغانم ياسبعى مين يهينى يى يى
صوات يا فندم ولكن زلزل المحيطان

جات القرايب وجات كل المعزين تسعين مره مشلشله واكر من اذ ٩٠
وفى الزقاق رجالتهم عالدك قاعدين واتحضر النعش والبيت اندرز نسوان

وانشال سى غانم مرابعه بعد ندب كفاه
ولطم كان يستحقه فى حياته قفاه
قدامه جدعان حارثهم والصبايا وراه فيهم مراته عليها النوحل والقطران

انخط لك غانم السجان فى حفره وراح نزل مؤبد فى زنزانه بغير مفتاح
وزوحت ست هانم قبل ما ترتاح

خشت عليها اخته (كامله) تاجرة العصبان

قالت بقى ياستى هانم: إنتى عارفانه وعارفه إن ام غانم نايه عيانه
وله كان أخت تانيه عاجزه غلبانه والتركه فى ذمتك ، والدنيا ماها أمان

قالت لها يا ختى أحلف لك على ختمه بأن أخوكى ما كان حيلته غير الهدمه
ولسه حاعمل كان من عندى أنا الختمه واطلع له بالرحمه واعمل له أنا الخمسان

وان كنت بكذب يا كامله رنى يسخطنى دا حتى يحتى أخوكى كان مقشطنى
ون كان على العزبه صبرك على فى بطنى حسب ما يظهر لنا تنقسم الأطينان

بصت عداكى المره فى بيت سلفتها تلقى النحاس اختفى والصيفه شالتها
قامت تودى الخبر لاهله وفاتها معاها أربع مشايخ يجتموا القرآن

فى الأربعة دول فقى عاجز نظر وخبيث قاعد مقرص وفاتح جبهه الإبلين
لأنه عارف بقى المنزل ما فيهش أنيس غير المره والمشايخ كلهم عميان

كحت وقالت لسيدنا صاحب العمله تعرفش تقرا لى عديه ياسين كامله
الليله حالا وتقلبها على كامله بنت ام غانم وعيشه بنت خضره كان

قال الفقى كل شىء حاضر وانا خدام لكن مافيش وقت ياللا استعجل لى لقوام
واعطى المشايخ حسابهم يذهبوا بسلام ونا أبات لك بعديه يسن سهران

راحوا المشايخ وبات سيدنا بقيت الليل يعد فى السبعه من راسها لحد الدليل
عبال ماجا الصبح كان انهد منه الحيل ونام على الأرض واتمدد فشر حيوان

قالت له دلوقت حالا ، أهله حايجونى وأهل حارتى كان جاين يعزونى
قوم ياللا عالخوش لا يتلموا يضايقونى لا عايزه ميم ولا عايزه هنا عزيان

وقامت الست حالا حضرت صندوق مليان بكل اللوازم من شلت وخروق
وقبل ما تقوم من النوم الجيران وتفوق جرت صاحبنا الفقى، واستفتحوا الصبان

خشوا على الحوش وكان سدنا الفقى داخ رمى العصي من يمينه واترمى ساخ
جاها الحانوتى التقى باب البتاع خايخ زقة، انفتح، دنه داخل عالمه فرحان

قالت ياهوى حسبتك والله حد غريب قال اطمأنى! دنا من أكبر المحاسيب
ودالى نايم عدو؟ ولا معانا حبيب؟ قالت دا راجل فقى عاجز نظر غلبان

وفات كان أربعين غانم وخمسين يوم نهار وليل خلتي هانم فى القرافه نوم
وبعدما روحت جوها قرايه: القوم قالت لهم لما أولد، لسه فى رمضان

الفقر

البيت أبو درفتين فى حارة البغال وتحتة دكان جدع أسمر خفيف بقال
فيه فوق مره ملحمة جوزها من العمال فى شغله جمعه، وجمعه يترمى بطلال

أما المره بنت عيله أصلها من بيت اتهد وانشال أساسه زى ما اتهديت
عاشت معاه بالوفى زى العسل والزيت سبع سنين بدرت فيهم بست عيال

الوقتتين الدقيق ياكلوها بالتدقيق أما الغموس غمسوه (بالدمعة) والتحديق
ويعلم المولى والبقال بالتحقيق غير الزتون ما اشترت من عنده دى الأطفال

بعثت له يوم الولد لما انضنى حالها والباتشاويش الى ييلم الغفر جالها
قال له الولد، مختشى، وف إيده خلخالها بتقولك أمى النبى سلفنا نصر ريال

شاف الجدع وسع خلخالها الى زانقها مصدى من جوه من مطرح عرق ساقها
فكر وقال دى مره سبحان خالقها خلقها محمل وجوزها صنعته شيال !

روح يا ولد قول لها رهن المصاغ ده عيب وخذ أهور ريال بوشه ، والريال فى الجيب
وقول لها فضى فكرك م الوفا والغيب شوفى انت نفسك وروحك والببى الخلخال

قالت لجوزها الحكايه راح له دكانه الصبح يشكر له معروفه وإحسانه
صبح قوام الجدع من عز إخوانه يا حد ويعطى حسب ماتسمع الأحوال

إن سيح السمن نوبه يشحت الحله ون عاز ييل الزتون يشحت كان قله
ويشحت المشط راخر يوم ما يتفلى ويوم ما يكنس محله يشحت الغريال

قلبت محبه داخلها الغش واليغنيش وصار كلام الحبايب كله بتوشويش
والراجل المنكسر كان يحسبه درويش لما قالت له الجدع ده والنبي ابن حلال

يسأل عليك كل ليله قبل ما يقفل وكل شىء بيعته لى : ملح أو فلفل
دخل عليه الفتيل ياعم واتغفل كانت خيطان المحبه اتبدلت بحبال

إن كنت يا ابن العرب راجل فقير وضعيف فوت الجواز للغنى، واقعد وحيد وشريف
دى العفه غاليه ولكن تنشرى برغيف والفقر يرمى العفيف فى أوسخ الأحوال

فيكتور

الحب ده حاكم، وحاكم جاهل يقتل ويأسر في المره والراجل
جانب الشريفه تحت رجل السافل وجمع المسلم على اليهوديه

داير بكاسه والأثم عطشانه يستنظر السهران على السهرانه
يسقى اللى فى المسجد وأهل الحانه ويور الأديان على الأنبياء

كانت يا روى بنت عبد الباقي نجار وله ورشة عجل وسواق
وسع فى رزقه من خسف أرزاق هى الوحيدة ، والوحيد هيه

لابسه الغوايش بالبدست واللبه والبودره فوقها تندلق بالعبه
أما الملايه تنشط للركبه زى « الشلختن » ، واسمها نبويه

أم البنيه عالنسا منفوخه بعزها ، وبينتها مفشوخه
وف تخنها الباسل قوى ملبوخه بعد العشا تبرك على الطليه

البنت تخرج تشتري دتيللا وتعود وترجع تشتري كرملا
سن الخمستاشر سنه يتسلى بكل لعبه يالى عنده وليه

« نبويه » حبت خردجى طليانى مولود مولد له قوام رومانى
وعيون من الشرق الجميل غزلانى مكحلاهم والدته القبطيه

فيكتور يروح له الأكل والبقلاوة في كل موسم والصيغان تتساوى
ومين يزود عالخلاوة حلاوة غير النسا ، يارب حن عليه

يوم الهروب كان يوم وكانت ليله اتلمت العيله — وعيلة العيله
سيد من يشعلل في البلد شعليله دقت في باب الخلق والداوديه

قال اللى هوه : « بتتكم في غمره إن كانت البنت الطويله السمره
وشايله شنطه بالأماره حمرة في بانسيون أم اسعد البيروتيه »

قال المعلم : « قوم يا خضر معايه ! » قال خضر « تفرج دول ياعم حمايه
أقتل لي واحد واتوحدل في حكايه أهيه جدعان البلد مرميه »

راحوا الجماعه البانسيون واصطفوا شتموا الطلاينه والشوام واستكفوا
استخفى سى فيكتور مع اللى استخفوا والبنت بانث لك وعينها قويه

الأم ساقط في المصيه عباطه شاورت وقالت للجميع ببساطه :
« يا ناس فضحتونا هنا الخياطه اترمح يا راجل هات لنا عريه »

الجماعه

لما الجماعه الغجر يتعلموا اتمددين ويركبوا الكهربا ويطلبوا الكوانين
الأرض تصبح سما والعيشه تصبح طين يتوب علينا وعليك من رؤيه السافلين

أبو على التوفى صارت دينته دانيه أول ما غير معيشته خد مره ثانيه
والدنيا لو ما الحظوظ والعنطره فانيه جاب الحواض الرخام واتعلم الفازلين

له بنت فى المدرسه نالت شهادتها لكن عادات أهلها فضله وعاداتها
المريله والدفاتر لم أفادتها تخش فى الفضل فى ديل الجنله عجبن

لورحت بيتهم تشوف قال الصالون مفروش على البوفيه القزايز جنب منها شاكوش
وعالبيانور غيف جنب الرغيف طربوش أما السبارس منافضه الأربعة طافحين

والبنت بعد الحجاب عملت فى بيتها رول تقرا القصص والكتب أما الكتب أهى دول
تختم قصص سنكلر تمسك فى رو كامبول برعت فى علم المحيه . لا أدب ولا دين

مرات أبوها الى كانت فى الكلار تطبخ والبنت بالقيمه فى وسط الصالون تنفخ
ناس البصل خش فى عنيتها البصل تصرخ وناس بنضاره تتفرج على الماشين

قالت نبيهه لسنيه فين أبو كى يشوف بدعك وفجرك وشخلعتك على المكشوف
لكن يسهل عليه ويكون فى عونته خروف ينطح مخالى العلف ويحن للسكين

قالت سنيه النبى تلمى هلاهيلك ووجهى همتك فى البيت لغسيلك
يكفانا من قعدتك جهلك وتغفيلك وقال كان البهايم يشتموا الراقين

قالت لها يفضحك يابتاعت النقابات يالى فنيتى الورق فى كتابة الجوابات
وحياة مقام الحسين مثلك ما شفت اتين سيرك ملخفن وسيرتك سوده فى الجرائين

دقت خناقه ويامين في الميدان ينزل نبيه بالكف تصحن عالكانون فلفل
والثانيه بالمروحه تحلف وترهدل لبست نبيه الملايه والحلل ناقصين

قامت سنه طفت بعد الخناق النار وفانت اللحمه نيه للقطط وخضار
الصاغ فضل عالحصيره وانخرط بار دخل أبوها عتر بالجبه في المواعين

حكّت سنه الحكايه قال لها معلوم تعيش ربايه المدارس عاليوت وتدوم
يكفى «جزم أخ رفعه» والعشا دقشوم إنتى غزال المدارس والى زيك مين ؟

حانة مانولى

الفرق بين ابن آدم والخروف معروف إن ابن آدم بعقله في الخطر محفوف
أما الغنم فاللى داخل في وسطها فايز لبن، وزبده، وبصطرمه، وجلد، وصوف

وفي البلد ميه . والقارين على الكاتين سبعة ، ومعنا الحمير اكثر من التسعين
إن خش في دول ودول الفجر والتمدين نشوف مسخ شبراخيتيه —وياما نشوف

حانة منولى المليانه ليلاتي من صنف الإسلام
لواحد واتنين سهرانه حسب بوليس عابدين ماينام

قاسمها نصين لزباين فيهم صنايعيه ولصوص
والنص أعيان وتخاين مكتوب على بابهم (مخصوص)

عبد الله افندى ليلاتي هناك وشله من أهـل الحاره
ورا القاطوع يشربوا كونياك من دون زباين الخماره

فيهم عمـر بك المسكين الى المعاش خلاه رخـرخ
والشيخ شفيق شيخ العايقين بالعمـه والجبهـه السخـخ

واتنين تجار واحد جـال والتاني بقـال بالجملـه
واحمد خليفـه مقـاول قال يورد الجير والرملـه

قال عمر بك للجميع ياولاد قولوا لي ده صحيح عبد الله زعلان من منولى؟
له ثلاث أيام ماجاش. مين يندهولى لـل اشوف إيه الخبر إيه القضيـه؟

رد صاحبنا المقاول قال : بسيطه ! بس عبد الله الى عقله عقل حيطه
عالحاجات الهايفه يعمل ألف زيـطه والحكايه كلها فارغه وهفـيه

الحكايه ان الخواجه عنده دوشه بره واسيادنا الرعاع عاملين له ورشه
جاب له ليلة الغضبه عالمارتيل كرشه اتحمق سيدنا ده واتعزرن شوبـه

بف له عبد الله عالكـرشه ورمـاهـا طرطشتنا بالإدام ، شوف النباهـه !
لأ ، وغير ماندار عليه شتم وسفاهـه راح كاسر له الكاس وحادفه بالصنيـه

قال شفيق الشيخ : ماهو الراجل بطينى من مثاله لم رأت عين فارغه عينى
والخواجه ده ولد طيب ودينى يستحى ان قال له الزبون كام لك عليه؟

قال عمر بك : لأ كان الواد ده نفسه يقبل الإسلام ويكره أهل جنسه
حتى لو كان درزى يكفى بس أنسه واللطافه والأدب والإنسانيه

قال لى يوم ياشيخ شفيق تاريخ حياته من ولادته لحد ما اتجوز مراته
واما ماتت أمى جاني هو ذاته يومها والبار اتقفل للمغريه

مزمر العطار وقال طب ليه دا كله بس يكفانا انه جنب البيت أقله
فين مخالى اللى احنا كنا بنسافر له فى الليالى والخليج مليان أذيه

(عبد الله افندى حضر)

دخل وشاف الغنم متجمعين كلهم
وشاف منولى ابستم سلم عليه قبلهم

استغرب اليه عمر وقال له ياللعجب !
وشك دا ولا القمر قال كل شىء له سبب

يقول لى جارنا على فيه ثوره قال فى البلد
قلبي عدوك غلى نزلت اشوف الولد

قال الفقى قول لنا الكرشه أصل الزغل
شىء نعرفه كلنا فضك بقى م الزغل

اليه نده وقت دى على منولى . حضر
قال مين بقى المعتدى فيكم هنا يا غجر ؟

عبد الله قال من زمان راح الزعل وانطوى
وقال منولى : كان عملنا غدوه سوا

يامدغدغن بعضكم يا منفعين الناس يا مكسرين جنسكم يا مجبرين بابولاس
من كان على شكلكم أجسام بدون إحساس حمض الفنيك والسليمانى لهم موصوف

القاهرة فى الصيف .. ؟

يا مصر فى الصيف نهارك للسقيم حمام بيداوى
مع العرق ياما تخرج ، م البدن أسقام وبلاوى
ناوين على اسكندرية ؟ قلت هذا العام مش ناوى
خلى الشواطىء لأستاذنا رخا الرسام والصاوى

فى الليل نسيم الفرنده يجمع الخلان ع البهى
والبدر ساطع على بشرف نغم كروان متجلى
تعال اما اقول لك خبايا المنظر الفتان وتقول لى
وانسى هوى كليوباتره ولوران وستانلى

يابو العيون شد حيلك وامسك الكرباج واتشمر

وادخل على الحور عرايا في حمى الأمواج واتنحدر
وقول لهم عيب عليكم تكشفوا لنا العاج والمرمر
عقبال ماشوفكم عرايا في هب وهاج في يوم اغبر

خليل المنزولجي

خناقه دقت بين خليل ومراته كان السبب فيها التلوع بتوعاته
أبصر خروقه ولاهم لباساته ... القصد جتهم نبله هو وهيه

ناموا على الدكه في ليلة الجمعة من بعد ماتعشوا وغطوا الدمعه
وكانت العاده يطفروا الشمعه إلا الهوى يرفع ديل الناموسيه

خليل قلق في الليل وقام يتعم وكان من الحرمه خايف ومتيكم
خاين على سريقة الطيخ متعلم والليله قاصد حله الملوخييه

وقام يحس في الظلام ويطشش وكان ليلتها بالمناسبه محشش
ومد ايده ادلعدى ييفشش يكرم مقامكم صادف القصريه

خليل مشي يجبي تقولشي مكسح وجاب طوره عيش من سكات واتزحزح
وشمر الزنديين كدا واتنحسح وقال نويت اخرب لها التمليه

قالت عديله تنضرب في كمينك هو العشا نوبتين حرام على دينك
جاك سم هاري انشالله في مصارينك مسروع وعيلتك كلهم حرميه
(بيرم التونسي)

راح متعازم لك بالقلم وعطاها وعضها فيدها اليمن ولواها
وشرط الطرحه الى كات شاحتها من اختها أم سداحمد الخضرية

دارت بين الراجل وبيته وغاره لما بقى صريحهم يرج الحاره
لولا ما طلت م السطوح الجاره قالت ياناس مالكم على الصبحيه

قالت عديله دا الراجل دا تعبنى يا يعيش معايا حلو يا يسينى
تلات سنين يادلعدى مغلبنى وكايدنى ومغلت ليلاقي عليه

أنا الى خليته عليه القيمه وكان داخل لى بجلييه قديمه
لو كنت واحده بنت كلب لئيمه خليته شاف النجم فى الضهرية

قالت جارتهم دا النهار راح يطلع قوم يا خليل خد بلغتك واتنع
ومن النهارده توب وإوعك تطلع يا إبنى دا المنزول عواقبه رديه

أختين شقايق

أختين شقايق أصلهم من طنطا فى بطن واحده مولودين وف خطه
لجسمهم فى المشى شيله وحطه تجنن المسلم مع النصرانى

فى اسكندريه الى اسمها صبريه أخذت معاون حجز فى البلدي
أما عزيزه التانيه فى الحسينيه فى مصر واخذها جدع حلوانى

في الصيف تشوف صبريه صاحبه عزيزه — حاسين ما بين الشاطبي والمفروزه
وفي الشتا بين الحسين والجيزه — وكل شيء غير الخطوط دي فاني

عزيزه في الصيف اللي فات اشتاقت — لام الخلول لما الحلاوه انداقت
وقبل ماشالت عزالها وساقت — قالت لجوزها اختي السنه عازماني

عند ابراهيم بك اللي يعدم عنيه — بينهم مسجل كتراتو وبينه
يجواله في البيت اللي في بوالينو — المستحضر للزنا والزانى

يلم أنطاع البلد ويقاول — على الذوات وبإسمهم يتطاول
يقول : أجيب واخدلى أجر مناول — بنت الننا... ومراة الغر...

في يوم مطين كات زباينه قليله — قاولوه مكفى عاجنيه بالتيله
إثنين : واحد تاجر ، وتاجر نيله — والثانى فى مينا البصل قباني

جابوا الزيب والوسكى واليوسفندى — وعلبة الكيف والمزاج الهندى
وجوز صوانى واحده فيها الدندى — والثانيه فيها الكستليه الضانى

بعد الغدا والسكر واللى اتحكحك — عم ابراهيم عايز بقى يتمحك
راح كلم الاثنين وهو بيضحك — قال الجنيه مدفوع لكاني وماني

وناللى حاطلع من بناتكم صايح — راسمالى من عندى والتعب دا ضايح

لو كنت شارى فى المقبلى وبابىع أقله كان عندى رغبى عشانى

قال الى من مينا البصل نتحاسب الغدوه أجره والجنيه دا مكاسب
قال صاحبه (لليه) الطلب ده مناسب لكن «نشوفك» لما نرجع تانى

خرجوا الزباين والرقيب مارآهم وبعد ساعه ، والصبايا وراهم
فى زنقه وقفوا يحسبوا فى كراهم الهايف الى يشبهه المجانى

قالت عزيزة كام يا بنت عطاكى الراجل النيله الى كان وياكى
قالت ريال الى عطاه لى معاكى بيده ابراهيم ولا انضرب فى لسانى

ونا ابراهيم عارفاه رزىل وحرامى وشفته بيخبى الجنيه قدامى
راخر حايعمل زى نصر الشامى الى نحرنى فى الفلوس وكوانى

ركبوا محرم بك على الأنفوشى والفكه شىء غير الريال ملاقوشى
قبل الغيار والنقل فى الطرطوشى الكمسرى قال الريال برانى

طخوا التمايس عالقدم مشوارها للبيت فى حر الترسخانه ونارها
لقوا المعاونا متجعص ونهارها حاجز على أربع حلل وصوانى

حاجز على دكان فطاطرى مقدر عليه عوايد قد منزل واكثر
والمجلس ان جاع والاقسطه اتأخر ما يعرف الطباخ من الزلبانى

قال للمرء مالك كذا زعلانه قالت له أختي من يومين عيانه
جوزها ضاربها النذل بالخرزانه علقه اما خلا لحمها بدنجانى

شافها الحكيم قال الدراع متنع مطرح مايتحرك فى حته بيوجع
لكن إذا تعالجت قوامك يرجع إن كات تحينى كل يوم والتانى

قالت عزيزة ينضرب فى حشاته كل الى مايعمل مقام لمراته
لو كنت أعرف سكة الأفوكاتو ماكنت خلعت العويل دا قناني

قال المعاون اختك اما تحيكى فى مصر تبقى كل شىء توريكى
بس اما تصحى وربنا يشفيكى يحلها الى يحلها ربانى

فات صيفيه خلصوها علاوله مكسب مافيا والغوض عالمولى
قالت عزيزه مصر بيه أولى والى حصل م اسكندريه كفانى

من تبقى لا مانع لها ولا مانعه وتكون براجلها الوحيد ماهى قانعه
وتعوز تفتش فى البلد على صنعه تقوم تشغل وسطها التحتانى

خناقة (في الفراش)

— الزوجة

— إيش خلا ياروحي حاتبكي
— طول عمرك بيهم تشكي
— كل دا من شرب الوسكي
— ادهن ألماني وتركي

— الزوج

— يامدغ—دغ خالص ياني
— ركبي الليلة تاغباني
— والنهج رج—ع لي تاني
— وصفوا لي دهان ألماني

— اعتقني الانا طهقانه
— ماقدرشي ياشيخ عيانه
— العين ماتبوح بأمانه
— اكني كان بردانه

— بالذمه تجسي بديكي
— حلفتك إخص عليكى
— مش باين ليه في عنيكى
— وكمشتى كان رجلىكى

— برضك قول مدى وهاتى
— ما اقدرشى ابدا ياخواتى
— ما احملش اهم لى—لاتى
— اسكت لانبيه لحماتى

— مديهم حالا تدفى
— همسه على الهامش تكفى
— علشان ياغيطه تخفى
— هاتى كتفك كده على كتفى

— مهو فعلك بيجننى
— والله انت الى مبهلنى

— مانا عارفك وش فضيحة
— عمرك ما سمعتى نصيحه

— لكن في الردح فضيحة — طيب بس ابعده عني
— بتزقي كان يا قبيحة ؟ — أيوه وقصدك إيه مني

— بالحق انا كنت المذنب — مذنب على إيه يا عنيه
— الليله دخلت المغرب — أدخل حتى الصبحيه
— ولقيت وشك متشقلب — خذلك واحده افرنجيه
— والبیت راخر متكركب — هات لك واحده لوانجيه

— وحياتك والله مسيرها — يفرجها عليك ويهون
— برطوشه تروح تجي غيرها — شيشوني كان يتلـون
— واعرف سيرك من سيرها — الخاين طبعه يخون
— وأشوف دى الدنيا وخيرها — وادخل أنا رخره واجون

— ومسيري كان أوريكى — ياما قلت انك تورينى
— ياما لسه حا عذب فيكى — إمسك فلقه وقرينى
— وانزل كدهو واهريكى — ليه ؟ كنت ياخويه شارينى
— طب هس اخرسى لاديكى — إوعك بس تعرينى

المأذون

فلاح مجاور فتح مكتب خطيب مأذون
يجوزك بالمقاول به ولا بالعربون
شاف الوظائف عسيره . والمهايا دون
قال كل مكسب يكون عند العرب صابون

استفتح الشيخ في أول ما اشتغل بطلاق
حرمه أميره وجوزها سيئ الأخلاق
والقاضي يحكم في شرع المسلمين بفراق
على المره المجرمه والراجل الملعون

الست من ناس زمان صاحبة أدب وكمال
م الحشمه دول اللى لا ليه ، ولا خلخال
واللى ما اعطاها صيفه ما عطاها جمال
يكفى التقى والصلاح والملح والكمون

كان المجاور عيط عمره ماشافنى حريم
من يوم ما أزهر لغاية ما انتهى التعليم
شاف المره حشمه لا خاتم ولا مباريم
قال ماشاء الله كان واللى ماشاء مايكون

والله ، كان حج جوزك ده ييوس رجلك
لكنه فاسج لا يصلح لك ولا يليج لك
لازم أشوف لك أنا راجل أمير مثلك
م اللي يحافظ على عرض النساء ويصون

قالت أنا واحده لا أبيض ولا أحمر
عايزا لي راجل لا يتمرقع ولا يسكر
يعرف مقامى ولا يرم ولا يسهر
وانشا الله آكل معاه ملح وبصل وزتون

بقت تروح للمجاور كل يوم نوبتين
ولحد ماشاف لها الراجل — مضى شهرين
راجل توفت مراته وخلفت طفلين
عايز لهم واحده لو خان الزمان ماتخون

قال له المجاور : أنا عارف مره حره
عينى ماشافت كده أحرار بالمره
وبيتها ملىان « نابوليا » من بلاد بره
رأيتها لما انتهت م الراجل المجنون

فيها البساط بس وحده يفرش الجامع
ودولاب عجيب من آروبه من خشب لامع
وبعلها ، لما كان فى عفشها طامع

رهن كراسيها عند الجهوجى « أنطون »

أبلى العيال بات ليلتها عالمه عاقد
والمهر كله ، ثلاثه جنيه ، وراح ناقد
وبعدها بجمعه كان فى حضنها راقد
شاف لك دى حته مره أنشف من العرجون

الـبين نحل جسمها — والهـم كاويها
والقهر راخر متمم شغلته فيها
والموت هجم عالجبايب من حوالها
خلا الغريب والحبيب تحت التراب مدفون

فى ليلة الدخله لابساله القميص ساتانيه
والشنتيان فوقه والبلطو القطيفه عليه
أسود طويل للقدم ، تفصيل كمال ، وإديه
بكر ك أبيض عريض والصدر بالكبسون

أما الموبيليا اللى كان طايـر بها الأستناذ
صندوق بسبعين وستاشر صفيحة جاز
فارغين وفوقهم قباقيـها ثلاث تجواز
وبرمه فخار ، ودفايه ، وست صبحون

وكليم مخطط على مبرد صعيدى عتيق

لو يتفرش في المياتم عالدكك ما يليق
وشلتتين قش كاسياهم بديمي غميق
والطشت ويا الكراسي من سنه مرهون

صبح العريس يلتقى الراجل يستنظر
عايز الحلاوه خروف ، ينحط في أنجر
ضحك وقال نهارك يا عريس أزهر
قال له نهار زفت متقطرن ياشيخ ينسون

إن كنت تهوى الكمال والجد والعفه
ولو تكون في عضام تنحط في قفه
يا كنت تسبق يابو معشر وتلفها
ياتشوف لها في البلد راجل ماهشي عيون

قال المجاور مادام مانــــــــــــش بجا مبسوط
لا الباب مسمر ولا جبل الحمار مربوط
طلقها حالا وانا اجيب لك مره بشروط
ترضيك. ومقصودي إنك تبجي عندي زبون

الثورة المصرية ١٩١٩

الفحل يضرب بالقله يطلب استقلال

مالك شهقتى على العالى	ياللى مالك زन्द ؟
مالك يا واقعه طوالى	فى طريق الهند ؟
يا راضيه بالنسيو المالى	يفقرك بالعند
والقطن ينضاف عالفله	جوا بيت المال
والفحل يضرب بالقله	يطلب استقلال

وتبصى فى الناحيه الثانيه	تلتقى القاضى
فارش وقاعد بالعنيه	للكل فاضى
يعد عمرك بالثانيه	ويعيد الماضى
ويقوم ويحجز عالحله	ويجب الدلال
والفحل يضرب بالقله	يطلب استقلال

ون قلتى آه يا خواتى يانا	ينضرب تليفون
م القنطره للشفخانه	يحضر الكركون
بالسكويت والجبخانه	والحاجات البون
والخرق ينسد بقله	والزعل ينشال
والفحل يضرب بالقله	يطلب استقلال

ون قلتى صبرى وجهادى	دالى عدى وراح
ون قلتى ماتت أولادى	فاللى مات ارتاح
والحى ساكت والحادى	له بكاء ونواح
ويشوف خيال الفرقله	ينكم فى الحال
والفحل يضرب بالقله	يطلب استقلال

تفضل معاكى الشرطيه	ون طلبتى حقوق
تظهر سوارىخ رسميه	تربط بخروق
والحجه تصبح مهرية	ممتليه شقوق
ون كان ما تنفع دنتله	تعمل غربال
والفحل يضرب بالقله	يطلب استقلال

إيه نابنا بعد الحروب ؟

بعد الحروب الى هدت قلبنا الموحوع
طلع منابنا ، شوية خردوات وبتوع
وكام جبارين مشمع ، نصهم ممزوع
وجنبهم ربعميت مليون جنيه مطبوع
وكام حمار حرب أصبح بالغنى ممروع
وجيش بنات اسمه أرتيستان يقوده الجوع
وفوج مهاجرين أكاسره ، ذكرهم ممنوع
أجروا المشاريع ، ولم نعرف لهم مشروع

ولسه جايك معاهده « غير ذات موضوع »
تمص عود القصب وتفوت لك الزعزوع

يا مصرى

يا مصرى ليه ترخى دراعك
ونيل جميل حلو بتاعك
والكون ساعك
يشفى اللهاليب

خلق إلهك مقدونيا
والكل زايطين فى الدنيا
على سردينيا
ليه انت كتيب ؟

وادى العراق نصب النصبه
وأرضك انت دهب خصبه
ودخل العصبه
من غير أنايب

لكن قعادك متخبى
جعل جميع جرايع رى
عند «جروى»
تمد الكلاليب

قنى استوماطى أتوميله
وأملك انت اللى تجى له
وباع هلاهيله
تقطع جلاليب

وخالتك انت اللى تعامله
ويبيع لها كلونيا وقمله
وتهلضم له
بيدب دبب

وأختك انت الى سوارها وكل شوارها
من عنده هوه ومشطرها في ملو الدواليب

هناك يقابلوك في فرنسا بذوق ومؤانسه
لكن جيوبك ولا تنسى تحت التشطيب

ما تحط نفسك في العالى وتبناغ غالى
وتتلف لى على فى بالى من غير ما تعيب

وتقول له كرماء لضيوفنا لكن صوفنا
ما يتتلفش إلا بكيفنا وييد حبنا

استقلال عدلى باشا!؟

قومى اقلعى الطرحة السوده يام الهرمين
وركبى السورده الموده بين النهدين
يام الخصال المعبوده أنا احطك فين
جميع لوازمك موجوده ع الراس والعين
إن كان هلال ، ولا استقلال ، ولا رواق بال

على الفوانيس والحنه ياماً بكيتى
مختيش يام « مشنه » ولا بقيتى

قالوا ماتر ضاش تستنى لما شكيتنى
فالعقد حايكون بالسنة عا السكيتنى
مخاش صومال ، ولا وش قتال ، دحنا ناسات عال

يا كتاف صلاة النبى أعرض وعيون غزلان
وطول من البحر الأبيض لامك درمان
وشىء مسمى ومحفض اسمه الخزان
وحوض ذهب ساعه منفض وساعات مليان
أما القنال ، زى الخلخال ، وطلوعه محال

ركك على الجمعة الجايه بالك على إيه ؟
حا تنعقد لك جمعيه وصالون وبوفيه
من كل كفر ومديرية بيعى باشا وبيه
يخيطوا لك ناموسيه وداير ستانيه
وابن الحلال ، نحت التمثال ، وادى الاستقلال

مدارسنا .. ومدارسهم

فى أرضنا للأجانب ، ألف إسكوله
يخرجوا بالألوف ، من غول على غوله
عارضين لجلب المكاسب ستميت حيله
ويجمعوا من جيوبنا المال بالكيله

وحننا وزارة معارفنا أم هليله
أم الحيطان والبيان والخطه والشيله
تاخذ ولادنا ، وبفلوسنا ، وبالتيله
يناموا فيها ، ومنها ، يطلعوا نيليه
أشطر مافهم مايكسبشي عشا ليله
واجدع مافهم يقول ياست ! ياوسيله
شوفي لنا حنة وظيفه تستر الميله

أوامر عدلي باشا ...

ارجع ياواد انت وهـوه بلا هلس امال
اقفل عليك واقعد جوه دى الناس دى عيال
مادام حانمشى بالقـوه مفيش استقلال
كل الجرايد بتقول لك اقعد فى البيت

مين اللى بيع النبـابـيت للمتظاهرين ؟
وانا انتشه أربع شـلالـيت شرطا جامدين
وارتاح من الطلبه العفـارـيت المصريين !
عدوا على الكركون صدفه خلونى بكيت

يخفى المظاهرات وسـنـينـها يامما ضرت ناس
كثير وما بناخد منها غير وجع الراس

ولا العجيبه سايقينها على بو العباس
خلوني بالعافيه أكبر بعد ما صليت

بلاش مظاهرات بالمره يا خوانا ياهوه
خلاص لباس مصر الحره رايحين يجييه
معمول لها عالكستره بعد ما ربطوه
جميل وغيره في الدنيا عمري ما رأيت

ارجع يا واد بالذى أحسن الله يهـديك
الأورطه طالعه والخزن متعبى فشيك
ما تخليناش عاليه نخرن ما يسيئناش فيك
ارمى الحجاره من إيدك وامسك سيجاريت

يا ابن الحلال طاوع دقنى روق دمك !
الدوشه ديه صدقنى شىء ما يهملك
فى ذمتى واللى خلقنى لا أقول لك
تفطرك يوم الجمعة على شربه زيت

أنا نصحتك وجنابك سيد العارفين
ارمح بقى قول لصحابك يمشوا ساكتين
وارجع قوام تربس بابك إوعى تقول مين
إوعى دماغك تدشدش زى ما دشيت

ستاتنا !!

عشان مايبقى مقامنا قبل كل مقام
ستاتنا تمضغ لبانه في الطريق العام
ويحركوا شفتين متلغمطين بإدام
والكحل ده كل عين متكحله بجرام
واللبس نايلون في نايلون من شراب الحزام
البمب فوضي ، بيعدم في النفوس إعدام
والست وياه تترقع ترقعته بنظام
في الموسكى والصاغه تتمخطر كذا. وياسلام
لما الخواجه باسيلي يقول لها يا مدام

احتلال سوريا

يام الضفاير ياشاميه يا جانطى خالص ياطريه
خوخك بكام ردى عليه وكلمينى عن الرمان

ياما في أيام أفراحك شعبنا عض في تفاحك
أيام ماكان سنك ضاحك ومحوطاه بزبيب لبنان

الليله فيكى بالشحبه ياما قدحنا وسيحنا

بالناش علاقه بالمخنه وأصل ترباسك خسران

خاتم الخطوبه في صباeck جاب هو لك المسيو بتاعك
حطى دراعه في دراعك وخشى وياه البستان

شافك كدا شرحه وبيضه وحاجه حلوه وعريضه
هجم وقال أهى دى الصيده يافا وحينفا وبر أمان

دخل ومدد في حماكى ونيتيه فى اللى وراكى
لكن بقى بيستاكى لحد ما يجس الخرفان

ياحلوة فين ورد خدودك وفين معاصمك ونهودك
يعنى الخواجه نحل عودك وصبحك حالك عدمان

فى السكة الجديدة

القطر ناوى على نيه عسى الله خير
يفك فيها الهزار اللى يجبه الـغير
ولو بلغنا ، ونشنا علينا طير :
سبع دول فى البلد رافعين بناديرهم
ده له على أرضها مخزن وده له دير

ياأزهر العلم إنت ازهر صحيح وشریف
لكن مع العلم أهلك كلهم م الريف
طالبین أجور المظاهره كل خطوه رغيف
وجبه كزمير بقفطانها ومركوبها
ون شالله يحكمها مالطی يرعى فى الحلاليف

روتر وفوقه مراسلين الصحف وهافاس
ناوین لكم عالفضيحه استعبروا ياناس
الرشوة وقت البناء تهدم بدال الفاس
يرجع عشان خمسة صاغ الاحتلال تانى
ونروح فى دوكة وإيد الاحتلال تنباس

بحشت لك عن حسين هيكل وطه حسين
وجدت إن التعقل للدكاتره زين
لكن أمور المهارشه والكلام بالعين
يضيع اللى فضل فى حزمة الأحرار
وأكثر الناس كان تفهم — وفيها عين

إذا أتيت يا صوفانى البرلمان احلم
البرلمان قال يحبك وانت لم تعلم
عشان عيونك حايعطونا السودان تكرم
إنت القانونى السياسى العالم المالى
تكتب وتخطب وتتناقش كان ! اسلم

دوسيهات الدواوين !

في دي الدوسيهات أشغالك وأشغالي
بقي لها خمسين سنه في وضعها الحال
فيها معاش أرمله قالت يابو عيالي
وغرض حال شاب بئس م العمل خالي
ومشكلة وقف فاتها خورشيد النوال
حاططها صاحبك ويقول لك ونا مالي
دا حسني بيه المدير العام باعتها لي
ولسه عايـزها إمضة مستشار عالي
ولا حاتنزل على الأرشيـف طوالي
أدى النظام الي خارب كل بيت مالي
ومركب الفقر أمثالك وأمثالي

من بارك ليون

تعود بلاد الرون يا نسيم
ومين يكون لسقامي حكيم
ونا فيها سقيم
ونا ونت عليل

فكرتنـي لما هـبيت
واللي على إيـده اتربيت
باللي جبـيت
وانا أصلي أصيل

أيام ما كنت اعمل أزجال أمدح فيها عال
والعن أبو اللى باعوه بريال لعنة أبييل

وإذا هوا هب موافق قلبى الخافق
لو كنت أكبرها منافق بالطبع أميل

والقلب لو جاله المدفع كذا واتقطع
الكره بالقوه ما ينفع ولا بالأساطيل

وافضل كذا فى إيد الكرناف أبدا ما أخاف
لحد ما يجنى الأسعاف ويشيلنى قتل

والباق ينحط فى مالطه أحسن خطه
ويخلوا فيها بن الماشطه وبين ام خليل

يفضل حسين بيه الملطاش وعلى الحشاش
ومش قليل كبشة أوباش ياخذوا تبرطيل

يجى اللى نيعد علينا ويشمت فينا
ويقول لسواح المينا دالمصرى هزيل

وحق من خلق الأعجام قبل الأورام
المصرى ده طول عمره تمام من ألفين جيل

وعـالـخـصـوص لما يـراـزى وىـا الآزى
لا تقول لى عصمت ولا غازى يشفى له غليل

يا رب خلىنى وخلىه والى ياأذيه
من غير سبب فى الهند اعميه ويدوسه الفيل

لأنه اخويا ومن دمي بس من امى
واربط على همه وهمى جبل ومنديل

إن كنت أوسق وأحمل هوه يكمل
ويقوم على عين الدممل يعطيها فتيل

ولما يسكت بالعنيه له إيد تانيه
وكل واحد فى الدنيا يلزم له زميل

فى حب معشوقنا الخفه ليه نتخفى
والحب يجمعنا فى قفه ولا فى برمىل

وغير ما هو حب فريضه له تغميضه
بديعه وكتافه عريضه وقوامه جميل

هوه اللى كادنى وعياني وخلا لسانى
حسب ما قال الفسخانى أحمر وطويل

ويكون ساعتها بن أبو عنبر المتأمر
قاعد يقزقز لب اسمر على شط النيل

ملموم عليه كام واد ضايع واحد جايـع
والتاني منى اسمه ضايـع إكمنه ثـقيل

يارب ياللى خلقت الناس أشكال واجناس
خلقت دول ليه من غير راس زى البراميل

يدحرجوهم عالدواوين فين مش عارفين
حتى ولا على إيه ناوين أهو حط وشيل

ويقولوا والقول بقى عاده إحنـا الساده
والنفخه والدوشه زياده وركوب توميل

فى ذمتى لبس الخيشه وأكل دشيـه
أفضل لى انا من دى العيشه لما ابقى ذليل

أدى اللى شاف البيت عامر وعجين خامر
دخل بقى الناهى الأمر بين المساطيل

ويجب قرايه من انطاكيه من ها الحاكـيه

وعنها وتم التاكيد — من دى الشماليل

خرمه يقبض ويحصل

الحمد لله المتعال — على وقف الحال
والفنطزه والاستقلال — ستترك يا كريم

خلصنا من زمن السلطه — وتسفير ملطه
جينا لزمن ولا بالبطه — نكسب مليم

مكتوب علينا يا نبقى عبيد — ننساق فى حديد
يانجعض والفقر يزيد — فى الناس تسخيم

يا عم يالى جنابك سير — واسمك ...
رجع لنا الكرباج والخير — يابوسر عظيم

فالخ لى بس تهيننا — وتعزيننا
ولما تزعل تورينا — بوز الخراطيم

طول مانت قاعد لى ومحبوس — فى صالون مخصوص
ما حد غيرنا احنا اللى يلوص — والرب علم

القطن برده لمزراحى ولقرداحى ..
وابن البلد يقعد ماحى فى بلادته يتيم

أقطانه هوه الى زرعها والى جمعها
ماتلم له لما يبيعها حق البرسيم

خرمه يقبض ويحصل ودا يوصل
مسكين ويجرى ما يحصل ولا حتى يتم

ياناس دا عيب على دى النفخات
والعيان الى بيناتكم مات ولا لهشى غريم

مهما انضرب فيها مدافع شىء مش نافع
مادام مفيش فيها مدافع ينقال له زعيم

إن قلنا : أحكام عرفيه فى الحريه
يقولوا أمر الحريه والأمم قديم

يعنى الأجانب تنهنا وتدخل بانبنا
بالزور وناويه على خرابنا وتعيش فى نعيم

إن كان صحيح مأمورها نشيط يحوش البرانيه ط
عن الجلاليب والزعايط وله التعظم

إليه السبب إن الأورام ماشين قدام
وبن العرب من ستين عام عاش في التلـطيم

قال لك لأن الرومى نبيه والى يحميه
على الرذايل يدرية والمصرى غشيم

يفتح له بار ... يفتح موضوع شىء مش ممنوع
وحنا وعيالنا نموت م الجوع صبيان وحرير

ما فى البلد من قلع الخيش وحصل عالعيش
إلا الى ورد شىء للجيش اهو دا الى سليم

وغير بقى الى قريه وزير ونسيه غفير
وله مره وقمصها حرير من غير أبـزيم

يا مصر شعبك دمه خفيف والعقل سخيـف
ما يحب شىء غير التوظيف ولا التخـريم

البورصة تسحب مصرانك لجل اقـطـانك
والشركة^(١) تسحب نسوانك لجل المـباريم

كثر القعاد عند الصياغ رنى لهم داغ

(١) شركة المصاغ الفالـصو .

ومستحيل القرش الصاغ يعطوه لحكيم

تبقى المزه عيالها معاهها أصحاب عاهه

وبالأساور تتباهى بين المعازيم

نسوان ما تعرف خلخالها من غربالها

وتعرف الى حايجرى لها قال بالتنجيم

ثورة الشباب

تعا أما اقولك هنا يا هباب يا سخام يا شباب

كلمنى من تحت السرداب ماتجيش م الباب

أخاف عليك من نظرة عين واشحال اتنين

وبعد ما تاكل القلمين ما يفيدش عتاب

سمعت حسك ونا فى ليون جنب التليفون

لاقيت رذايلك لافه الكون ويا الركاب

كام نوبه جاك كسر رقبتك بيدى ضربتك

عشان تبطل عفرتك ونت بتنسب

الى يشوفك كدا هادى يقول دا رمادى
وانت تغلب أبو شادى من دون أتعاب

إن كنت مبسوط من دى القول خلـيك على دول
عشان يومانى تجيب لنا جول فى نادى الألعاب

لا يقولوا مصريين جـحاليف يلزمهم ليف
ما يعرفوش شىء غير بابا ليف وفقى الكتاب

اعمل لنا حبت أزجال وقصايد عال
وارفع إديك وارقع موال من فن الغـاب

على القانون وان كان مشغول امسك أرغـول
وقول ياليل أيا عين الغول يابو ست نـاب

وبوس لى وجنات المحبوب وهو دا المـطلوب
واضرب عوازلى بالمركوب ولا بـقـاب

المسخـره تمشى كويس فيـد الـريس
وتصبح الخلق مـليس والدنيا خراب

يا عم يالى لا بد جوه وـكـلك قوه
يا هـتـرا أمك حوا ولدتنـا كلاب

مالناش عنين وودان ودراع ولسان وبتـاع
أقله زى الى بينباع عند الجلاب

فى كل يوم اسود نزعـل ونت بتقـل
تسمح لى من فضلك أسأل إيه الأسباب

يا مسلمين طر شقت خلاص زى البـلاص
الى يكون متعبى رصاص للـعين ، وانصاب

أعوذ بالله

إلا البلاد يا ولاد ماها مقلـوب حالها
فى عز عصر استقـلالها شـبعت تشخير

كانت صلاة النبى أحسن من كده قـبله واتخن
والعمله ماشيه عدل معدن ورغيفهـا كـبير

أما البلاد الدون ربحت مصر انـلـد بحت
غاية مافى التهويش صبحت جرايدهـا كـثير

بادى الغلا يالى وراثـا بالخرزانـه
والمقرعه لما هراثـا وبقيـنـا حمير

أول ما تسمع يا رمالى بخبر خالى
تبات وتصبح طوالى ناوى الـتـصغير

والفرانين كل معلم جلف مبلـم
وصدغه فى الأزمه يتلم ولا صدغ مدير

طحن البلاطه وسكتنا يالله اهتكننا
وحطها فى قعر التكنه وخلطها شعير

أعوذ بالله ، دى الأروام ولا دى الأغنام
الى ما ينجح فيها كلام إلا بفـواتير

ماحد حقه الحرق يجاز غير الخبـاز
وقلع عينه بالخراز ابن الخنازير

نهار ماتبقى الناس فى هلاك يننى الأملاك
ويجب مصاغ لامراته هناك وجنله حريـر

وبحق ليه القمح يا ناس ينشال فى اكيـاس
ويروح لابو بيصل ومداس والتـانى أمير

قال العمى يعمى الأبعد على رأى اسعد
دى بلادك انت يا حاج احمد يامـا فيها فقير

ما أصبحوا أهل طنجـه وروم وكنجـه
واتعلموا يمزوا برنجـه وخص وجرجير

زرع الأراضى اليوم طيب بكـره يخيب
والظاهر الفقر قريب جـاى فى مواسير

نهار ما تسرح بصوانى عال يا سودانى
ويقول معانا القبانى فى القنـطاطير

بقت هو الحى البـاقى شرقى شرقى
فى الغيط خمس ست سواقى والمنـزل بير

يا عم يا عبد الرحمن الشر اهــو هان
أرجوك تعيد لى الحظ كمان وبـلاش تفسير

حط المسدس فى يمينك الله يعيـنك
واعمل لنا صهـبه ودينك واملا هــا نـعير

لأن فيها برم فارت وهمم بـارت
وحدايات عفـاريت طارت فى أرض ابـوقير

وخزائنات جوه اتمدت وعين انسـدت
وعالطـوانى الى انهدت حـانـط غـفـير

(بيرم التونسى)

يقف عليها بكبوتـه وبنوتـه
والنسات دى بشلوتـه من وحده تطير

اسمع كلام مخلص أبـده إهد هـده
خليها تفرم فى الكبـده فرم المنـاشير

من مد فى فرشك رجليـه اتكـه عليـه
بالحيل وبظظ ننى عنيـه من دون تأخير

صنف الأوروبـاوى مرخرخ بشت ملخلـخ
من شخطه والتانيه يسخسخ زى ام بكير

المصرى واد جن مقـارد وتلـم بارد
لو يلقى يوش يصبـح فارد للـردح حصير

تنزل على لحم الخنزير

أبدى سلامى وغرامى قبل كلامى
مادام ما بلقاش قدامى غير الـسوان

أقعد لهم سنتين ملطوع ميت م الجوع
وافوت لهم فتح الموضوع أنا حقه جـان

يقلب بفلا وعرييه شوييه شوييه
وتبات وتصبح محظيه في أمان وطمان

تنزل على لحم الخنزير تاخذ قناطر
وفي الختام يرافقها أمير موضه وكحيان

نكتم ويرجع مرجوعنا لأسباب جوعنا
نلقى الكبار يعنى بتوعنا أعيان عميان

فلاح مايعرف غير قطنه ومحروق وطنه
وييه مايعرف غير بطنه وهى ماشيه ننان

خليك يا واد انت معانا وامشى ورائنا
وخذ معاك الدجانه واعمل سكران

ندخل على أحسن زفه ونبعت تفه
والمزه تتحط في قفه ولا في قفصان

ونشوف كده مين الفايز المتمايز
الى حلجاتها عجائز ولا الجدعان

خلي الخناق للدراسه يكفى نجاسه
افتح لنا فصل سياسه ألا أنا حران

اعرف لي رطل اللحمه الخام الخالى عضام
يتباع على الطولوناته بكام واخزى الشيطان

آخر خبر من عند هافاس يلزم لها فاس
واحد يلکک زى الناس أو زى الجسان

ومن كلام عمك ابو حبيش يباع الخيش
قال لك شوف انت رغيف العيش ونفس دخان

ومن كلام الشيخ أبادير فغناص الطير
أمة محمد لسه بخير إيه لسه كان

آه يا سودانى

يا بنت بزياده الكافيه ونوم بلا قافيه
يا شيك يا حافظه الجغرافيا يام الزنار

الجاره سمعت تشخيرك من منـاخيرك
واستعجبت على تأخيرك والدنيـا بنهار

ما تقومى والظهر حايدين وقرب جدا
دامين عطاك صباع ملبن مسقى جدوار

إزاي ما ترضى بدى قعده وعندك أعدا
وتطلعنى فى المطلق ده وأهلك أحرار

ومن العجب إنك لبوه واببنك صبوه
ولسه ساكنين فى القبوه جنب الدوار

وملايتك ام شروط واسعه وعشرين بقعه
و ١١٢ رقععه دى تجيب العار

والخلخال الى جالك مطلى على سوم أصلى
لا يخلى رجلك ولا رجلى تعرف تندار

وادحدحى وخطى العتبه وارمى الخشبه
وحدك يامكسورة الرقبه بلا لعب صغار

واستعدلى بروحك يختى يكفى فضيحتى
بين الى قالوا سخسختى وطفيتى النار

واتعلمى نتف البطه ولعب النطه
أحسن ما تنتف لك مشطه وتحكى الأسرار

ودورى المغنى يا كاسى محدش راسى
بالراجل الى حلق راسى وش المنشار

ولو تقولى من تانى آه يا سودانى
يا داخل الحسبه كانى وملينا حضار

ناس وزر تحكم غجر

ياللى نايمين فى المشارق مهمنا كنتم بالقنـاصل
ناس وزر تحكم غجر صنفين ودمتم للحـواصل

قال لكم سكه حديد فى الملك ماشيه تركبوهـا
يوم ما حرب تدور ما بين كلبين فى روسيا يحجزوهـا

والبتاع دا البرلمان أصل الخناقـه والمجـازر
من كراسيه للقبب معمول عياقه للأكابـر

كل دا المكسب و«شخصيات» بتبرز فى المعارف
والتجار والفلاحين فى الطين بتفرز والمصارف

انتبه واقرا البصير تلقى الى بايع واللى شارى
بنيامين ضد سماعين والإرث ضايـع عالعقارى

مهوسين قول ملحوسين قول فى الدكاتره كل معنى
قول مادام حافضين كلام خليه محاضره عالفراعنه

صنف إنسان كل شين كان بس قيد
بالقليل نعمل يوبيل مولدك يا سيد
في الأرانك
في الكرانك

واحمدوا المولى اللى حنن بالجمـارك
واللى حنن عالجميع بالفلول وبارك
عالإداره.....
في البصاره

مؤتمر روما النسوى

يارجاله !	مالكم سكتم والسما عماله	تتعلم القوانين
في بلاد بره	صبحت حريم المسلمين تتعري	ياشيخ حسين يا أمين
قول افتينسى	إذا المرء اتعرت على موسولينى	هل دا حرام فى الدين
بالطليانى	الواحد ترطن وبالألمانى	راحت على الخايين
خلتى نفيسه	وخلتى بمبه سلفه ام أنيسه	الى لهم كوانين
لما تدخن	ساعتين وقال بنت الحمار بتسخن	أحسن وراهها عجين
أم جلجل	الى ياتركب فوق كتاف الراجل	يا تسب له بالدين
جاتكم نيله	نسوان « بنى ممة » الى راسه ثقيله	وانتم وراه دايرين
م المتولى	للزار لستى نعيمه للأرمل	وف أوسخ الدكاكين
والنقديه	تعطوها للكوديه المره الفجريه	أم الولد سماعين
يسكر بيهم	ويشترى طورتين حمام يشويهم	وانتم كدا جعانين
شوفوا الهانم	وشوفو الى تفتل عقل ستين عالم	شرطا أوربيين
رايمه تحامى	وتجيب قرار المحكمه إلزامى	يحكم على الظالمين
خلصت هى	فى المؤتمر ردت مره انجليزيه	قالت يا مصريين !

يا أنتيكه ممنوع عليكم تدخلوا البولوتيكه في مؤتمر نساويين
قالت موسى كان في أرض أوربا يادى الحوسه بنلاقى محتلين
أما بلاوى قالت لها دوغرى مدام شعراوى سلفه على السلايين
سلفه عليكم قادر تشوفوا الاحتلال بعنيكم وتصبحوا دايجين
دفع عوايد وتشرّبوا اليه بإيد القايد ويكون من اهل الصين

سياسه مدبره

١٩٤٧

لله سياسه مدبره من الأزل متقـدـره
سخر لها المتفشخريين الأمريكان وانجلترا

الحرب جايه والسبب هيه الغنايم والسلب:
الهند والصين والعرب وجعلهم مستعمره

تبرك عليها الأنجلو— أما اللاتين فيرحلوا
وفي بلادهم يفضلوا أمم ، ركش ، متأخره

الروسيا حاتقول حصنى حايقلوا للروسيا اسكتى
حاتقول جنودى وقوتى حالا تقـوم المجزره

وبعد ما يمر الزمن حايقول تشرشل لترومان
من طنجه حتى لليمن أراضى تتبع لنـدره

ولسه تدفع لى الكلف ونجيب سلف غير السلف
جديده غير الى سلف والدفع عند المقدره

يهدوا تانى الى اتبنى بحرب تالته تسرنا
ونبص نلقى نفسنا فى دنيا زاهيه منوره

يا مجلس الأمن جينا

يا مجلس الأمن جينا وحقنا بين إديننا
تنصف ماتنصف عليكم الحق يمشى وعلينا

قضيـه ماهيش عسيره مش عايزه تمحيك وحيـره
إنجلترا فى جزيره ويش جابها تحكم وادينـا

حاتقول بيناتنا معاهده وتسوق أمور المناهده
نعود قوام للمجاهده والبحر يصبح طحينه

واللى ما نقدر نصده بالضفر والنباب نعضه
نعيش نموت زى بعضه ولا التجار يحكمونا

تجار سعارنه جواعه
من ساعه نزل لساعه
عاملينا في السوق بضاعه
في كل بورصه ، ومينا

فرنسا في الغرب تربح
والست هولانده تدبح
وانجلترا دايره تفتح
في أندونيسيا الحزينه

أمة محمد جهاده
ونص مليار عددها
وجب لتخليص بلادها
لو تعرفوا تحسبونا

أمة محمد عظيمه
ماهيش هديه وغنيمه
شعوب وأملاك وقيمه
لجورجى ولا ساريننا

عبد الكريم

داخل علينا ضيف
أعظم رجال السيف
عارفينه ييقى مين ؟
قولوا صلاح الدين
صاحب مقام على
في عصرنا الحال
يا ناس يا ناسين
واحد ودا التانى

ملك جبال الريف
من غير نصير وحليف
فرنسا والأسبان
م السفوح للقمه
يضرب دول عظمى
بعده الميدان

وهو بالإيمان واحلف بإيماني

تبعته له أسبانيا
فرقه ورا التانيه
ألفونس ويا الدون
وقالت السكسون
يومي جحافلها
والكل واكلها
استجدوا بالكون
النائه جاياني

أربع سنين يا ناس
روتر وجنبه هافاس
باتت جرايدها
عن رأي قوادها
والدنيا تنزلزل
في كل يوم ينقل
تملا عواميدها
في نصر رباني

قامت فرنسا تذود
بيطشها المعهود
وقف البطل ياعين
جيش جاي له من السين
عن بنت عمتها
في عز قوتها
حايـر مابين جيشين
والتاني أسباني

انخط في منفاه
واللي قاساه قاساه
يشكى علل وجراح
انزل هبنا وارتاح
عشرين سنه يا قوم
وفات علينا اليوم
المصري قال بسماح
وعيش سعيد هاني

على الأرغول

الأوله آه !

والثانيه آه !

والثالثه آه !

الأوله من لمانك م البلد هجيت

والثانيه دقة تيرانك لم خلت من بيت

والثالثه في برطمانك خدنا شربة زيت

الأوله من لمانك م البلد هجيت بمقشه

والثانيه دقة تيرانك لم خلت من بيت ولا عشه

والثالثه في برطمانك خدنا شربة زيت ولا مشى

الأوله من لمانك م البلد هجيت بمقشه وضرب صاجات

والثانيه دقة تيرانك لم خلت من بيت ولا عشه عزاهات

والثالثه في برطمانك خدنا شربة زيت ولا مشى ثلاث جلسات

يمتنى من قبل ما شوفك في تخيله بين الثقلين

وتشرى ميتك يختى بمستيله ومية عين

وقطنك الحلو لابيض ينقلب نيله على الوجهين

الأوله آه !

والثانيه آه !

والثالثه مع

على الأرغول

الأوله آه . والتانيه آه . والثالثه آه .

الأوله دخلت راجل وقالت ناس

والتانيه كانت تبصبص حتى للكناس

والتالثه حره ولكن أهلها أنجاس

الأوله دخلت راجل وقالت ناس

والتانيه كانت تبصبص حتى للكناس

والتالثه حره ولكن أهلها أنجاس

الأوله دخلت راجل وقالت ناس

والتانيه كانت تبصبص حتى للكناس

والتالثه حره ولكن أهلها أنجاس

لو كنت ياطالب العفه حسبت حساب

ماكنت قيدت نفسك أو كتبت كتاب

وعشت سلطان زمانك سيد العزاب

في منزلك ساعة الخلوه ثلاث غزلان

متجوزين يوعدك بيهم ثلاث خرفان

اتنين بكيفهم وواحد قصدها إحسان

الأوله آه

والتانيه آه

والتالثه آه

على الأرغول :

السلوم

زغلول راجع منصور وجايب خبرها
واكعب وناولنى أطير شرارها
ناويه على الفوانيس تشغل حجرها
وأورطة الجلايب تقلع صجرها
ماتلتقيش شجعان ، إلا غجرها
فى فرشها البهوات وتقل تجارها
وجر يسقيني ويسقيك نارها
ومدفعين تشاريف ، مفلوت عيارها
تنكش لها الأغراب ويطمع جارها
من إمتى أسس موسولينى جدارها
صفا القلوب ينشال ويقعد عفارها
ولا عليها دين يوجب حصارها
حتى أراضيا ماتنبت جزرها

أول ما نبدى القول صلوا على النبى
مشى الجرايه امال ألا يابو صالح
باينه سنة توليع وباين عيالها
طابور عيال كشاف يدشش قزازها
تغور بلد تنهان ، ويوم المعامع
تقعد مع النسوان نهار المعارك
رص الحجر ياعويس وتقل غسلها
ما فيها شىء مبروك ، غير البرابخ
من تفتح الرجلين والباب سايب
وقلعة (السلوم) ألا يا طلاينه
إن كان تعاودنا على حفره جفره
مالكم طريق عالهند عايز عساكر
ولا فحم فى الجغبوب ولا جاز سايل

* * *

ليلتك بقت ليله ما يطلع نهارها
ياما لكم أنفاس عبق بخارها
معلم المعمل يخلل خيارها
سلطان بنى ممة بيحجل فى زارها!

يا أمة الإسلام نوم العوا فى
إن كان فى أوربا بخار المعامل
فين اختراعهم فين جنب اختراكم
والقول يضيع فى الريح فى أمة هوانم

على الربابة :

رياضة...

محمد المبعوث في قوم صالح
والهم والأحزان تصدى القرايح
واللى الغرام سواه دا يصبح سايح
وجيت بياض الصبح أكتب نصايح
طرطر عليه والملك عن وجهه فاسح
اقفل في وشه الباب ولو كان صالح
حاسب تكون مثله بسر ك بايح
قارص عليه الجوع ومن كلب نابح
وروح على الأموات إن كنت رايح
يجعل من الإحسان سبب للفضايح
النيل يروح ما يبان في بحر مالح

أصلى على الهاشمى نبينا حبيبي
يقول الفتى الطهقاني مما جرى له
الى الزمان رباه دا يصبح جامد
ياما في سواد الليل شفت مصايب
ومن يطرطر لك شنابه وينفخ
ومن يزورك والزمان مبتسم لك
ومن يسوح لك يوم بسر ضميره
الناس رأيتها اليوم من ديب عاوى
اقعد في ركن البيت إن كنت قاعد
ولا تقبل الإحسان من ابن لئيمه
ولا تعمل المعروف في غير ابن جنسك

يعد إيد شحات والوش كالح
خطوها بسطرمه شرايح شرايح
قاطع طريق نهاب ويطلع رابح
لصوص غجر ، والبنك في مصر فاتح
للى دخل بالامتيازات يناطح
ولافيش طبيب ماهر يسد الجرايح

شوف الواد الجرسون وقلة جمايله
وشوف بتوع (ورنيش) وفاطس خيولهم
دا عيب على الأجاويد دوس في حماهم
وعيب على المقاديم تنفض جيوبهم
وعيب على البهوات يوطوا رغو سهم
خشت لها الأنذال تمص دمانا

شبت وبشمت من طيخنا الفايح
دانتى ميزانك فى الأولومبيك راجح

وجات أم فواتير تسن نياها
يا أمة الأهرام شدى عزائمك

ياريت شلاتكم تشوط القوالح ..
داخل إلى السودان وراجع مائج
البهلوان اللى سبق كل راجح
العشوه تتحضر لقاييد فاتح ..

ضرب المجر حسنى ألا يا حجازى
أما الفتى حسنين وصيته فى لندره
يا هلتر إيش جاب لأهل بلاده
مفيش عشا لله (خصوصاً) فى لندره

المنبوذين

دى مصر فيها المنبوذين ملايين :
ومنبوذين ماسحين جزم دايرين
حرم عليهم يدخلوا الدواوين
داير وراهم من كمين لكمين
فى العيد ، وأيام السنه جايعين
وننا اللى فيهم ينسمع لى أنين

يا منبوذين الهند كفوا دموعكم
من منبوذين حافين يلموا سبارس
ومنبوذين شبان معاهم شهايد
ومنبوذين نسوان وضابط مباحث
ومنبوذين فى البيت عشاهم فلافل
ومنبوذين ضايعين ما يعرف خبرهم

* * *

شوف اللى فيها من زمان صايمين
الملح ميري واللى ينهب مين
ولا الزناقى كاسر الكاسرين
محلا المغازل والمنازل طين
ولسه فيها الانجليز قاعدين

ياغاندى يكفى الصوم تعالى بلادنا
إنت لقيت الملح أما الكنانه
لوجيت فى وسط القوم تبقى مطاوع
ياريت تعلمنا صناعة المغازل
بلد ذهبها انشال ودهبان حالها

على الربابة :

حرب الترك والروم

أصلى على النبي العربي محمد
يقول المصطفى الغازي حبيبي
بعت الجيش يا جنرال مخالى
دخلتم والبراميل والقزايـز
حسبتموها الهماميل الجديدة
عملها القايد الأنسى فسحه
هجمنا والسيوف غير المطاوى
وسكر الموت غير سكر الطبالى
وواحد بمب غير واحد كناديان
وواحد سيك غير واحد سكيـتو
رأينا مقدرتكم فى الحرايق
نهار الجيش ماخش ازميز عليكم
نهار ما المسيو فنزيلوس بعـتكم
أهانوا فتحى فى لندن فتحنا
وجا الأسطول فى دار الخلافه
وقالوا عالمسيحين ندافع
أشوف الشرق مربوط بالسلاسل
مسير المؤتمر يكشف مصايـب
حسبنا الملك فى أرض الجزيره

واسلم عالمسيح عيسى النصارى
وسيف الشرق من طنطا لبخارى
رجع لك عيش ملدن فى الغراره
مدافعكم وذخرتكم حجاره
نزلتم هتك فى بلاد الطهارى
وفنزيلوس كان فاكرها غاره
ودم الموت غير دم العذارى
وشرب الموت غير شرب السجاره
وحته تنك غير حته خياره
ومليون صاغ غير «مياكو ساره»
وعيل يحرق الدنيا بشراره
لقى البراميل ، والقواد سكارى
كتبنا اسمه فى كشف الأسارى
بحد السيف فى لندن سفاره
جعلنا أنقره دار الإداره
ودى احنا اليوم حالفنا النصارى
وأنحن سلسله عندى دوباره
مخبيا الفتى تحت الستاره
وجنب الأرض دى كوت الأماره

وجنب الكوت مملكة الكبييه وأرض القدس وبلاد البصاره

على الربابة :

زواج فنزيلوس^(١)

أصلى على الوطنى الغيور محمد
استعجبوا ياولاد أمانه عليكم
صحيح أدى الكراكوز وآدى زمانه
حلاوته فى الزفه بدقنه المسبسه
يخطر ويتايل بين البنت والجدع
تهشكه المعازيم وواحدہ تقول له
ولما دار الرقص ألا يالزغبه
شوف الزعيم الى عزم من دكى السنه
أخذ الخريطه معاه وراح عصبة الأمم
بحسبها يغمة نصر بالحبر والقلم
جمع بنفسه الجمع والجمع قسمته
والباقي للأتراك ودول يكسروا العدد
جمعت تسعين ألف بالجبر كلهم
والحاصل الفارغ ظهر لأوروبا

نبينا يكون يوم القيامة عروس
على الراجل دا الى اسمه فنزيلوس
لما ظهر راجل عجوز ننوس
بيضه طويله عايزه عشرين موس
المعجبانى العايق المحروس
كتوس وواحدہ تقول له ياننوس
كان مسخرادس مضحكوس تستوس
يعيد لشعبه عهد بطليموس
طلب من استامبول إلى طرطوس
طلع حساب الفنزيلوس معكوس
مقسوم على استمبول بضرب الروس
كسر اعتيادى بالبلط والفسوس
والجبر فيه الجزر يامهووس
حاصل منفذ بالبلا مكنوس

(١) تزوج المسيو فنزيلوس بسيدة إنجليزية وهو فى الثمانين من عمره على أثر هزيمة الجيش اليونانى .

بناه سياسى ما عليه إلا جمجمه
ياما تقول الناس فلان السياسى
شوف ريس اليونان خلاها تندعق
زى اللى كان نادر على الدخله والفرح
يعلق الأعلام فرايحى فى لندره
لكن سياسى القوم إذا حس بالخطر
صاحبنا كان فاكر يجى له الهوا سوا
خلت المدام رضيت به راخر رضى بها
فايت أتينا فيها ميت ألف أرمله
لكن مفيش دوتات برادس دنيشى
قديمه خربانه واكليه السوس
وفى الحقيقه تلتقيه ملحوس
وبات يعنق فى المدام ويوس
إذا رجع جيش اليونان موكوس
وفوق أتينا فيه علم منكوس
يروح مآيس على الجميع ويدوس
لقاها عتمه نجمها منحوس
حايعمل ايه مادام معاهشى غلوس
على الرجال يفتشوا بفانوس
وايشى عيش الخاف مافيش غموس

هزيمة اليونان

من عهد ماشيت أصلى على النبى
إيه يازمان البصطليجات والعصب
ما يفصل الباطل من الحق مؤتمر
قالوا نبيد الترك بالسيف والقنا
ياما كان منى عينك يامر كيز كرزن
ما كل من قال جون يبلغ مرامه
سحب كمال السيف صلوا على النبى
سبعه وتسعين ألف «واخذ زياده»
إيه كنت تعمل يا كمال يابن غانم
سابق كده على فين يابو درش قول لى
نبينا اللى بهجم عالعدا على طول
ياما فيك بتظهر يازمان فصول
إلا إذا كان بالحسام مفصول
لكن جحود القلب ياما يقول
يصبح طناشى قيصر استمبول
ولاكل من طول لسانه يطول
الجيش مدغدغ والمملك معزول
فى ساعه يشفطهم كمال الغول
لو كان كان الدردنيل مقفول
ونت كدا عايق حننج مهول

بعم لفنزيلوس عنك في لندره وفنزيلوس ويا المدام مشغول
ترك سرير النوم مما جرى له وقام قعد من دى الختر مذهبول

على الربابة :

معاهدة الترك والروم

يا خيبة اللى لم يصلى على النبى
يقول سفير الترك عصمت أبو على
قال لى الفتى الماريشال كمال ابن غانم
أنا قلت ماتبت ميدان المفاوضه
إن جار عليه الخصم فى الوزن والعدد
يعرف أمور الروم ويعرف طباعهم
الروم يابو درويش عصايب عصايب
نزلنا على لوزان فى أرض سويسره
عاطين لفنزيلوس ثلاثه زياده
والترك يكفاهم سلامه بلادهم
جاني فى نص الليل سفير لفرنسا
خلت سفير الروم ألا يا حبايب
وفى الصباح جالى يقلقل منامى
رسول بلاد الجاز والفضه والذهب
وبوم مادار الت والعجن يافتى
نبى شهر للحق فوق المنابر
فارم عفارم يباعين السجاير
نبت ياعصمت مين لوزان والدواير
إلا اللى سن السيف والحرب داير
يعرف يتاقلهم ويعرف يعاير
ساعة ماتبدى لهم من الموت أشاير
وعالغريب يقوا عشاير عشاير
نلقى طبيخها فى المواعين فاير
والجاز خده كرزى وقاعد يعاير
بعد الفضايح والحريق والفحاير
سياسى لكن حا على شكل زاير
من زغرتين باح لى بسر الضراير
رسول من المريكان على البرق طاير
غاير من اللى قام على الجاز غاير
فى المؤتمر فرنسا بأكل الفطاير

خرج الفتى عصمت أبو سيف ماضى وجنبه فنزيلوس مضى ع الخساير
وانخط في استنبول أحكام سايره تسرى على الأسطول يصبح أساير
عرض اللى ما يسلح لهم دردنيلها بالبمب والفراقيط عماير عماير
يبقى ان حضر أسطول دولة شرم برم يحضر فى نوفمبر يخش فى يناير .

على الربابة :

اللورد ملنر

أصلنى على المبعوث نينا محمد المتخب للخلق يوم الشفايع
واسلم على مصر السعيدة ونيلها على ما جرى فى أرضها من وقايع
ركبت بنى زغلول تزيج الأعادى خرجت لها الزعاليك طلايع طلايع
حسبوا الحروب أشغال ألا ياجعايده والنصر فيها يشتغل كل صايع
حاشت بنى زغلول كلاب البوادرى ومين يحوش الكلب والكلب جايع
دخل السفير ملنر على مصر شارى قالت بنى الأحرار حدانا البضايع
لم يلتقى ملنر خلاف المعادى أمير بنى الأحرار فى مصر بايع
بيحسب المصرى — أمير الديالم — يصبح بحد السيف والرمح طايع
فرشت فراش الليف ذوات العرايب فى السجن والطراريح حرير للتبايع
واتغربت أشرافنا عن ديارهم بهم يضيق الملك والملك سايع
واتيتمت أطفال ومن كان عاقر وأخذ النصيب والحزن فى مصر شايع
دار الزمان وان دار على دى التخاين خفض موازينها وعلى الرفايع
فى الانتخاب ياناس بانت أسودها من أكالين لحم الأنعام الضبايع

صاحت بنى زغلول ألا بالسعده ردت لها الأصوات عن كل شايـع
قالت بنى الأحرار نحارب بسيفنا قال الأمير زغلول دى حرب الشرايع
لا ينفع الجلاذ ولا من يجالـد ولا يفلح المصروع ولا من يصارع
يا آكلين الحق رحتم فى ناييه والحق ده ينعاد ولو كان ضايـع

خلافة بنى عثمان

يا مصطفى يالى قاووقك
اسمع عتاب لك على ذوقك
منفوش فوقك
ذوق الحكم

كان كل فعلك جد متين
كله الا طرد إمام الدين
والناس راضين
والدين له إمام

خليت بلادك ألا تركه
وليه رجعت أافرنگه
فى أول حركه
زى الأروام

صبحت خلافة بنى عثمان
والبابا فى بلاد الطليان
عندك تتهان
معمول له مقام

واحد حدفتوه على مالطه
والتانى قام من غير سلطه
قلنا دى غلطه
وياريتـه ماقام

من بعد ما كتفت إديه وحجرت عليه
بتكش منه وتنفيه ليه ياكال يا همام

يا هل ترا وقت ماتلضم بالحيل ترطم
حكمت بالشلضم بلضم ماتخافش ملام

صبحت حالا يا مجاهد للدين جاحد
والمسلمين واحد واحد عندك أغنام

شكل الخلافه في الآيه للدين رايه
فكيتها يابن الكبايه فرحت أقوام

إن قاموا نوبه محاريبك مين حايعينك
مفيش رباط بينا وبينك غير الإسلام

ياما نشوف بكره الشامت ودول قامت
ماتفيدش قوت وشهامت ولا ألف حسام

إن داسوا أرضك بجيوشهم مين حايجوشهم
لوما غضبنا في وشوشهم لبقت حمام

دى عملتك عمله سخيغه طرد خليفه
مع الحرملك ولطيفه في أمان وسلام

إن كنت قصدك تتفشخـر وتكون أكبر
وتعمل اللى عمل عتـر خطى لقدام

شوقى

ألقىت فى حفلة تأبين المرحوم أحمد شوقى بك
اللى أقامتها الجالية المصرية فى باريس .

مكتوب لى فى الغيب مصيه والغيب عن العلم خافى
تطول حياى الكئيبه وارثى أمير القـوافى
ياشوقى ساعه رهيبه المنايا توافى
عزيز على الشرق بات له الشرق صارخ ولاطم

وقفت أرثيك بصوتى والصوت على البعد خافت
موتك ، وياريتـه موتى أنطق لسان كل ساكت
ومين مايسمع خفوتى فى ميتـمك لما ناحت
النواحين فى البوادرى والمنشدين فى العواصم

شعوب محمد وعيسى لهم مذاهب مذاهب
جامع يخالف كنيسه وشيخ على عكس راهب
قروا صحايف نفيسه لك فيها وحى المواهب
الكل صلوا عليها القبعات والعمائم

تسأل باریس عن غیابك	وانت عارف جوابها
دی مكتبك فی شبابك	وملعبك فی شبابها
وصفتها فی كتابك	یوم كنت تخشى خرابها
لو كان تقدر جمیلک	تنصب علیك المیاءم

من جاك وزارك فی دارك	وقال یادار ابن هانی
یقول لقبرك مبارك	اقبل یاقبر التهانى
یاقبر طال افتخارك	على القبور والمبانى
فیک الأمير الی ساهر	فیک الأمير الی نایم .

شغل الحكومة ! ..

عيله بناتها ثمانیه وأربعه صیان
میت أبوهم ، وأرشدهم جدع غلبان
باع نص یت ملك واتوكل على الرحمن
یفتح له دكان بقاله زى بعضشیان
دفع إيجار السنه وخلو رجل كان
جینا بقى للمساعى من دیوان لدیوان
قال فهمى افندى : الرفوف تبعد عن الجدران
وحسنی افندى یقول : الحیطه ناقصه دهان
وبكرى افندى حکم بالغلق عالـدكان
وقال حسین بیه حسین : الفتح فی الإمكان

عبال مافات سنه فى المنح والحرمان
ضاع رأس ماله ، وباع الصنجه والميزان

من كلمة هايفة ..

من هفوه أو كلمه هايفه ننحمق ونقوم
نسب وندب ، ويدور العراك بالشوم
وكل محموق وله فرقه تقوم بهجوم
من قبل ماتعرف الظالم من المظلوم
تبقى الشراره حريقه والسحابه حجوم
لا شركه تنجح ، ولا عيله صفها يدوم
ومنين نشوف العدل ولا السفينه تعوم
مادمننا فوق قلبها قاعدين لبعض خصوم
تضحك علينا الحدادى فى السما والبلوم

حجاج ودوس

رثاء الطيارين المصريين

البحر ماج بالسفين حتى غلب ريحنا	والجو اهـو ماج
يجن فوق السحاب تلعب بأرواحنا	طيارين فى أبراج
باب السما ، وانفتح ، والناس بتجرحنا	فين دوس وحجاج

فين دوس وحجاج ، قالوا الى في الطريق جاين
طايرين في أبراج وخلوك تنتظر يا حزين
والجو اهو ماج وليه حجاج ودوس داخلين
ركك على الصبر يا طالب الصبر
يتحطوا في القبر

يتحطوا في القبر هاوين من أعالي الريح
يا طالب الصبر قدامك مناك في ضريح
ركك على الصبر ، دول ماتوا ، وهم مجاريح
الريح دا غدار
الموت ماهوش عار
صابرين على النار

اللت والعجن ..

اللت والعجن منهم قلينا منشق
واللتاتين دمهم من صنف دم البق
والطحن في ثانيه يغنى عن أساييع دق
إحنا في عصر البخار محناش في عصر الزق
ياما مقالات قراها اللى قراها وطق
وياما ناس من تقالتهم تخش الشق
واللت والعجن آخرتهم ضياع الحق
قولوا ليفن وإتلى : أيوه والا لأ ؟!

أطفال باريس

يا مدمزيل ياللى فى قصرك يا زينة عصرك
المبسط يحبك على خصرك يتهز قوام

فى الحرب بتواسى المجارح فوق الطراريح
وتقلبى الغم بتفرج والنار بغرام

ومشيتك فى السكه غزال وقيافتك عال
كدا سلت ملت مفيش خلخال وسخام لطام

ولا الإديين فيها غوايش ولا شىء حايش
كدا لهط مهط فطير بايش أشمط وأنام

اللحم أبيض ومزقلط ويتزقلط
والشوش ده مش متخطط زى ام لتام

دول فى المدارس ودو كى بيربو كى
الله يخليكى لابو كى وامك يا تمام

طلعتى حافظه جغرافيه وصحه وعافيه
حتى الى هوه بلا قافيه حافظاه يا سلام

البنت عضو في أكاديميا وتعرف كيميا
خلينا إحنا في الباميا والفقر التام

تمسك ياعم إيد التلفون مش إيد الهون
اللي تسمع في الكركون والناس حاتنام

فين اللي تعفر في الحلله وتكسر قلبه
من اللي تنقش دانتيله من البفته الخام

مفروده دايماً لاتبوز ولا تتأوز
عازبه ولما بتجوز تعمل له مقام

يوسها قدام جمعيله وتبوس هيه
لاكسكا في الحريه موسيو ومدام

مدام يحبا وتحبيله وداخله في عبه
مايسباشي ولا تسبيله مين عنده كلام

أما الأنيتيه ام جلاجل تاخذ الراجل
تركبه الفقر العاجل وتجب له لجام

متجوزاه وعاملاه سلم لو يتكلم
الضرب علي صدغه يعلم أكفف وقلام

تدخـل وتخرج ما تشاور عايـزه أساور
ما تخلى شرطـى ولا مجاور ولا واد خدام

عليها حبة دين عرقوب ولسان مسحوب
وصدغ أطول م المركوب وتياب قدام

وجوزها يشرب بنوره وهيه طاظوره
تجمل وتولد بالطوره زى الأغنام

ييجوا الغيال الى يهرهر والى يبربر
ودا الى أقرع والى اعور والى له خزام

أطفال أوروبا ف عربيات ومرييات
وبزرات وتبات ونبات ولهم حمام

لا ده أبوه مليارد كبير ولا دا بن فقير
مادام دا ييقى طفل صغير تعذيبه حرام

قال الكرم خد أموالنا أمال مالنا
يارب سايين أطفالنا زى الأيتام

مكـومين كدا فى الشارع روس وكوارع
والسلسله وعضم الذراع والباقي عظام

تدوسهم الساده الشماليل يعنى المساطيل
المجصوصين جوا الطوموبيل زى الأصنام

آه لما اشوف رزق الجاهل كذا بالساهل
صاحب وجاهه ويستاهل حكم الإعدام

السيارات

لو كنت عبود ما اشتريش سياره
واردم عليها لو تجينى هديه
مش قصر ديل منى ولا هى إماره
أنت اللى عارف يالى لك عريسه
فى كل طلعة شمس عايزه عماره
أو يسرقوها كلها الحرميه
وتوصل المختار والمختاره
من الزتون لامبابه للسبتيه
وياما تتصلج معاك فى حاره
لا فيها لا بنزين ولا كوز ميه
وتدوس ولد راكب وراك بشطاره
والمحكمه تحكم عليك بالديه
خساره تبدى وتنتهى بخساره
يا رب ما تحرمنى من رجليه

بعثات

يا فندی یالی أبوك باعتك	تعلّم طب
وفایت العلم ودایر	تعشق وتحب
سبع سنين فانت ونت	تغطس ما تقب
خلیت أبوك من مصروفك	يكفر ويسب
سببك بقى من دى الغربه	وارجع بيع لب
ون شفت فى مصر بطاله	اقعد بطال
دى مصر عايزه رجاله	مش عايزه عيال

وحضرتك یالی بتدرس	فى أوربا حقوق
بتعط من قهوه لقهوه	سكران ماتفوق
إن كان قانونك يسكت لك	أنا أقول محروق
والله الى جابك من ضهره	ماخذ الا خازوق
رجعت له بفرق وقصه	وشنب مخلوق
وتنجعص له فى الصاله	تقرا الجورنال
دى مصر عايزه رجاله	مش عايزه عيال

وحضرتك یالی بتدرس	فن الدوبيا
وتحت باطك لرفايـقك	دفتر كويـا
تاكل فراخ وأبوك قاعد	ياكل لويـا
وتشرب البيره وهو	يشرب سويـا
حتى السيجاره ما تشربها	إلا زنويـا

(بزم التونسي)

واخرتها تخدم في وكاله
دى مصر عايزه رجاله
بتماينه ريال
مش عايزه عيال

أما اسمه إيه اللى فالقنى
قال فى الزراعة يتعلم
يقول لى طعم التين يشبه
والفلمح لما يتبرى
يطلع يبرطع فى الغربه
والساقيه ما دام شغاله
دى مصر عايزه رجاله
وعامل لى عظيم
علم التطعيم
طعم البرسيم
بتبرى بهم
من غير تعليم
الطور شغال
مش عايزه عيال

فلوس بتورد ، م الكايرو
كثير ومن عارف يمكن
مع الولد بيعترها
يحط للمشروب عشره
ويعيش هنا زايط هايص
تقول إذا شفت الحاله
دى مصر عايزه رجاله
تحاويل عالبنك
ميت ألف فرنك
بين هنك ورنك
والجرسون سنك
وقرايه فى ضنك
يا خسارة المال
مش عايزه عيال

قدوم الرئيس

اطلع نهار الجمعة فوق المنبر وقول يعيش (سعد) الرئيس الأكبر

(قولوا لعين الشمس ما تحماشي) إلا رئيس الوفد صابح ماشي
سمع طبول الفرح ماستناشي وقال وكيل الست لازم يحضر

وقول لموج البحر يا موج هدى واصبر كدا لما السفينة تعدى
قول يا سحابه ياللي فوقه مدى ظلك على قد الكبين والعنبر

دا يوم مبارك يوم ما شفت بلادك والأمة حولك كلها أولادك
والغيظ دخل قطع قلوب حسادك لما على إيدك بلاد تتحرر

الزهر من شوقه لرؤياك فتح والشمس بتقولك يا سعد نصبح
وكل شيء ينظر إليك ويسبح للى أمر وجه الزمن يتدور

البحر قال: أنا اللي جبت المركب والبر قال: أنا اللي عندي الموكب
وادي العواصم كلها بتترتب حالا وبيت الأمة زاهي منور

أهلا وسهلا قلتها من قلبى لله فى الله واللى عالم ربي
الدنيا تعرف وانت تعرف حبي واللى جرى لى والمنافق يظهر

صعیدی فی باریس

وعنیه مزغلین	عجلی ملخبط یا خلایج
البیض العریانین	من نسوانک یا فرنسا
یا ولاد عالنساویــــن	یا صلاة الزین یاما شالله
نایمین وممددیین	علی شط السین یا محمد
والتانیه فی الکبابین	واحده عاتعوم فی المیه
دایبین ومجطعین	لابسین خلجات للركبه
کاسیاه الفساتین	واللحم کزبده طریه
بالعنیه مدفوسین	وکان وسط الرجاله
ما لجاشی إلا عجین	مطرح ما أدوس وأطیش
بحسب عجلی التخیین	ونا ها اتعجب یا خوانا
وجفایا زی الطین «	«اشمعنی جفاهم أبيض
عفشین ومعصعصین	یا خالج الصعايده
ودولاته متختخین	ونا ناشف لیه ومعضم
واسم الحلوین جوزفین	ونا إسمى خلیفه معوض
ناشفین ومجشفین	وعاطیهم نسوان عیضه
وعیوننا مکحلین	عایجولوا شعورنا طویلہ
وادفس لی المیتین	إحرج حین آسیادهم
والتوب الزفتالین	أم الخزام الففضه
وفخاد کالعراجین	ودراعات کالزجالی
أم الصدر السمین	شفتوش بنت الخواجه

أم العيون الزرجه	الشهل النعسانين
أم الشعور الصفيره	على راسها ملففين
يام الشرايط يالى	عا تجرى الجرانين
يا مرينه خبرينى	« على جتل ياسين »
ون كنتى تصدجينى	عديلى المساجين
واللى عاتجوله علينا	فى المعزى النـداين
والله صغير يا محمد	حبسوك سبع سنين
واخواتك فى التخشيبه	فى الضلمه مكتفين
وامك عاتجول يا محمد	واختك يا محمدين
وجرايب « جرعت » باشا	لابسين النـاشين
تلقاهم فى الجزيره	قاعدين ومفرشين
لليه منهم تكريعه	يسمعهـا الى ف شين
صدج من قال بلادنا	دى بلاد المنفـوخين
بالبنطلون والستره	عاملين متمـدين
ليل ونهار يا حبايب	مساطيل ومنـزلىن
ما يشوفوا الطور م النعجه	والفرخهـ م الهاجين
والاستجلال عنديهم	بنديره ومدفعين
الله يغفلج علينا	من دون المخلـوجين
جاعدين يا خواجه	فى بلادنا شحاتين
وانتو الى عاتكلو الزبده	والـعسل والمنين
فايتينكم كالديابه	والخرفان مربـوطين
ما نبيع غير الدفـافى	والجلـل ملـينـانين
والجدعان فى المرمه	والاولاد مساحين

أبكى عليك يا معروض	مسكين والله مسكين
وحديق جاعد وحبائبك	في البلدان مزعوطين
إذا عانذك زمانك	الى حايحامى مين
زغلول باشا المجاهد	في بلاد العيانين
والسلطه العسكريه	قطعت إيدى اليمين
واللورد له أوامر	مكتوبه عاجلين
لا البرلمان يمسحها	ولا حتى الشياطين

مصر حته من أوروبا

ياللى رايحين (مجلس الأمن) اسمعوني فضكم م الفقه والبحث القانوني
كلمتين حلوين قولوهم وافهموني يمكن الحكام يرقوا ويفهمونا

فهموهم باللطافه والمحبه إن مصر الحلوه حته من أوروبا
من زمان تزحف وتحبى حبه حبه لما فاقت عن فينا وبرشلونه

الديانه ، قبل منكم أغيناها والشريعه ، عن نابليون مشيناها
والمصاحف فى المتاحف حطيناها منها ذكرى ومنها فرجه ومنها زينه

وانتهى عهد (البراقع) والملاينه والنسا للركبتين ماشين عرايا
أمى واختى وزوجتى أهم ريحين معايا غالبلاج ، والدنيا تتفرج علينا

زيكم في كل شيء يا اهل الحضاره زيكم بايتين على البوكر سهارى
والحانات من كل نوع في كل حاره عيب عليكم بعد ده تستعمرونا

اتركونا ننتفع من خير بلادنا مش بلادكم ، واسمحوا نسبك حديدنا
مش حديدكم ، والسماذ عايزين سماذنا مش سماذكم يالى ناوين تدبحونا

علموا الجنس اللطيف

علموا الجنس اللطيف الى يحط الرغيف
جنب أبريق الكنيف واللحاف جنب الماجور

والصنيه والكانون والمقشه والصابون
مدلوقين جوا الصالون والسريـر تحته الوابور

انظروا فوق البوريه تلتقوا القبقاب عليه
والدولاب الإلاكيه زى صندوق النـدور

شوف لنا المسوخين لما يمشوا مشـخلـعين
فى الطريق متزوقين والبيوت زى القبور

انظروا للعائلات للعيال ولا البنات
جلهم أصحاب عاهات الى قرع والى عور

قبل ماتجيبى الفريك
تخنقه ريحة البخور

يا مره هاتى الفنيك
إلا جوزك سمبتيك

هليود...؟

هليود خربتى عقول الناس
لا ذوق بقا لهم ولا إحساس
أشكال واجناس
ولا دين ولا طين

كل المعابد خربانه
وانتى صلاتك عمرانه
أى ديانه
يومى بملاين

الدين بقى حب وأشواق
واهو انتهى بزواج وطلاق
وغزل وعناق
من غير مآذين

مستخدمه جن سليمان
سجد لخرقها الشيطان
طلعه بألوان
شيخ الشياطين

جريت جربو بقت يا بنات
فوق القياصره والبيوات
ولا يستات
وفوق السلاطين

أول ما تظهـر تسريجه
تمشى بها الست سميجه
وحرکه قبيحه
فى دراع سى أمين

وبنت مدبولی الجزار بمایوه عالبار
عشان تقلد هیدی لامار تشرپ طزازین

هلیود ، ونا هنا فی بلادی بالسنیمادی
خربت بیتی ، وأولادی طلعم صایعین

ومنین أجیب من غیر لازمہ ثلاثین جزمہ
فی الشهر لمراقی وحزمہ من دی الفساتین

تدبیر منزلی

ما تمضغیش للعیال الأکل بسنانک
والنفخ فی الأکل سم ، فی عرض إیمانک
مره ، جهوله ، حماره ، خصلتک سوده
ماتسمعیش الکلام ، تنشکی فی لسانک

إن عیط الواد ، وقال لك ، أشتري نعناع
وحمصیه ، ونبوت الغفیر ، وبتاع
إوعك تطاوعی كلامه ، واعملی طرشه
دا السقم والسم ، أصله ، من إید البیاع

ون قدر الله وكان عندك ولد عیان
ما تحطهوش بین خواته دا العیا دفان

وابقى اعملى زى مايقولك عليه الدكتور
وتمنعيه م الطيخ وترتبى اللبان

شيلي يا بنت الحلال الإبره من المسند
ليتكرس سنها فى إيد الولد أسعد
تملى ترمى الإبر ، ماتحرميش أبدا
مش فاكره من يوم ماشكت خربة ام احمد

ون كان فى بيتك شوك ، ولا معالق بقص
خافى عليهم ليقوا كل يوم فى نقص
واغلى لهم الميه لما تغسلى المواعين
ونضفى البيت وخلي الأوضه ترقص رقص

وبطلى قولة العفاريت والغوليه
ليطلع الواد عييط والبنت مخبوله
ماتعرفيش الكلام ده يتلف الأولاد
ويفرجوكى المرار ، وتعيشى مخبوله

حاتعملوا ازاي لما تصبحوا عيليه
وانتم بتاخذوا الجنيه بتفرقعوه فى ليله
دا بالكى كان مره بعد الشر مش قادر
مافيش بقى الا المويليا شفتى دى الميله

المره الحافيه

أسال المولى للمره الحافيه بكره من بدرى تبلى بكافيه

بكره من بدرى تنزل الفرّه في البلد تكسح المره العرّه

المره الحافيه عندها اللبه نصها اتعد ستميت حبه

المره الحافيه تدبح الوزه نصها لجوزها يتعمل مزه

المره الحافيه والواد الحافى حقهم غسله من فنيك صافى

الولد حقه يتتلف زرّه والمره جزمه لا الحفا يعرّه

قولى فيه رومى ولا ازحلاوى زى ع شماوى. وام ع شماوى؟

بص فى الكارو ولا فى الشارع تلتقى ملايه تحتها الكارع

وانت يا هانم احملى الضجّه وارشدى بختى خالتك الحاجه

جوازہ

ربنا یتوب عالبعید من دی القزاره
والصیاعه ویرزقک یا بنی بجوازہ
انت لک دکان وابوک صاحب مغازہ
ألف من یستنی دی الوقعه الهنیہ

تلتقی بنت الحلال بنت المعلم
قطب عوف السید التیس المبلّم
فی البلد یلبس بنش مبرد مقلّم
جل ما یدور عالطریقہ الیومیہ

جل ما یربط علی شیخ الطریقہ
بدری ویربن علی الأسطی شفیقہ
بعد من دی یلبس البدلہ العتیقہ
فی البلد ویدور یقول العربیہ

ما تشوف إلا الهیصه والموکب محضر
أربعین حنطور تسد السکه واکثر
الی بصفیر والی باحمر والی باخضر
والی حاطه خروق فی صدر الجلیہ

واللى جايه نفيسه والسيد معاها
واللى ساحبه الحلو ، أو محسن وراها
واللى رابطه عنيا ومعاها دواها
واللى فاتحه الصدر بترضع بهيه

يبقى يوم منه عزومه ، ومنه فرجه
والمره جوا الستاره وراسها خارجيه
ون شافت دكان مزين ولا سرجه
تفقع الزغروته من راسها القويه

أما بيتكم يا بطل ، ونت الى عالم
بس لو ساع العروسه والعوالم
واللى تتأخر تشرف ع السلام
والهاموش تحت السقيفه البرانيه

العريس يدخل وتسلم الجماعه
واما يجى الأكل تتحط البتاعه
خمسميت مسروعه ياكلوا ف ربع ساعه
أربعين حله خضار ومهلبيه

كل صحن يشطبوه امك ترصه
ون فضل فى العضم شىء اختك تمصه
واللى يفضل نصه للكناس ونصه

للمره بتاعت الحلاوه السمسيمه

زفة المطاهر

يا أهل ودى فلقتونى يا مسلمين غلبتونى
إن عبت فيكم تلومونى وتجعلونى مع المجانين

قلتولى دحنا أذكيه وعندنا حسن النيه
والمصرى يتعد بميه م الناس أخصّ الشرقيين

أمال دا إيه الى بيحصل دى حاله عايزه تتفصل
داء السخافه متأصل فينا وماسك فى الشرايين

بشوف يومأتى بعنيه فى السكه ساعة العصريه
موكب وفيه ١٠٠ عربيه راكبين عليها عيال حافيين

تعدى قبله الجماله والطبله فوقها شغاله
والنقرزان والرجالاه من الفتوات الصايعين

وبعد منها جمل ازعر وفوقه عبله مرات عتر
قدامها شيبوب يتمخطر وف وسطه طزينة سكاكين

بعدين تفوت الرفاعيه والمجدوين والصطليه
والنشالين والحرميه وبتوع أبو زعبل رخرين

وبشوف بقى آخر الزفه حنطور عليه كشمير لفه
وعربجي ومملوك خفه عليه زواق ورد وياسمين

وفيه ولد جربان أعور قاعد يخطط ويربر
وزر طربوشه أزعر وكل حاله زى الطين

أبو الولد شایل الرايه وأمه شايله الدفايه
والملاح شايلاه الدايه تطس في عبون الماشين

يقي الولد زى النسناس وتخاف عليه من عين الناس
تعالى ساعدني بمداس ورن أصحابنا تسعين

وبعد يوم من دى الغاره تلقى المطاهر فى الحاره
يعجن وسخ فى الفخاره وإديه على الوحله لازقين

والخنفسه فى إيده تلعب أما الدمامل شىء أعجب
القرن إن شافه يهرب ويفتخرع البنأدمين

الواد ييجى حدى بدى والحاج عيسى الحلاق جى
أعمى نظر مایشوفش الضى وكلتينه مصدين

جاءوا المطاهر يقطع له وابو المطاهر يدفع له
وام الولد تتشخلع له والباقي بالزغاريت راقعين

هات الكنافه يا متولى يقول له فين هيه قول لي
يقول له عندك عالعلى ارحم قوام يابن الملاعين

يروح يجيها في صينية نحاس عتيقه مصديه
واللي يطول منها وقية ييات مغطى يا مستمعين

الحسن جنه لو يجمع الأدب وياه

يا قلب عمرك قضيته في الزمان ده وحيد
عشق الملاح ده ما رأيتيه دانت قلب بليد
ولو بدالك ونسيتيه دانت والله حديد
لما حرق قلب العاشق الغرام وكواه
الحسن جنة لو يجمع الأدب ويلاه

غيرك ألاق فين قولى لي لو أفرط فيك
وفي المسا أعطيك للى في الصباح يرميك
دا الحب هيصه وترللى والخطـر ينهيك
والحسن في الدنيا النادر الى انا أهـواه
الحسن جنه
.....

والعيون دى عيون	رأيت قوام الغنـدوره
يعقل المجنون	لو شاف لها المجنون صورـه
تلقى أخلاق دون	ولو تبان المستوره
عاجمال وطفاه	والفجر فى النسوان غطى
.....	الحسن جنـه

كل شىء تخفيه	وواحدـه تانيـه خباصـه
والخضاب إخيـه	بكل لون كده متعاصـه
باللمون تهريـه	وهات يا سالم يا هاصـه
قلت انا ايش خلاه	يحبها العفريت وحده
.....	الحسن جنـه

ما اكرت النسوان	وفى البلد نسوان حلوه
تشبه الحيوان	لكن بعيد عنك بلوه
من خليل عمران	ما تعرف الكيل م الكلوه
كل شىء عايـزاه	وكل شىء جاهلاه لكن
.....	الحسن جنـه

ام عقل سخيـف	والدهيـه لما تتعلم
إنما هو نضيـف	تزيد قرف يا سلام سلم
اللسان بالطيـف	مع الرجال لو تتكلم
بالجواب لادعاه	تقوم على الراجـل فايـره
.....	الحسن جنـه

بس أمـرب فين	ضاقت مـذاهبي وزاد غـلبي
لك أجـيـه مـنـين	واللي انت تهواه يا قلبـي
ما تـلاقـيش الزين	وانت ان لقيت المتـربـي
ربـنا في علاه	داللي كمل حسنه لوحده
الأدب ويـاه	الحسن جنه لو يجمع

هجوم اليونان على الترك

سافر بروحه يقود الجيش قسطنطين الله اعلم حاتحصل واقعه زى الطين
تنسـر فيها جيوش الخنزور لينين يا ابن الحلال ياللي رايح تفتح الأناضول
بالطبخه وفرها وافتح علبه السردين

ريا وسكينة

ياولاد حكايه فى البلد	ماتنـشيش طول الأبد
شابت لها راس الولد	واختل عقل اللى كبر

ياخلق سامع صوت أنين وشيء يقول يا مسلمين
ولما مالقـاشى المعين سكت ولا بان له خبر

يا من سمع صوت القدوم فى بيت على شارع عموم

وحس يقول ياللا قوم افحت يا عبد العال حفر

وجسم مين الى اندفن من بعد ما انداس وانطحن
ونزلوه من غير كفن في الليل ونادى يا غفر

يا بنت دى أمك بكت لما لقوكى فى الجتت
متقطعـه حتت حتت ومتقلينك بالحجر

لا بد أبكى على راح من الصبايا والملاح
الممدودين تحت السلاح عشان رقابهم تنجزر

لا بد أبكى على غاب وله سنين تحت التراب
ممتد فى بيوت القحاب لجل المقدر والقندر

ربا وجوزها فى الظلام نايمين على الروس والعظام
كأنه من ريش النعام ولا الحرير المعتمر

اللبوه أم نياب حديد بتسامر الضبع العنيد
وحش الجلفات الوحيد وإبن بياعة الجزر

يسكروا فوق اللحود فوق مرتبه محشيه دود
تقرف تنام فوقها القروود من دهنها الى ينـعصر

طابحين فاصوليا وسلكمه ويفرفوا في الجمجمه
عندًا في أحسن محكمه ولو فيها القاضى عمر

الشيء دا داير من زمان والخلق تشهد والجيران
وريا وسكينه في أمان ما عندناش عنهم خبر

طالع من الشباك ساروخ من ريحة الشيخ والفاسوخ
والعفنة تضرب في النافوخ أدى الى خلا الشيء ظهر

انزل يا حاكم بالصرم واكسر لنا كل البرم
بزيادة دا اللحم انفرم فوق الطوايل وانتظر

البنت قبله تنصطل وبعد منها تنقتل
والجبل حالا يفتل والجوزه ضوغرى تنكسر

هاتوا المشانق والنعوش وريحونا م الوحوش
وانت يابو البنت حوش بنتك فى بيتك يا بقر

خمسـان

المرحومين أموات الكوكابين والمنزول

شاف الحكيم الجدع نايم وقال لامه بابه أداوى عليك ! — والندوا سمه

* * *

ناحت عرايس وجزت شعرها على مين على العريس الى عمره نقصه الكوكابين

* * *

جمل المحامل يشيل الحمل ويعيده تقل عليه الجرام واتخبلت إيده

* * *

يازارعين الريحان ، خلوا الريحان يتلم قطع الحكيم الزياره والتراب انشم

* * *

شرب وحط الجدع من إيده فنجاله حاسس بتقل الألم يا روى فين جاله

* * *

فات جنازته في عصرية على عطار آل ألف رحمه ! عليك ياميت الجدوار

* * *

ما تبكى على انفقده ماله وزاد غلبه ابكى على الى في حظه اتكتم قلبه

* * *

باللى ربطت الكفن ليه الكفن مربوط حاش الهوى عالى داخل تربته مبسوط

* * *

القطن

فايت على القطن كان لسه ورق عالعود
واقفه عليه العذارى تحرسه من الدود
فقلت قادر إلهى يجعلك فى صعود
ون كنت مخلوق عفيفى يقلبك فرى جود

إيه العمل فى النزول يا قلة الحيلة
لا كيف بنزرع ولا دخان ولا نيله
يا قطننا يالى وحدك تمشى بالتيلنه
ما تشد حيلك وعود للميت ريال عود عود

لولا زمام مصر ما كانت مصانعهم
ولولا فلاخنا ما كانت بضايعهم
إن كان حاتلعب بأسعارنا صوابعهم
يا عم من يوم ورايح سعرنا محدود

وأما سمسار واشنطن إن طلب قنطار
نشعلق الشعير فى سابع سما إن طار
لحد ما تروق وتطامن على الأسعار
ون كان على الخمستين خير ربنا موجود

حاسب من اللى دخل بالشنطه يا فلاح
جايب شبك من بلاده والجدع طراح
وتبص آخر يناير تلتقيه تمساح
وتبقى جلسه ومحامى ومحضرين وشهود

ادخل نقابة الزراعه وهى دى تعينك
وبدل البنك مصرى ينقضى دينك^(١)
وخذ من البورصه بالك تنفتح عينك
البنط طالع وننازل والسماسره قروود

امسك لهم يفتح الله واشترى الأسهم
وسيب بناكى وخريمه يوجعوا راسهم
والله الخواجه ان زادت له فتلتين قاسهم
اقفل يا شيخ المخازن من عامود لعمود

زعماء ...

الأمة طالعه بجيوشها	من أمير لفغير
لا ذره ولا جن يحوشها	من مصير لمصير
لحد ما تلاقى خيوشها	تبدل بحريير
ولحد ما تخلى دشيشها	بسكويت وفطير

(١) كان بنك مصر على وشك الظهور إلى حيز الوجود .

يقبى نذل كبير	فالراجل الى يفر كشها
هو والمقـاطير	عازله لقمه يفر كشها
أو كابين فى ابو قير	وفىلا حـوه يفر كشها
يشبعـوه تجعير	ويلم شله أوباشها
تعجب الجماهير	ويشوف له فتوى ينتشها
أو عن الدساتير ..	عن المعاهده الى نقشها

اختلاسات

صاحب تدبير	أشهد بأن المولى قدير
من دون الناس	وإننا احنا ناسات خنازير

مريانه	أصل السبب مره عيانه
ولا حتى لباس	مالهاش ربايه ولا ديانـه

أراروط وطبيخ	يدغدغوا لنا فى التلايخ
ادفس دفساس	وكل شىء ان شالله فسيخ

كخه ودحه	حافضين لى من علم الصحه
قادر تحتاس !	وم الأدب قوله آحه

على شضليه	نطلع جنبنا أفنديه
-----------	-------------------

يانجوع يا نبقى حراميه — ما نفوتش مداس

ويوظفونا كان مخصوص — في عهد وفلوس
لأنهم عارفيننا لصوص — نفع متراس !

يدخل لفندى على المكتب — يدوق المكسب
ويلتقوه سيد من ينهب — أربع تخماس

يدرز جيوبه ومنديله — باللى يجيله
وامه الأروبه تدعى له — فى أبو العباس

وتقول يا فهمى الله يزيذك — م اللى يفيدك
ويكثر الرزق فى إيدك — بعد ما تنباس

وكل شىء يدخل فى الجيب — ما اسموش قال عيب
تقول عليه رزق من الغيب — لاحرام ولا باس

ومراة لفندى الدواره — ام حلق طاره
تقول على السرقة شطاره — شوف الإحساس

وفهمى افندى كده محفض — نازل يقبض
لحد ما الخزنه تنفض — ويجوا الحراس

يبقى الخبر مستور حبه يصبح قبه
روتر يشيعها أوروبا ويجبها هافاس

وكام في مصر أوروباوى عملوه حاوى
ولما بخلق سى بلاوى قفل الكراس

في اسكندريه فكريه مره حرميه
تاخذ وتعطى لفنديه أشكال واجناس

وإذا اختلس مثلاً شامى يلقي الحامى
ويطلع المصرى حرامى محلق الراس.

خطوا الافندى ابو جربطه شاف في محطه
شغل دراعه في الشنطه زى الرفاس

وقال له عقله العلقه تفوت ولا حد يموت
لكن فقير يصبح مرفوت وشرف ينـداس

شفتش سى نشأت علم الدين عملوهلى أمين
في لجنة الزفت التموين وطلع هلاس

قام اترفد حسب الجارى وصبح خا.....
وباع صحون في الحجارى وكراسى عباس

وفي التجاره عمل عمله حرق معاملته
نهب وتجار الجملة وجدوه فلاس

ما نفلح الا في وظيف وأديك شايـف
بانبيع فلافل وقطايـف شغل الكسكاس

وكل ده من ام جلاجل فيها دناجل
تبط وثقول للراجـل زق التربـاس

محطة الإذاعة

« لم يتمكن سكان أفريقيا الشمالية من سماع
محطتنا لاصطدام موجتنا بموجة بروكسل،

أرض الحباب بعيدة يالهفتى عالجاب
قالوا المحطه الجديده حرر عليها العقارب
تخطى بمصر السعيدة عندك في أرض المغارب
حب الجهاز أمريكاني بالدين ومبلغ يساوي

يا مصر فالك مبارك يا قائمه من بعد نومه
خليتى صوتك يشارك لندن وباريس وروما
أنا الرزيل المكارك لملك عشقت الحكومه

الى بنت لك محطه في المحجر الزعبلاوى

حطيت على القلب إيدى	لما سمعت المنادى
ولهان وناكر وجودى	في وادى والنيل فى وادى
أقول له شنف يا سيدى	ياما انتظرنا الساعادى
إحنا الى لايجين عطاشه	هات الى عندك ياراوى

صوته الحنين قرب لى	مخنوق وفى الحلق شارق
حسبته فى الوجد مثلى	يكى وفى الدمع غارق
ولا أحسبه حس طفلى	يكى فى أربع مفارق
فيها الترمواى ييرطع	والرعد من تحته داوى

قام المحاضر يحاضر	على السفر والتجاره
كأنه واقف فى شادر	بايظ ومليان سكاره
يزعق ولا حد قادر	يسمع له ياميت خساره
فضلت أفتح وأقفل	حتى بريت الملاوى

رفعت بدا فى القرايه	ونا الى رفعت سبانى
دارت معاه الرجايه	أحسبها فى بيت جيرانى
أحلف ما فسرت آيه	ولا فهمت المعانى
ضرسنى صوتك يارفعت	وانت الى صوتك رهاوى

فعدت محبوس فى ضيقه	خايف تفوتنى الغيمه
--------------------	--------------------

ولو تدق الحريقه
ون رحت لبعيد دقيقه
ون كنت باغسل إديه
في البيت أقول : لا سليمه
أرجع وأسأل حلیمه
أرجع في إيدى الرغاوى

واقول يا عالم بحالنا
واحجب عن الناس عوارنا
نسمع نغم من فينا
والكل ساجدين في ملكك
ابدل موجاتك بغيرها
وكون بفضلك ساترها
ومصر نسمع جعيرها
وفي الميدان السماوى

يا مصر مفرز وجمالك
أحلف بعزة جمالك
شمر دراعه وبنى لك
تحود وتقلت وتربع
ماتلتقيش فيه مجامل
ماركونى بالعند عامل
محطه من غير فرامل
زى الحمار الحضاوى

تركب بروكسل عليها
تحفى الحلاوه الى فيها
ماتقدريش تغلبها
لا لك مدافع تحيرك
زى الغطا عالمكبـه
ماهوش ركوب المحبه
دى من ممالك أوروبا
ولا تفيد الشكاوى

ياللى بنيتم محطه
مالكـم بديتم بغلطه
وضاع أدانكم فى مالطه
والله الفونوغراف بداها
للدنيا تسمع وتحكم
جابت على العكس ربحكم
اكنه من فوق سطوحكم
ينفع ويمنع بلاوى

الفواكه ..

حاطين في مدخل جماركنا خير حندوق
يقول على كل وارد للبلد موبوء
خافين من الخوخ والكمثرى والبرقوق
فيهم جرائم تتعدى الخندويل في دسوق !
واحنا هنا من « البصاره » قلبنا محروق
وريقنا يجرى على حة جزر مسلق
أصل الحكاية ، الذوات ، ولهم علينا حقوق
زارعين بساتين وخافين من نزول السوق
ياما غنى يشتريها والفقير مدعوق
والرب يخلق ويمنع نعمته المخلوق

جرسونير اتكم

جرسونير اتكم وعواماتكم منيم ———— لكم طول النهار
والنهب داير في منتجاتكم من السماصره ومن التجار
وديع نعيمه — وميشيل طعيمه — وبابور خريمه — وعذاب أليم

وليه شريف بيه يقول لي بدرى لمصنع الصلب والحريـر
ويسعى ليه عالفلوس ويجرى ويشغل العامل الفقير

ماهى الماهيه — م الأبعديه — يوماتى جايه — والخير عميم

عمالنا صارت من المصايب يتمنوا للعالم النوايب
يا حرب تالتة تفرج عليهم يا دوده حلوه تشغل إديهم
وإذا الصنايعى عبح حانوتى يطلب من الله موتك وموتى
ويستجيب دعوته الكريم

يوم الحداد...

يوم الحداد، كان صحيح مشهود، ويوم معلوم

وفيه على كل سحنه ملطمه ، ووجوم

كل الصحف جللت بالأسود المششوم

وبالنكوسى ، رايات ، فيها سيوف ونجوم

وهى الكرافته سوده من محل ناحوم

وهى جرايد أوروبا نوته ، والروم

خبره قروه ، واترمى فى المطرح المعلوم

واحنا أهوه ، — زى ما احنا — وسطنا مقسوم

لو كان يفيد البكا ويرجع الخرطوم

تندب على وجهنا بالدبش والدقشوم ؟

يا اهل المغنى

يا اهل المغنى دماغنا وجعنا دقيقه سكوت لله
داحنا شبعنا كلام ماله معنى ياليل وياعين ويا آه

طلعت موضه غصون وبلايل شابط فيها حزين
شاكى وباكى وقال مش عارف يشكى ويكى لمن
واللى جابت له الداء والكافيه ، طرشه ماهش سامعاه
يا اهل المغنى دماغنا وجعنا دقيقه سكوت لله

ردى عليه ياطيور بينادى، وارمى له الجناحين
وانت كان يا بابور الوادى ، قل له رايح على فين
قل له اياك يرتاح يا بابوره، ويريجنا معاه
يا اهل المغنى دماغنا وجعنا دقيقه سكوت لله

كل جدع فرحان بشبابه يقول فى عينه دموع
ياللى جلبتى شقاه وعذابه ، حلى لنا الموضوع
طالع نازل يلقى عوازل واقفه بتستنياه
يا اهل المغنى دماغنا وجعنا دقيقه سكوت لله

حافضين عشره اتناشر كلمه، نقل من الجورنال
شوق وحنين وأمل وأمانى وصد وتيه ودلال

واللى اتعاد ينزاد ياخوانا وليل ونهار هواه
ياهل المغنى دماغنا وجعنا دقيقه سكوت لله

الدواوين

الأربعة الراشدين حسب الشرف والدين
كانوا يحاسبوا الولاه ، ويفتشوا الدواوين
على انصرف راح لمن والى انقبض من مين
والراعى مسئول عن الظالمين والعادلين
وعينه تسهر على الصالحين والنايمين
أحسن يياتوا الرعايا كلهم ضايعين
حاتروح تلاقى ساداتى كلهم حالقين
أحسن وأجمل سموكن عندهم لابسين
شايلىن دوسيهات ورق رايحين بها جاين
من المدير للوكيل ، من عهد إسماعين
جواب بكلمه وغطاها يكتبوه خمسين
وجواب يردوا على صاحبه فى ست سنين
ياما مكافأة شهيد ، ذريته المساكين
تقبضها من بعد ماتخلف بنات وبنين
وف كل أرشيف وزاره ترقد التعابين
ما بين قناطير ورق متكلفه ملاين
كانت مشاريع عن التمويل والتعدين

جاءوا لها ألفين خير من لندره وبرلين
إسأل ديوان المحاسبه أو بهي الدين
يخبرك باليقين والحق كله يقين
« أحسن عمل يعملوه ونت سيد العارفين
في يوم ثلاثين ياتوا كلهم قابضين »

حاتجن ...!

حاتجن ياريت ياخوانا مارحتش لندن ولا باريـز
دي بلاد تمدين ونضافه وذوق ولطافه وحاجه تغـيـظ

مالا قيتش جدع متعافي ، وحافي ، وماشي يقشر خص
ولا شحط مشمرخ افندي معاه عود خلفه ونازل مص
ولا لب اسمر وسوداني وحمص وانزل ياتقرقيـز
حاتجن ياريت ياخوانا مارحتش لندن ولا باريـز

ولا عركه في نص الليل دايره بالحيل وساحبها بوليس
قدامها جدع متجرجر وشه معور قال دا عريس
الخلق ماهي بتجوز واشمعي احنا مفيش تميز
حاتجن ياريت ياخوانا مارحتش لندن ولا باريـز

ولا واحده في وش الفجر تبرطع ماله الدنيا صوت

قال إيه جوز خالتی ام احمد سلفه اخوها السيد مات
سبحانك ما اعظم شانك والله الموت دا مفيد ولذيد
حاتجن ياريت ياخوانا مارحتش لندن ولا باريز

ولا واحد طالع يجرى وواحد تاني يجرى وراه
ويقول ها مع حصلتك يابن اللى ابصر إيه عاملاه
لا الشارع غيط ياخوانا ولا احنا بداره ولا احنا معيز
حاتجن ياريت ياخوانا مارحتش لندن ولا باريز

ولا واحد يبيع حاجة يقول بريال وتاخذها بصاغ
ياخوانا دى حتى الإبره تاخذها بدوشه وقلب دماغ
حلفان وعراك ومناهدة ويمكن ضرب كفوف يا حفيظ
حاتجن ياريت ياخوانا مارحتش لندن ولا باريز

ولا فيش ميت ألف صعيدى بتوع يانصيب هاجمين ولا فيش
ميت ألف معوض داعس جاى معاه صندوق ورنيش
والله كرهت القهوه وحرمت اقعد عالآفاريـز
حاتجن ياريت ياخوانا مارحتش لندن ولا باريز

الزحام ..

شوف الجاموس لما يشرب من شطوط النيل
الواحدة جنب اختها واقفين في صف جميل
شوف الغنم لما تطلع للمراعى رعيلا
لا الكبش يطفى ولا ينطح بقرنه فصيل
شوف الطيور لما بتروح في كل أصيل
أسراب منتظمة راجعه الحمى بدليل
وانظر وشوف البنى آدم ، بتوع دى الجيل
كل الأمور عندهم بالزغد والتشصيل
قالوا الى مايكونش في الأول دا يبقى عويل
ومن كده بالقليل في كل زحمة قتيلا
والله البهايم ولا أولاد قايلا وهايلا

ياهل السودان يا عرب

ياهل السودان يا عرب ! يا مسلمين الله !
بيننا وبينكم نسب ، كل الأمم عرفاه
لأنتم نسيتموه ، ولا احنا للأبد ننساه
والنهر بيننا وبينكم ، ربنا أجهراه
واللى شرب دمكم ، من دمنا رويناها

واللى ركب زهر كم ، فوق زهرنا هواه
واللى وعدكم وعدنا ، بالنعيم والجاه
وادحنا ونتم عرايا ، محتاجين لغطاه
لو كنا ننسى قرابتنا ، ونجربى وراه
حانفرط شملنا ، ونقول ياندماه

الجيش وقع فى نص ساعة أسير ...!

كان نفس صاحبنا بتاع النبى	يجعل بلاد الدوله مستعمره
هجم عليها ابن الأنيت	لقاها أمه كامله متحضره
ياريت ياروتر بالخبر مادريت	ولا ضربت السلك فى لندره
الجيش وقع فى نص ساعة أسير	والنص فى ساعه الاربع انهزم

دى ساعة كان ناوى عليها الملك	يدخل أيا صوفيا يشيل الهلال
مسك بإيده مفتاح الزمبلك	اتلخفن العقرب ودارت شمال
كان يحسب الى يملك يملك	والملك للقهار وبعده كال
البرلمان تخنه وسيفه الوزير	يطيع أوامره من نهار ماحكم

قال فنزيلوس نفتح بلاد الوحوش	والعصبه تعطى الانتداب لليونان
الحاج أنسى يلم الجيوش	والمصطفى ساكت ويطلب كان
لا يقول لهم سكر ولايقوم يحوش	لحد ما اتعبت وكان الى كان
عمل بشوره عزرائيل المشير	الى مايعرفش الجيوش م الغنم

في الطريق !..

أربع عساكر جابره يفتحوا برلين ...
ساحبين بتاعة حلاوه جايه من شربين
شايله على كتفها عيل عنيه وارمين
والصاج على مخها يرقص شمال ويمين
إيه الحكايه يا بيه ؟ جال ... خالفت الجوانين ؟

اشمغنى مليون حرامى فى البلد سارحين !
يمزغوا فى الجيوب ويفتحوا الدكاكين ؟
أسأل وزير الشؤون والا أكلهم مين !

الصعايده

حلال عليكم يا صعايده تكسبوا الملايين

بعزمكم نلتوا الفايده والجميع نايمين

فلوس على المصرى عايده مش على التانيين

خضار، سمك، كله مزايده واشتغل يا زيدان

من غير كتابه ولا قرايه تملكوا العمارات

وانا والذوات الى معايا قال بتوع شهادات

مقعداننا في تكايا
في كل كام عام ، وكفايه
نشحت العـلاوات
نفختك يا ديوان

شلة كوامل وصوامعه
كسب الوزير سنوى في جمعه
اشطزى لنا انتى يا جامعه
يترصصوا رؤيا وسمعه
شقلبوا الأوضاع
يكسبه اليـاع
واخلقى الصياع
يلعبوا كونكان

المجلس البلدى

قد أوقع القلب في الأشجان والكمـد
ما شرد النوم عن جفنى القريح سوى
إذا الرغيف أتى فالنصف آكله
وإن جلست فجيبى لست أتركه
وما كسوت عيالى في الشتاء ولا
كأن أمـى بل الله تربتها
أخشى الزواج فإن يوم الزواج أتى
وربما وهب الرحمن لى ولدا
يا بائع الفجل بالمليم واحدة
هوى حبيب يسمى المجلس أبلدى
طيب الخيال خيال المجلس البلدى
والنصف أتركه للمجلس البلدى
خوف اللصوص وخوف المجلس البلدى
في الصيف إلا كسوت المجلس البلدى
أوصت فقالت أخوك المجلس البلدى
يبقى عروسى صديقى المجلس البلدى
في بطنها يدعيه المجلس البلدى
كم للعيال وكم للمجلس البلدى

الأحياء الأجنبية والوطنية

وحول منازل الغرباء عنا	غرست الورد ثم الياسينا
وأخضلت الأغصان لهم سماء	ومهدت الرخام الجذع حينا
وما قرموا للحم الطير حتى	منحتهم الأوز العائمينا
تفجر تحت أعينهم عيوننا	وتفقأ وسط أعيننا العيوننا
وترضى عنهم وتصد عنا	وقد سخطوا ونحن الشاكروننا
فمر بنا علينا كل عام	يحي الأتقياء البائسينا
ترى الوحلات جائمة وفيها	بنات قد تعلمن العجينا
إذا كنت الطبيب ونحن مرضى	فأوصى الناس خيرا بالبنينا

المجاري

حارتنا زينة المجارى	في وسطها نهر جارى
بفضل مجلس بلدنا	وفضل فيض المجارى
وجدنا حوض للسباحه	علم ولادنا الصراحه
وعند عرض المساحه	علم كبارنا الكبارى
وبلاعات كنا عنها	غافلين ما نعرف مكانها
في كل بلاعه منها	يغرق عامود السوارى
فيها ابن آدم يغطس	ويقب يشهق ويعطس
قبل ابن آدم ما يغطس	فيه الطلمبه البخارى

أما اللى طامس عنينا	دبان يسود مدينه
وقالوا جايبين ماكينه	تصليحها فى الورشة جارى
والهمه تصبح عظيمه	على خرابه قديمه
كوم الحجاره جريمه	يجبى لها مأمور إدارى
مجلس بلدنا يا قاسى	بزياده خطف الكراسى
وردها وانت راسى	خلاها مشروع تجارى

قسم الإيرادات

القسط يام اليتامى سجله المقدار على الغنى والفقير والدار وأهل الدار
قسم الإيرادات حط ختمه والمقدر صار ومعاون الحجز واقف يكتب الإنذار

الحجز التنفيذى

جاي عزرائيل المحصل من وراه ملكين (فرقس) و(خرقش) ومنهم تهرى على فين
فى الكانتو بيعى هلاهيلك، ووفى الدين القرش قرشين وحطى مية الاتنين

ادفع وعارض

جاي عزرائيل فى الصباح عالدين متشدد واللى اندفع فى الصباح فى الليل يتجدد
وكل دا من دموع العين يتسدد خلى (المقاول) يقيم العرس ويعدد

التظلم

رأيت بعيني المدير قاعد مع اصحابه ومظلومين يشتكوا واقفين على بابه
ضرب بإيده وأمر بالطرد حجابيه وشرطت العرضحال قارض على نابه

قلم الرخص

يا عم ياللي كانونك في الخرابه عليه ألفين مهندس يقيسوا درفته ورجليه
لكل (ماجد مكرم) علاقل جنيه تستاهل الذبح ... بتبيع الفلافل ليه

قلم الصيانة

ويااللي بالعرقسوس سارح وبتخبط عبط على قدرتك والكبايات عبط
خايف عليك وانت ماشي في حي متربط من نقره تندب فيها وانت متربط

التظلم

شماع ! عطوه السيف يضرب في راس التين (١)
ضربها من جذرها ... صرخت عليه ملاين
بنى القصور في الخلا حول القصور بساتين
وإن كنت شاطر تقولى على الحرامى مين ؟

الصحة

زارعين في حارة زخارى (٢) كل غصن يميل
ويميل علينا الوباء يمسح قاييل وهاييل
سنادسى في الليل يلغوص في الخبث ويشييل
وفي النهار الصعايده داخله بالبرامييل

تعالى خد عمرى

يا مجلس اسكندرية طال عليك صبرى أكلمك بالروميكا والا بالعبرى
تاخذ فلوس الناس تبعت فيها عالكوبرى بدل ماتاخذ فلوس الناس تعالى خد عمرى

(١) (شماع) يهودى أخذ مساحة كبيرة من الأراضى بحى السيوف وقامت البلدية برصف هذه الأراضى وإنارتها (وأطلق على الحى اسمه) .
(٢) زخارى اسم يونانى — أى الحدائق فى أحياء اليونان .

حي السيدة

ياست ياخت الحسين جيرينا من البلاوى المرتمية علينا

* * *

الميكروفون ممنوع في حارة الصاوى^(١) (أحمد محمد) وإحنا فوقنا داوى
بكل عزمه من ييوت وقهاوى للصبح تسمع بلغراد وأتينا

* * *

واللص مايقرب لجاردن سیتی
لكن في عز الضهر يدخل بيتی

* * *

أرض الزمالك ليل نهار لماعه وحنا ما نحظى بالنضافه ساعه
من جنب كل رصيف طوفان بلاعه أما السما تمطر زباله علينا

الضرائب

أدفع ضرائب على عینى
لكن تعالوا حاسبوني
لو تتصرف على شيء نافع
ولا على القصر العینى
وابيع هدومى ولحافى

يسرنى ويهيننى
أدفع ألوفى وملايننى
أكون سعيد وأكون شافع
مثلا مصانع ومدافع
واقطع لكم لحم كتافى

(١) الأستاذ أحمد الصاوى محمد .

يغمنى ويكنى	ولا اشوفش جايح ولا حافى
أشوف كده السد العالى	وبادعى أيام وليالى
وكد إيدى وجينى	وأقول دا مبنى من مالى
النفايات مع أساطيلنا	ويا سلام لما تجيلنا ...
واقول يا عالم هنونى	يومها صحيح نبقى وصلنا
لما الضريعه تبحتسر	وابات مضمض متكدر ...
وعنده شخرم بسيونى	مهيه للأستاذ بعجر ...
ومن فلوسى يتبنى	الى ابنه بعته فى أوربا
ويقول مع والدى خدونى	قريب يعود زى الضربه
أو فى القهاوى متواعده	جته على المكتب قاعده
الأمه نصها شغاله	ماهيش سياسه ولا عداله
يتبط ويقول رقبونى	ونصها التانى عالـه

الضمان الاجتماعى

للى حوجها الزمان	مليون جنيه الضمان
لموظفين الضمان	النص منهم يروح ...

* * *

وعالجنيه فيه مدير	حرمة حاتقبض جنيه
وللوكيل ميت غفير	وللمدير ميت وكيل
كثير وفوق الكثير	وكتبه ومفتشين
تروح لبيت الفقير	وسيارات للجميع

تعمل تحرى عليك من الجيران والحيطان

* * *

عجوزه م الغابرين مولوده فى منقباد

جوزها فى جيش اسماعين من قبل مولد فؤاد

ومات وماتت معاه بنات وماتت ولاد ...

واتشردت فى البيوت تخدم وفى كل واد ...

وتقول لها الممازيل عايزين شهادة ميلاد

كان شهادة وفاه عن الى ماتوا ... زمان

* * *

براهه يا موظفين خايفين من النصابين

ومدعين الكساح والعمى والمثلولين

الأعمى يقدر يقول لله يا محسنين

أما المكسح يطول يمد إيده اليمين

وانتم جزاة الأمانة على النظام والروتين

حلال عليكم مكافأة ... النص مليون كان

رواية شهر زاد

الجنود : اليوم يومك يا جنود ماتجعليش للروح تمن

يوم المدافع والبارود مالكيشى غيره فى الزمن

هيا اظهري عزم الأسود فى وجه أعداء الوطن

دا عار على الجندى الجمود إلا إذا لفه الكفن

البطل : على السما خلو الهجوم لو كانت الأعدا النجوم
وزلزلوا الأرض إذا جارت على الأرض الخصوم
الجنود : البورى بيندهلك اسمع منه الصوت
يقولك لك فوت أهلك واستهتت بالموت
أحيننا سعدا وأمتنا شهيدا

البطل لحبيته : يا حياة الروح هل حالك حالى
تذكرين الوصل ... فى تلك الليالى
هل يزور الطيف ميدان القتال
أم يحول العمر ... من دون الوصال
فى رضا الأوطان إنى لا أبى إلى
إنما الإقصاد من شأن الرجى
الحبيبه : سر وعد بالنصر من مولى المعالى
يا حبيبنا سار فى نيل المعالى
البطل : إحننا الشباب من طبعنا نفدى الوطن بروحنا
الجنود : هيا بنا هيا بنا نقوم نودع بعضنا
البطل : حمل السلاح فى الوقت ده شرف لشبان عصرنا
نمحي العدا ونروح فدا ...
فى حب مجد بلادنا ...

وفى استقبال الأميرة شهر زاد يدور الحوار الآتى بين الأميرة والجنود :

الجنود : تحيى الأميرة شهر زاد ذات العفاف والأبه
الى باتت كل البلاد من فوق لتحت تحبها يا بختها
شهر زاد : أحب اشوفكم ع القلعه واقفين ثابتين

سلمتهولك لما شفتك راجل تزينه لما تمسكه يمينك
الجنود : سننتصر ونرتفع والأعداى تنخذل
روح يا بطلنا تنتقم وارجع محقق الأمل
دوسوا الأعداى بالقدم ماحناش فى وقت الانتظار
املوا نفوسكم بالهمم واملو السما والأرض نار
يا عسكرى الى انهزم يقع فى عار وأى عار
وان داس على النفس وهجم ربك كفىل بالانتصار
* * *

ويعود الجيش منتصرا ويردد ...

الجنود : الجيش رجع م الحرب بالنصر المبين
والدنيا هايصه والأهالى فرحانين
بعسكر الدولة الى عادوا منصورين
رافعين بنادقهم وفاردين العلم
شهرزاد : تعالى ياباش سنجق دار قول لى ياروحى على الأخبار
قوللى الحكايه كلها م الابتدا للمتها
البطل : أول مارحنا بالعساكر من هنا
واخدين معانا أكلنا وبمنا
عشان ماأرضيكى وأرضى ربنا
ساعة عساكرهم ماشافوا وشنا
لقينا سنجقهم جرى!!!

شهرزاد : كمل بقى يا عسكرى
البطل : اتفر كشوا زى الغنم الى انهزم والى اتلخم
والى وقف زى الصنم والى اكلها بالصرم
أتارى دول عسكر عدم

أول ماشفت المسألـه
تروح خساره فى الخلا
لهم دقون مدلدله
قلت ياواد إيه العمل
أطبخ لهم طبخة سطل
وخلناهم فى الحلل
نطوا عليها بالعجل
مارضيتش أضرب قبله
عشان عساكر بالبلا
وجاكتات مهلهله
مايسعفكش إلا الحيل
جبنا الدتوره والعسل
وحطينا الشئ ع الجبل
والأكل والمهط اشتغل

سبنا العساكر مغروسين زى البصل

مافيش ولا واحد وصل
لأهله يحكى إيه حصل

الجنود : مين كان يقبـول الحرب حاتخلص

الحرب كانت داهية تقيله

عايزين يقى نشرب ونهيص

فى صحة الأبطال الليله

شهرزاد : ... يالله اشربوا .

الجنود : بزيادة شربنا .

شهرزاد : كمان اشربوا

الجنود : .. بالذمه شعبنا .

شهرزاد : المملكه زادت أنوار

المملكة عرفت تختار

يا هادى الملك يا هادى

فرحانين بفرح أميرتهم

الجنود : افرحى بجلالة قدرك

إنتى حبيتنا وأميرتنا

أمرى ونفذ أمرى

فتأمر الأميرة بتسريح الجيش ويتزوج البطل حييته وتأتي الأخبار بأن الجيش المهزوم أعاد الكرة على المنتصرين فيأتي الجنود إلى البطل ليلة دخلته ويدقون على

الباب

الجنود : افتح ..

البطل : مين ؟..

الجنود : افتح ياباش سنجدد .

الحيية : ما تردش عليهم .

الجنود : افتح يا لله انت وهـوه أحسن نفتح بالقـوه

راجعين عشانك..... اخلص قوامك.....

البس حزامك..... واركب حصانك.....

عشان تسافر مع العساكر.....

والجيش بحاله..... رجـع علينا

جميع رجاله..... بره المدينه

البطل : الليله ليلة دخلتى يا مغفلين.....

جاين تفلوا فرحتى..... متقصديـن

الجنود : دا أكل عيشك وواجبـاتك

حانتـنى جيشك عشان مـراتك

الأمر جالك..... اعرف خلاصك.....

ياتقـوم تسافر ياقطـع راسك

البطل لزوجه : أنا مسافر يا حبيبتى يوم والا يومين

الزوجة : الله يجازى الحريه حاتـوديك فين ؟!

البطل : دا الحرب دينى وملتى و انت روحى ومهجتى

ان مت انا ما يهنى إلا نهار ما تحزنى

خلاص خلاص وادى النفير واشوف بقى وشك فى خير

* * *

وعندما يعود البطل من الحرب للمرة الثانية ينشد الجنود :

الجنود	: آدى الشمس والقمر	فى ساعه هنيهه
الحبيبة	: يا حبيبى غبت عنى	جوزك يا عنيهه
الجنود	: مين يقول انه نساكى	كنت واخذ قلبى منى
الحبيبة	: أنا لألام لفرحتى	ياترى والا فاكـرنى
البطل	: أنا روحى وفؤادى	ياما بات شاكى وباكى
	يا حبيبتى يا ملاكى	مستحيل ينسى هواكى
	مهجتى عقلى صوابى	يا منى روحى وقلبى
		بين إيديكى يا مرادى
		كل ما أملك فداكى
		أدمعى حبى شبابى

* * *

ومن الأناشيد الحماسية فى رواية شهر زاد نشيد :

أنا المصرى كريم العنصرين	بنيت المجد بين الإهـرامين
جدودى أنشأوا العلم العجيب	ومجرى النيل فى الوادى الخصيب
لهم فى الكون آلاف السنين	ويبنى الكون وهما موجودين
واقول لك عالى خلانى	أفوت أهلى وخـلانى
حبيب أوهبت له روحى	لغيره لا أميـل تانى

وكذلك نشيد :

الجنود	: أحسن جيوش فى الأمم جيوشنا	وقت الشدايد تعالى شوفنا
شهر زاد	: مستقبل الأمة بين إيديكم	نهجم ولا أى شىء يحوشنا
	ردوا وادى الشعب بيناديكم	فى الوقت ده نعتد عليكم
		يقول لكم احفظوا شرفنا

الجنود : أحسن جيوش في الأمم جيوشنا وقت الشدايد تعالى شوفنا
آدى جنودنا وادى بنودنا وفي الدفاع والهجوم تجدنا
مالناش صفه غير الشجاعه وللجهاد ربنا خلقنا

الاستعمار البريطاني

أحمدك يا من فتحت الباب علينا بعد أزمان لما دبنا واستوينا
يا الله نصلى على طه نبينا واتحفه بالفل والفضه الزكيه
جالنا ضيف بارد وساقع وابن جزمه نام ومزع القماش والوقت أزمه
والضيافه بالكثير ما تكونش لازمه غير ثلاث أيام ودى بالتلمييه
طقة الضيف فى الفطور ميت ألف بيضه غير ميتين طور كل طور معلوف وموضه
بعت عفشى وبعث ملكى وبعث بابى والطاحونه والعمار والبطانيه
اسأل البنك العقارى وبنك روما تصرف المبلغ وشيكات العزومه
والقلم مش طالع الا بالحكوميه إن كانت تنفع وبالقدره القويه

القال

أصلى على صاحب الرسالة محمد نبى وطنى جاهد وشاف الصعاب
يرحم زمن قراقوش زمن الوصايه أيام ما كان البحر والبر سايب
البحر لم فيه غير مركب الهوى والبر لم فيه خلاف التجايب
العاشق الوهان يروح لحبيته يسفح لها المشوار ويرجع دايب
يمشى سبع أعوام على الرمل والحصى وسبع شهور فى مركب زكايب

اصحى يا أعمى العين الله لا يرحمك شوف الفيونك الى اتربط للمراكب
البحر طويل كام ميل وفي البحر كام قدح أزرق جميل يضوى في شمس المغارب
شبك شطوط الهند في الشط لندره بقت تخطينا الأمم الجنايب^(١)
فتحنا ياب الدار حسب فتوة البجم^(٢) بقت زريه للضيوف والخباب
جابوا المهندس شغل الناس والفلق فتح لها طاقة تجيب المصاب
دخلت لها منها السهام المنقرشه أخذوا النشان عالصدر والسهم صايب
كان القتال في السوق ألا أونا ألا دوى^(٣) سبتوه ملقح واشتريتو الركائب
فين البلغ ويا العتيقه المرصصه تنزل على مخاخ ولاد الخرايب

المفاوضات

أربع وزارات يحبروا فيكى يا مفاوضات الأوله حيرت ماهر وماهر مات
والتانيه محمود أهو راجع لها بالذات والثالثه صدق الى هو صاحب الكفاءات^(٤)
لكن دوننج ستريت^(٥) واقف بكل ثبات يقول لنا مسألتكم مسأله باشوات
نحكم ونفرح ونتمخطر في مهرجانات وموظفين تنتعش وتنط عالدرجات
وكلهم عندنا خدام في الشركات البدرشين والقنال والملح والفوسفات

(١) أى الأجانب . (٢) البجم هو الوالى سعيد الذى سمح للأجانب بفتح القنال .

(٣) أى المزداد الذى ينادون فيه ألا أونا وألا دوى .

(٤) تولى المرحوم أحمد ماهر وعلى ماهر الوزارة دون أن يصلوا بالمفاوضة إلى نتيجة مع الإنجليز وحدث هذا أيضا مع المرحومين محمد محمود وإسماعيل صدق الذى كان يلقب نفسه بصاحب الكفاءات .

(٥) اسم الشارع الذى يقع فيه مقر الحكومة البريطانية في لندن .

متفائلون ومتشائمون

يومي بنسمع كلام الله ومش سائلين وعدنا بالجنة قلنا جنة مش عايزين
وصف لنا نار جهنم قلنا مش خافين سلط علينا خلايق زينا من طين
تطلع وتنزل بنا في أسفل السافلين وزير في لندن يذيع له كلمتين فارغين
يكركبوا بطنا ونبات متشائمين ولورد يعطف وينزع كلمتين حلوين
يطمنوا قلبنا ونبات متفائلين يا هلتر في الحالة دي إحنا نبقي مين ؟
ضايعين وتايهين ولا رايحين ولا جاين

فتوات المظاهرات

في مصر نكبه وطنيه جدعان بلدنا الفداويه
في طولون وباب الشعريه والسيده والحسينيه
الفتونه دي شغلتم فيها حياتهم ومماتهم
حارتنا اسمها « حتهم » واحنا يا سكانها رعيه
شكل الفتوه حنكوره له شوشه هايجه عالقوره
يسرح بأفيون وداتوره وشريك في شلة شضليه
وأما نايتنا الكبرى كان يوم ما يسمع بمظاهرة
يروح لها ومعاها عشره وتبقى غاره تتريه
ويقول ليحيى وليسقط وإديه بتكبش وتعبط
والهيصه مين فيها حيزبط في كل مخزن حراميه

والصبح تدفعى يا خزينه التعويضات الى علينا ...
لبنزايون وفرج ومينا فوق حقها ميه الميه
وايه أقول فى الطايفادى غير أهل وطنى وبلادى
يا شافعى والا يا بغدادى رخرين شوفوا لهم مديره

* * *

الفاتحة لمحمد على

لم اللصوص والنشالين والشحاتين وحطهم
فى أرض بور تصبح إذا ما أصلحوها ملكهم
الأرض جابت والعباد اتخلصوا من شرهم
وهم ذاتهم أصبحوا أعيان وأشيا فلى
الفاتحة لمحمد على

هنا اللصوص ميات ألوف وأرضنا بور كلها
شيل من هنا واحدف هنا وكل أرض وأهلها
حسبه بسيطه هينه مش عايزه لجنه تحلها ...
وتقول يا لجنه اتعدلى وتقول يا لجنه اتشكلى
الفاتحة لمحمد على

تهذيب سجون تطبيق قانون دا كل دا رايح عبس
اللص حاسب حسبته وعنده أحسن يتحبس
فى كل خمسين مره سرقة واحده فيها ينكبس
ومن جديد يرجع وجيه من جيوبنا يتملى
الفاتحة لمحمد على

ماانساش في يوم رحت اشترى لأعز أجباني كفن
مات الفقير في يوم عسير وجاري سلفني التمن
شال اللي هوه المحفظه وزاد على حزني شجن
وبسات على ورقة حشيش مع الجبايب مختلي
الفاتحة لمحمد علي

التهاف

شتم المعلم وسب الدين للناظر قالوا له مرفوت مؤبد منها يا شاطر
كان خاله ترزي ولا بن اخته عمل خاطر وفي المحل اشتغل يادوب قعد شهرين
أوحت إليه السياسة يشتغل هتاف والتهافين يجحوا طول ما البلد في خلاف
يا ما خطب قيمه تنقل قيمتها وبالتهاف والصراخ والهيصه موتها
ينطق سيادته بكلمه وهوه ما يفوتها إلا ليحي ويسقط واقبض القرشين
سأته أول سنه قاللي أنا وفدى سأته ثاني سنه قاللي أنا سعدى^(١)
سأته ثالث سنه قاللي أنا وحدي إذا قبضت الدراهم أخدم الفريقين

السياسي

عمل محامي مانجحش عمل صحافي مافلحش
طبع كتاب ما اتوزعش وف مصر كام تكسب يا كتاب

(١) كان الحزب الوفدي والحزب السعدني من أحزاب العهد الماضي .

والحزب يافطه وإداره	وشله من أهل الحارة
ويجى يوم تبقى وزاره	ويافطه حمرة عا الأبواب
وينا الحكومه يا معارضه	يانبقى فى الشركات أعضاء
بأيا حاله نرضى	وبأى شىء يرضى النصاب

تصريح ٢٨ فبراير

الأوله آه ، والثانيه آه ، والثالثه آه

الأوله بالبنادق سكتوا الثوار	ومدافع، أهم فاضلين
والثانيه اللورد ملتر يربط الأحرار	ويتراجع عن الغائبين
والثالثه تصريح فى فبراير وأصله هزار،	ومش نافع وقولوا آمين

الأوله مين يمزق حجة الطالب	فى دين مطلوب
والثانيه مين بس يمنع حجة الغالب	عن المغلوب
والثالثه تسلب ولكن قال لنا السالب	أننا المسلوب

الأوله بالسهوله ضيعوا الأرواح
والثانيه غول ابن غوله جار علينا وراح
والثالثه هيه المهوله تلتقيها مزاح

الأوله آه .. ، والثانيه آه .. ، والثالثه .. آه

أونطة الإنجليز

إن كان سيراوستن شامبرلين راجل طماع
عابز يضيع لنا ثروت في لعبه ضاع
يكون في علم الفخامه إننا قاعدين
فاضين لجر المشاكل كلنا صياع

خية الكفاح

ياللى الأوامر فى إيديكم سلامو عليكم
مشتاق بيسألنى عليكم راجل محسوب
فالحق عاللى عملكم ناس وهجم وانداس
ولاشاف يأمه جوزة نحاس بيتنه المخروب
راضى إلهى سبحانهه معظم شأنه
يخلى مثلاً روفيانو^(١) يلطش جفوب
ويخلى دكهه ابو ضب عريض يلهف تعويض^(٢)
أما اللى ساقها وزاد عالكل الواد الفل^(٣)
سقى التخزين كاس الذل أهو دا المشروب

- (١) اسم إيطالى شائع رمز به إلى الطليان الذين استولوا على جفوب .
(٢) أبو ضب عريض أى الإنجليز عندما أعطاهم زيور تعويضات عن قتل السردار .
(٣) المندوب السامى البريطانى وكان وقتئذ جورج لويد .

من شخطه منه يفور النيل	وتيجى الأساطيل
تفهم الساده المساطيل	مين المنـدوب
أدى اللى حاكم بالقسوه	أما أبو كسوه ^(١)
شيخ خدامين حتى ما يسوى	فردة مركوب
مطلوب تقوم وتشرفنا	وتنصفنا
من التخين ^(٢) اللى قرفنا	وملانا عيوب

* * *

كرسى البرلمان

وحياة غلاوتك عندى لاشرى لك كرسى وادخل مزاد الكراسى زى ماترسى
خمس فدادين حايعهم واحسيها قمار ينحطوا للواجبات والفته والأنفار
ويومها أعرف أنا آكل على ضرسى

* * *

حتى الغوريلا متفقين

حتى الغوريلا متفقين	والمصـررين
أحزاب ورا أحزاب نازلين	طحن وتكسير
وقت الخطر هما الأعدا	أما القعده
فى الغرزه تلقى لها مساعده	واهو ده التعمير ^(٣)

(١) أى رئيس الوزراء أحمد زيور الذى كان يلبس كسوة خاصة للتشريفات أسوة
برؤساء الوزراء .

(٢) وهو أحمد زيور الذى كان سمين الجسم .

(٣) التعمير — أى تعميرة الجوزة بالحشيش .

ولما تخرب ما يصدق	يشبع تشخير
يعنى المبادئ مجعوله	حبال مفتولة
لكل واحد قال مبدأ	يوم الخندق
فى الربط تربط بسهولة	والحل عسير
دستورى حر يقول قدم	طيب اقدم
وإتحادى يقول اهدم	وبلاش دساتير
والانجليز فى اللوج قاعدين	منتظريين مين
حيكون فتو انزفه ومين	ياكل التعوير
والعتره فيهم اهم وياه	يدوليه كراه
ويخلوا غيره يزن وراه	مطرح ما يسير
واللعبه آخرتها بياظه	ووزير طازه
ومسير كان عم أباظه	يقى لنا وزير
والطور إذا اتسبب ع الطور	آخرتها البور
أهو كل حزب يكون بالدور	وزرا ومأمير
والربح من غير تضحيه	ميه الميه
باقى السوزاره ياعضويه	من أهل ابو قير
اسأل صاحبنا المازنى اليوم	عن حال القوم
الى عطوه المال بالكوم	أجرة تحريير
يقول لك الولد العفريت	كلك عكاريت
غشونى فى المبدأ ورضيت	من غير تأخير
وقبل ما حط العرقوب	جوا المركوب

عالم بأن المال منهوب والحزب صغير^(١)

* * *

مصر المجاهدة

ياما عجائب وغرائب ، والا مصايب	وردت على مصر
الهمشزى والأناضولى ، والمنغولى	إحذف على مصر
وجيوش من الإنكشاريه ، والدلايه	إشحن على مصر
عبيد وكانوا خدامها ، بقوا حكامها	واحتلمى يامصر
سكنوا القصور زى القلعه ، وشموع والعه	واحنأ فى ظلام
حلال عليهم خيراتها ومسراتها	وعلينأ حرام
حتى بقينا فى بلادنا — مع أولادنا	زى الأيتام
ولكل واحد يتألم ، أو يتكلم	حكم الإعدام
نهض الفداوى عمر مكرم — ييجى يسلم	والشعب وراه
حلف يمين ليصفيا — من أعاديها	بمشيئة الله
حلف محمد على وياه — ليسير فى هداه	وبكل قواه
ولما حازها واتولى — قليل المله —	خانته ونفاه
نهض عراى من بعده ، وجمع جنده	للعيله الدون

(١) كان الأستاذ عبد القادر المازنى يقوم بالتحريض بجريدة حزب الأحرار الدستوريين وكان رأس ماله صغيراً .

توفيق صرخ لانجلترا ، جات من بره
 الإنجليز ملكوا أمورها — أما أميرها —
 وعاش عرابى فى منفاه — ياعباد الله —
 وبعده قام مصطفى كامل
 فى كل ناحيه فى أوروبا ، يرمى الخطبه
 دنشواى ومشانقها — ومن علقها —
 وانشال كرومر من قصره — وبلغ نصره —
 وعام تسعناشر قامت — ثورة ونامت —
 وسعد زغلول أشعلها — ويا رجالها
 و « شهود ملك » منها فيها — قالوا نخفيها —
 وفى اللومان شباب الأمه ، أما هما
 تحميه وتصون
 عاجز مجنون
 حى ومدفون
 زين الشبان
 زى البركان
 مجرم وجبان
 جدع الجدعان
 أيام وسنين
 وغريمها مين
 ونجحوا الخائنين
 قبضوا الملايين

شهود ملك لنجليز
 وكل منهم قبض له
 ثلاثين سنه مصر يحكمها
 نايه حزينه ويشرب
 وفؤاد وإبنه فاروق
 قام الجيش المصرى الضارب
 فيه الشعب وفيه الطالب
 يا الله ياخونه — يارعاع بره
 أهى أراضينا — بقت فى إيدنا —
 خدموا العدا الأشرار
 من الذهب قنطار
 الحديد والنار
 دمها الجزار
 جلبوا عليها العار
 دمر عرش الظلم وطاح
 وابن العامل والفلاح
 إحننا الأولى بخير البر
 وكل دخيل منها ينجر

والخوارجات اللى دخلوها — واحتلوها سبعمين عام
 تركوا الأرض وشالوا حملهم بعد ما وطو وضربو سلام
 كل دا إبتعدا لسه قدامنا عدا
 لسه قدامنا الجهالة تنتهى
 لسه قدامنا السماسره تلتى
 بعد ده — يا صحارى — يابرارى — إكشفى
 اللى فىكى مختفى
 بعد ده — يا مراكب — يا حبيب —
 بعد ده — يا مدافع — يا بنادق — سلمى
 عالعدا واتكلمى
 انتهى عهد اللثام والمفاوضة والكلام
 وابتدا عهد الجهاد ، والنظام والسلام

حرب كوريا وفيتنام

شئ يعلمه الله سبحانه عليم وحكيم
 يجر شعبه ترومان من بجحه ونعيم
 نجزره مقزفه فى زمهير وجنحيم
 وغير ما يخسر ماهوش كاسب ولا ملين
 شئ يعلمه الله ويشحنهم شباب ملاين
 شحن اليهود والعرب من دير سنيد وياسين^(١)

(١) دير سنيد ودير ياسين من فلسطين وفيها قامت العصابات الصهيونية بفتح بطون الحوامل من نساها ليحملوا العرب على ترك ديارهم .

من قبل نصب الخيام باتم مغطين^(١)
من غير ماهيئة أم تحكم ياما انت عظيم
اللاجئين للسما رافعين أياديهم
وفي السما رب للسائلين إليهم
وفي السما رب للطاغين يورهم
لما ياخذهم على بغتته وأخذه أليم
إذا حكم ربنا عالي طففى بالحد
يعمى بصيرته ويجعل له المسالك سد
ويضحك الناس عليه يوم الوقار والجد
ويقول (لياقت ونهرو) مش كده ياغشم^(٢)
ياصين ياواسعه يابالعه سبعميت مليون
وتقولى هل من مزيد للكون وأهل الكون
يا محضره مقبره للأنجلسوسكسون
إلهى تجعل قبورنا عندنا يا كريم

على الربابة

أول ما نبدى القول نصلى على النبى	نبى غرنى يلعن أبوك يا بنيت
تانى كلامى وفد مصر بلادنا	ولع شموعه والتقى بكبريت
تلاتين سنه يا مصر واحنا فى ضلمه	لما حدايتك ربت الكتاكيت

(١) أى ماتوا قبل نصب الخيام .

(٢) كان لياقت رئيس وزراء باكستان ونهرو رئيس وزراء الهند يعارضان قيام الحرب الكورية .

يابو خلقه مشومه

يا بجيت يابو دومه يابو خلقه مشومه
لاديك بالشومه إذا كنتش ترجع
ضبطوك متييل عالـقصر محول
تجري وتتشندل وعامل واد مجدع
إتلم احسن لك دا الشعب قاعدلك
بالصرمه يذلك اتأمل واسمع

لاعمل تبيت

ستين سنه لاعمل تبيت واشرب لي كوبايتين تبيت
والعن أبو الشيخ كسفریت الكافر الحادی عشر

لابـزق في وشه أولا وانتف له دقنه ثانيا
وأعطى له رزه ثالثا حسب قرار المؤتمر

حسب قرار الی ضبط الشيخ ده لازم يتربط
لا المسلمين ولا القبط يحرموا ربط البقر

قلت لكم الشيخ ينجلد قلتوا لي أخرج م البلد
قلت انت مالك يا ولد حاتنحشر مع العجبر

حنسيت شيخ الدوله تاب
سرق مقاله من كتاب
جه هوه سخمها بيباب
شهر وصاحبـه مشهر

إيه رأيكم ياسامعين
طالب يعر المسلمين
في الشيخ كباب كفته الأمين
أمال ياريتـه كان كفر

لازم تجميعوا المفتري
يا كلهـا لما يتهرى
حالا في مجلس عسكرى
وغيره راخر يعـتبر

ألزم ما يعمل فيلسوف
وتحت منها جبه صوف
ويحط الى فروة خروف
قال يعنى عالم معتبر

ياخى اتلهى جاك البلا
روح اترمى في مزبله
في دقنك المتدلله
واكفى على الماجور خبر

يلعن أبوكم كلـكم
كلاب ما پشبع بطنكم
ويدوس فضيلة علمكم
غير الرشاوى يا غجر

الاشتراكية

الحمد لله لا انا لتات ولا عجان
يازفتزاني كلامى كله باذنجان
ولا قريى بوليس سرى ولا سجان
تبزق عليه الخلايق إنسها والجنان

جماعه شافوا الغلابه ميتين م الجوع
جأى انت بتقول دادين البلشفيك ممنوع
لا فى الجوامع رأيت مثلك ولا فى الدير
ما دام فضيلتك بتاكل كستليته وطير
طب وانت مالك بتفلحس وتتلفسف
هيه نهار البلد دى لما تتبلشف
لأ والتلامه بتستشهد لنا بالدين
إن كنت فاكّر شريعة العدل عن لينين
كان النبى والصحابه يجلسوا عالارض
متجمعين والفقير عند الغنى له فرض
سيدنا عثمان ما كانش عنده رتبة بيه
ولا إمامنا على كان عنده ألف جنيه
ولما تتوزع الحنطه وصاع التمر
والأمر لله لوحده هوه صاحب الأمر
أوجب عليهم إله العرش شىء معلوم
صبح الكلام ده النهارده فى بلاد الروم
يشغلوا الشحط فى الجامع بسبعه ريال
وآخر الشهر يتحاسب على الإهمال
ويبقى فيهم غنى مغرور وصاحب بنك
ياما ألوف الألوف يا مسلمين فى ضنك
حنوا عليهم وقاموا وضربوا المشروع
إيش أدخل البلشفيك فى نجدة الإنسان
عالم ومسلم وبتعارض فى فعل الخير
خلى الدرّه والدريس والفجل للخرفان
وتخش فى اللى ما هو لك ليه وتتكشف
حايجردوك م القاووق والجبه والقفطان
إنه أمر يبقى نص المسلمين جعانين
انظر شريعة نبينا نازله فى القرآن
مفيش لهم حد لا بالطول ولا بالعرض
والكل فى الكل إلا فى الحرام إخوان
حتى الخليفة عمر كان يشتغل بإيديه
ولا أبو بكر عنده ست الاف فدان
كان اللى ياخده بلال قد اللى ياخده عمرو
ينزل سماوى ولا ديكريتو ولا فرمان
يطلع مفيش هرش للسائل وللمحروم
والمسلمين أصبحوا لا دين ولا إيمان
يكنس ويمسح محلات الأدب عالعال
يطلع من الدين والدنيا كان خسران
يشغل ابن الأصول طول النهار بفرنك
أكل التراب والعبك من جسمهم ريقان

علامات الساعة

ومن فكاها المرحوم ذلك الزجل الذي كتبه في بعض الأئمة الذي يقبضون مرتباتهم نظير القيام بالصلاة :

أول علامه العباده والصلا بفلوس ومن العجب ناس يتقبضهم ولا تصلح
الله أكبر

القرع السلطاني

البت ماشيه من زمان تتمخاطر والغفله زارعه في الديوان قرع اخضر
تشوف حبيها في الجاكنه الكاكي والسته خيل والقمشجي الملاكي
تسمع قولتها .. يا وراكى والعافيه هبله والجدة متشطر

والوزه من قبل الفرحة مدبوحة والعطفه من قبل النظام مفتوحه
والديك بيدن والهائم مسطوحه تقررا الحوادث في جريدة كثر

يا راكب الفيتون وقلبك حامى حود على القبه وسوق قدامى
تلقى العروسة شبه محمل شامى وابوها يشبه في الشوارب عترة

وحط زهر الفل فوقها وفوقك وجيب لها شيشب يكون على ذوقك
ونزل النونو القديم من طوقك ينزل في طوعك لا الولد يتكبر

دا ياما مزع كل بدله وبدله وياما شمع بالقطان والفتله
ولما جه الأمر الكريم بالدخله قلنا اسكتوا خلوا البنات تستر

نهايته يمكن ربنا يوفقكم مادام حفيظه الماشطة بتزوقكم
دى سكره مالطى داهيه ماتفوقكم بس ابقى سيك م الى فات دا مقدر

مجرم ودون

ولما عدمننا بمصر الملوك جابوك الانجليز يا فؤاد قعدوك
تمثل على العرش دور الملوك وفين يلقوا مجرم نظيرك ودون
ونخلوك تخالط بنات البلاد على شرط تقطع رقاب العباد
وتنسى زمان وقفك يا فؤاد على البنك تشحت شوية زتون
بذلنا ولسه نبذل نفوس وقلنا عسى الله يزول الكابوس
ماشفنا الا عرشك ياتيس التيوس لا مصر استقلت ولا يحزنون

المنفى

يوم الدبـايـح كان آخر مواعيدك
وقفت له فرحان أنصب رايات عيدك
وافرش لك الريحان واسمع زغاريدك

زَعَقَ غَرَابَ الْبَيْنِ فَصَلْتَ أَكْفَانِي

خِيَةَ أَمَلٍ وَمَرَامٍ وَاعِرٍ وَمَتَعِرٍ
يَا رَيْتَهُ كَانَ فِي مَنَامٍ يَصْبَحُ وَيَتَغَمَّرُ
أَوْ حَكَمَ بِالْإِعْدَامِ عَالَتِ نَاسٌ يَنْشَطِرُ
مَا كَانَ تَشُوفُ الْعَيْنِ حَالِي إِلَى بَكْـفَانِي

عَالِسِينَ يَا مَصْرَ مَشِيَتْ إِلَيْكَ يَسْلِينِي
عَلَيْهِ عَبْدٌ جَوْلِيَتْ تَرْكِي عَلَى صِينِي
يَا مَا لَقَيْتِ وَرَأَيْتِ جَمَالَ يَنْسِينِي
وَاتَفَكَّرَ الْهَرَمِينَ تَجْرِي الدَّمْعُوعُ تَانِي

يَا رَبِّ

قَدْ دَعَاكَ الْمُحْزَنُونَ فِي غَسَقِ اللَّيْلِ وَقَدْ نَامَ كُلُّ حَيٍّ سِوَاكَ
رَبُّ أَنْتَ اللَّطِيفُ بِالْبَرِّ وَالْعَا صَيِّحُ الْجَبِّ لِكُلِّ عَبْدٍ دَعَاكَ
لَكَ لَطْفٌ فِي الْخُطْبِ لَوْ أَمْعَنَ الْمَكْرُ بَ فِي وَقْعِهِ يَكَادُ يَرَاكَ
أَنَا مَسْتَمْسِكٌ بِجَبْلِكَ فِي الْيَمِّ إِذَا الْكَائِدُونَ مَدُّوا الشُّبَاكَ
فَوْقَ مَنْ دَبَرُوا عَلَى الْأَرْضِ كَيْ لَمَّا كِيدَ رَبُّ يَدْبِرُ الْأَفْلَاكَ

الكورنيش

سعيده يا بتاع الكورنيش	ياللى اشتهرت بقطع العيش
تعالى خد ليلتك شيش بيش	بينى وبينك ألف حساب
فاكرشى يوم ما كنت وزير	وشبعت فى العالم تعوير
جه الانتخاب يشهد يا أمير	بأنك الأبعد كذاب

ريح الخريف بيهف

ريح الخريف بيهف	على ورق بيرف
على الشجر دبلان	خلى البلاوى تحف
يا جامع الأطيان	عشر تلاف فدان
بالغصب والتسخير	والسجن والمآمير
وجارك المحتاج	واقف له بالكرباج
ياكل رغيفه حاف	وطقتك أصناف
كان ليه يانور العين	تاكل كثير وتحف
خلى البلاوى تحف	

وياللى فى التموين	لوشت عالملاين
ولك رصيد فى بنك	من ناس تعيش فى ضنك
وعزبه وعمارتين	جولك ياخويا منين
م البفته والدمور	وأمرور وراها أمور

تربح حلال وحرام كثير قليل ما تعف

خلي البلاوى تخف

وياللى فى التحقيق شغلت لى التليفون

والضرب والتضييق قد ايه ظلمت برىء

عشر سنين أشغال فى الصخر والأهوال

وتشنق المظلوم قبل المداد ما يجف

خلي البلاوى تخف

ربيع وعدى وفات خلف وراه حشرات

ما هو الزمان بيدور من الظلام للنور

راح الربيع والرد وجه زمان الطرد

الريح تهب عقيم تحصد عيدان وهشيم

بدوامات بتلف خلي البلاوى تخف

الاستعمار

الأوله آه .. ، والثانيه آه .. ، والثالثه آه ..

الأوله ، شطبت تونس من الإسلام ، وجزاير طواها البين

والثانيه ، تحكم بلاد الهند والأهرام ، بأشاير وغمزة عين

والثالثه ، حطت على حكم العراق والشام ، بذخاير ومليارتين

الأولة ، لما كل المسلمين صارت ، خدم وعبيد
والثانيه ، حطوا بناتهم قشلاقات فارت بنار وحديد
والثالثه ، أسعارنا في سوق الغنم بارت ، نهار العيد

الأولة ، أمه خاييه والتاريخ معلوم
والثانيه ، جات ضربه صاييه من بلاد الروم
والثالثه ، قول جاتنا ناييه والكلام مفهوم
الأولة آه ... والثانيه آه ... ، والثالثه آه ...

إلى جون بول رأس الغول

أجون بول فضلى لا تجحد	وعن منهج الحق لا تعدل
نسيت معاونة العلمين	وكنت حقيقا بأن تحذل
فأحرزت نصراً عنه عجزت	وكنت جباناً تتذل
فلولانا كنت كمثل خراف	تساق حثيثاً إلى المجزر
وأين الثريا وأين الثرى ؟	وأين جون بول من هتلر ؟

تشرشل

ياباكي ع النيل وتحريره بدمع العين
عن مين ورثته وخايف تتركه عن مين ؟
عن جدك المحترم أو مين من الوالدين ؟

أو عبد كان عندكم شاريينه بفلوسكم
مكتوب عليه الشقا والجوع ليوم الدين
يا محلا كانت ملافظك أيام العلمين
ياما الطفك كنت يومها من دايين ومدين
يا عندلـيب في المحن وف قوتك تنين
أما صحيح ان اللى بيخستشوا ماتوا
وكل أهل التلامه والبرود عايشين
هتلىر وموسلىنى مين جنبك يا ذو القرنين
هتلىر وموسلىنى مين جنبك ياوش البين
هتلىر وموسلىنى مين ، نارهم ولا جناك
يا ألف رحمة تبشيش قبرهم لاتنين
بالزقه معجونه بالأفيون وسايانا
بين الشعوب والأمم نايمين على صاحيين

جريح الحرب

بكيت عليك يا جريح الحرب واتقطع	من البكا قلبى ياريت البكا ينفع
مين ده عطاك الذخيره بمب بيقرقع	ورجعت وحدك وواكل نصك الدفع
البت قالت بفرده كريمه ماخدوشى	وصاحب الشغل قال له ما تضايقيشى
والدوله ساهيه وانا سارح فى تحشيشى	وانت على كل باب تسمع كلام يوجع
ويوم مايعطوك حقوقك يعملوك شحات	الخيرين يجمعوا من بعضهم إعانات
الباشا من بنكه يصرف لك خمس شلنات	وهانم الباشا قالت والنبي مادفع
شفت الجريح فى بلاد الروم يتقدم	على الأصحا ولو طالع على سلم

وكل أطفاله تترى وتعلم وهو تصرف عليه الدولة والمصنع
ياقائد الجيش ياللى جريت من الميدان صدرك عليه من رصاص الحرب ألف نشان
راح يجرى إيه لما تعطى للجريح فدان من أرضنا اللى أغنى م اليهود بزمان
جزاة جيوشنا ماقادها الماريشال جهلان القائد اللى جيوشه تروح ما ترجع

لصوص الأدب

يا سخيـف يا بن (صفيقه)
أبدا تحدث كالناقـو
هل ترى الناقـوس قد
أم رأيت الجحش يستبد
أنت مكروب وغفن
حامل جمجمة جوفاء
أنت لولا بائعو الفـو
ساكنو سنقر والمد
أنت فى الكتاب كالجميز
لا تقف لى وقفة الأبله
مستعيرا هيئة المظلـو
كم وكم تسرق منى
إن بر كان فيـزوف

ضجرت منك الخليقه
س أصواتا عتيقه
غير فى الدنيا زعيقه
ل ماعاش نهيقه
فوقك انصب الفنيكا
بالقطـع طليقه
ل وأبناء الطريقه
بع والمصر عتيقه
فى وسط الحديقـه
لا يدرى الحقيقـه
م يسترعى صديقـه
فكرة كانت رشيقـه
فاجر كله فيكا

ثروة الفن

ياريت ألاقى غدايا أو عشايا بلاش زى الإذاعة مابتلاقي الأغاني بلاش
ياسادق وسيداتي تسمعوا أنغام قولوا لمدير الإذاعة مشتريها بكام
يقول هدايا وجايانا من الأفلام عرفا وذوقا وقانونا مانرفضهاش
ياريت جميع المصالح تقفل العطاءات وتوفر المال ولا مزایدات ولا مناقصات
سكة حديدنا نهادي لها الحديد والفحم وقائد الجيش نهدي له الدقيق واللحم
وتورينيات خزاناتنا تهدي للأشغال كان وزارة المعارف بالكتب ياعمال
ووزارة الصحة يهدي لها الدوا والشاش

الخطف له ناس ولكن يسترخوا المخطوف وثروة الفن منهوبه على المكشوف
ودان بتسمع وفين عين العدالة تشوف ألحان ولاد العرب ياخذوها بالجمان
و«باخ» و«فاجنر» و«فردى» يندفع له كاش

ياريتها كانت سور تتلى على الأموات كان اتكتب لى عدد رمل القلا حسنات
لكن على مصلحه حاطين بها بهوات إيرادها - ميت ألف أو أكثر من الجنيات
ومؤلفين النغم بايتين على أبراش

عيد الثورة

العيد ده أول عيد عليه القيمه مافيشي تشريفه ولا تعظيمه
صاحبين وأعراضنا أقله سليمه والقيد محطّم والأسير متحرر
مرمر زمانى يازمانى مرممر

صوت المدافع كان زمان يرعبنى كأنها متسلطه تضربنى
بقت المدافع كلها تطربنى من كل طلقه سامع الله أكبر
مرمر زمانى يازمانى مرمـر
ويا بلابل يالى فى الفجريه ياما صدحتى فوق رم مرميه
غنى علينا فى سما الحريه يدخل غناكى فى القلوب متصور
مرمر زمانى يازمانى مرمـر

جمهورية الإسلام

وقال مش ضرورى	سبقنى الباقرى
يذل البريه	إله اسمه ميرى
حكومه نبينا	بدت فى المدينه
رئيس جمهوريه	نولى بإدينه
بشره وخيره	وأخيره مصيره
ولو من وسيله	نجيب احنا غيره
يقول عرش والدى	بلاش كلب معدى
له الأولويه	على شعب جدى
ينام فى سرايه	يقوم من سرايه
لجارمين هديه	ويبعث عشايه
تقول كل ساعه	وخالتى الإذاعه
جزيل العطيه	مغيث الجواعه

ولما هلكننا — أدي احنا سبكننا
تمائيل ملوكننا — برابـخ سنيـه

بره .. بره

يرموا لنا الاستعمار بره	ياللا ياجنود مصر الحره
بره	بره
ما يدافع عنها الا رجالها	أراضينا جنوبها وشمالها
برضاها تخرج مضطره	واللى ماتترك شط قنالها
بره	بره
على ابنه المصرى مافيش غيره	النيل يجرى ويفيض خيره
حالف لايجوع ولا يتعري	والشعب الى نبض من فوره
بره	بره
فى بلاد على أهاليها عزيزه	الاستعمار ماهوش عوزه
أغلى من فحم انجلترا	والناس بتقول قمح الجيزه
بره	بره
والدنيا أهى سامعه وشاهده	قولها لهم يا أمه مجاهده
ياللى كلامكم سبعين مره	بره بره كلمه واحده
بره	بره
وبلاش تمحيك بمواصلاتكم	بره بره لموا حاجاتكم
محروقه وفى البريج تدرا	ومغالطاتكم ومعاهداتكم
بره	بره

الجلال

مصر الى كان النواح
على ذهبها الى راح
بين المسا والصباح
واتكلمت بالسلاح

والمندبـــــــــــــــــه فيها
في جيوب أعـــــــــادها
قامت أهـــــــــــــــــالها
في وجوه أعـــــــــادها

دكت عروش الضلال
بضربه من إيد جمال
هزت قلوب الرجال
وبحسبوها خيال

والظلم في ثانيه
واحده بلا ثانيه
في كافه الدنيا
ولا خيال فيها

فيها بطـل وأسد كاسر
الى الحديد لان في يمينه
فيها جمال عبد الناصر
والأمة خلاها عساكر

لعب فاروق الـبـي اـتـنـمـرـد
 و بـقـت مـدافـع بـتـزغـرـد
 و طـب نـجـمـه و اـتـشـرـد
 بـقـدرـة المـولـى القـادـر

وتشرشل الى عادانا
صبح ياناسن يجري ورانا

سبعين سنه واستعمانا
تجری ماتلحقشی یاشاطر

قول له القضية دي منتهيه مش عايزه جلسه وفنظريه

هنا احنا لندن هنا احنا موسكو وقول واشنطن الأمريكيه

مفیش مفاوض یکتب عرایض عشان یقایض بأبعادیه
ولا سیاسى ودبلوماسى على الكراسى بحکم علیه

خلصنا من دى وقول یافندى استلمها جندى بیندقیه
تحت الرمال الفراعنه عدت الأجيال
تنظر إلى مصر إمتى یقى فیها رجال
یتغیر الحال ویبذل بأحسن حال
ردت علیها الجنود فوق الرمال یاجمال

صوت السلام

صوت السلام هوه اللى ساد واللى حکم على الدخیل اللى اندحر واللى انهزم
عدونا لما اعتدى .. قدمنا أرواحنا فدا واستعجبت من بأسنا کل الأمم

تلات أم یابور سعید متقدمه .. بدبابات وطیارات تملأ السما

الأوله : داخله البلاد مستعمره

والثانيه : بعد الانكسار متجبره

والثالثه : على العرب متأجره

هدموا البيوت قتلوا النفوس وإنما

إحنا هدمنا عزمهم

فی الشرق کلّه ومجدهم

تلات دول جاييه العتاد لكنهم متقدموش فى بورسعيد ولا قدم
اسم السلام هو الى ساد واللى غلب وبدمنا الغالى على الأرض انكتب
لا يتمحى من أرضنا ولا يزول واحنا هنا
متمسكين بحقنا متسلحين بعزمنا
أعدانا شافوا البينه الى بنوه فى سنين فى ساعه انهدم

شافوا العدا فى مصر عزم ومقدره شافوا النفوس تنباع والله اشترى
شافوا الهوان اتندموا عالى جرى وعادوا بالخذلان وبالعار والندم

الطيران المصرى قبل الثورة

إوعك ياشيخ العرب زرك يطير عشرات
ده بمبم الطيارات والطيارات دى بعيد
لا سيفك الى بدهب ينفع ولا النشانات
ما داهيه لما تجيك طياره م العالى
يوقفونا طابور نحرس لك السرايات

يا اهل الفنون كلى خجل

وقت الكلام والهلضمه بشعر وزجل
ده ينتهى ونخش فى وقت العمل
نويت أخلى غدوتى عدس وبصل
وعشوتى صحن الطحينه والوعسل
ودى السنه بلاش جزم ولا بدل

بميت جنیه أبدی ونا کلی خجل
یا اهل الفنون یا اهل المقالات والجدل
جالکم عدو ومن وراه أربع دول
یسلحوه ویبلغوه کل الأمل
ویصفقوا له لو حرق ولا قتل

مناجاة

قریت وملیت کفایه خوف السقوط والبطاله
وکل ما زداد قرایه بالدنیا أزداد جهاله

* * *

یا طالب العلم تنادس لو یقی علمک بضاعه
تنفع وتستفیع الناس لو کنت صاحب صناعه

* * *

یا عالم العلم بالله یزید فی نور البصیره
واللی استنارت نواياه یلقى الذهب فی الحصیره

* * *

إن كنت تطلب رضی الله یجعل لك الناس عبيدك
وان كنت تطلب رضا الناس أقلهم یقی سیدك

* * *

الحلم والصبر کنزین روتشیلد محتاج إلیهم
واللی یقولوا الكنوز فین ابکی یا عینی علیهم

الترقيم الدولي ٥ - ٣٠٢٤ - ١١ - ٩٧٧



مكتبة مصر
٣ شارع كامل صدقي - الفجالة

بهرم التونسي - الأعمال الكاملة



6 222010 918883

ADBR0003 السعر 9.00 ج